



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Collegij Soc. 4 Jssv Monachij
MEDITATIONES
IN
PASSIONEM
ET
RESVRRECTIONEM
IESV CHRISTI,

Dispositæ per hebdomadam.

Auctore Egberto Spitholdio S. T. L.
Canonico & Plebano Antuerpiensi.

*Accedunt eiusdem Auctoris pia Precatio-
num & Contemplationum Exercitia:*

Quæ sacrosanctum MISSAE sacrificium, &
sacrum S. ROMANAE ECCLESIAE
Officium spectant.



ANTVERPIÆ,
EX OFFICINA PLANTINIANA,
Apud Viduam & Filios Io. Moreti.

M. DC. XII.

collegij Soc. J. J. V. Monecy. 1622.
MEDITATIONES
IN
PASSIONEM
ET
RESVRRECTIONEM
IESV CHRISTI,

Dispositæ per hebdomadam.

Auctore Egberto Spitholdio S. T. L.
Canonico & Plebano Antuerpiensi.

*Accedunt eiusdem Auctoris pia Precatio-
num & Contemplationum Exercitia:*

Quæ sacrosanctum MISSAE sacrificium, &
sacrum S. ROMANAE ECCLESIAE
Officium spectant.



ANTVERPIÆ,
EX OFFICINA PLANTINIANA,
Apud Viduam & Filios Io. Moreti.
M. DC. XII.

**Bayerische
Staatsbibliothek
München**

3

Reueren^{mo} in Christo Patri
ac Domino,
D. IOANNI MALDERO
E P I S C O P O
ANTYERPIENSI
Domino suo vnicè colendo
EGBERTVS SPITHOLDIVS.



M P L I S S I M E
P R A E S V L, ordo
charitatis ac iusti-
tia requirit, vt in-
feriores superioribus gratulentur:
maximè cum in publicum &
commune bonum assumuntur, &
tamquam Aaron ad Sacerdotij
apicem vocantur. Sed, vt verum
fatear, nescio an magis vobis,

A 2 quàm

quàm nobis ipsis congaudere debeam. Magna siquidem vobis collata est dignitas, at nobis maior facta est gratia, quòd T. R^{am} in qua omnia ferè reperiuntur, quæ duobus præcipuè locis Doctor gentium Episcopo asscribit, felicissimè nacti sumus. Nos quidem nitemur prudentia, bonitate, ac cunctis donis tuis, tam industria acquisitis, quàm gratia Dei elargitis, tua enim Reus^a curam animarum omnium in se recepit. Quocircà mihi persuasum habeo, quòd hoc edito libello tuæ R. optimè gratulari possim, non tantùm gaudens de dignitate, sed multò magis optans in omnibus felicem successum, quo in Deo, per Deum, & cum Deo Opt. ter Max.

omnia

omnia tua finem sortiantur. Ad
quod R^{mus} MIRAEVS pie recor-
dationis, glaciem scindendo, viam
satis planam reddidit. Hinc in
sanctissimis CHRISTI Domini
vulneribus T. R^{am} Deo commen-
datam cupio, vt hic cum omnibus
electis, qui sunt in caelo & in ter-
ra, vnum efficiatur; & in tempo-
re angustiarum, tribulationum &
miseriarum, ad haec Sacrosancta
vulnera, quasi columba ad fe-
nestram dum accipiter appropin-
quat, refugium habeat. Hic enim
solummodo pax & tranquillitas
vera inuenitur, hic tantummodo
quies post laborem nobis datur, hic
cuncta mala superantur, hic cum
Deo inhabitare possumus, dicentes

cum sponsa in Canticis canticorum: Fasciculus myrrhæ dilectus meus mihi: inter vbera mea commorabitur. Ut igitur debito charitatis officio T. R. gratarer, hoc opusculum Meditationum PASSIONIS DOMINICAE Reuerendissimæ T. AMPLITVDINI dedicatum volui. Scio equidem, pro humilitate qua fulget T. R. tam gratum hoc munus paruum, quàm aliquod aliud volumen, quale forsitan in posterum à doctioribus expectabit. Ego cum muliere vidua & paupere, hoc quod habeo, quasi ara minuta duo in gazophylacium mitto, vbi non res, sed animus dantis est pensandus. Munerum

enim

*enim animus optimus. Tua verò
R^{ma} P A T E R N I T A S, quæ in-
ter omnes sicut pater inter filios
versatur, hoc munus paruum non
aspernabitur, sed sicut parens pius,
filij candorem æquo animo acci-
piet. Antuerpie, Feria quarta Ci-
nerum, M. D C. X I I.*



Canticor. cap. i.

Fasciculus myrrhæ dilectus
meus mihi , inter vbera mea
commorabitur.

Threnorum cap. i.

O vos omnes , qui transitis
per viam , attendite & videte , si
est dolor sicut dolor meus.

MEDI-

MEDITATIONES
IN
PASSIONEM
IESV CHRISTI,
dispositæ per hebdomadam.

FERIA SECVNDA.
PRIMAE MEDITATIONIS
PARS PRIMA.



QUATER de cælis Deus, cum vires & sensus meos recolligo, ad cor meum in te eleuandum, & te in anima mea recipiendum; quid potissimum pro recreatione mea, & pro debita gratiarum actione tuę diuinę Maiestati rependenda, in contemplationem assumam? Beneficia ab initio nobis collata sunt tanta, tam multa & varia, vt à quo principium ducam, ignorem. Cum igitur tua diuina inspiratione hoc mecum perpendo, nihil mihi salubrius, nec tuę paternę bonitati gratius inuenio, quam

A 5

finen

finem & consummationem diuinæ incarnationis, qui proprio Filio tuo non pepercisti, sed pro nobis omnibus illum in mortem, mortem autem crucis, tradidisti. Quomodo autem hoc effectum curaueris, iam expendere cupio, ad affectus meos mouendos, & vires interiores diuino amore inflammandas; vt ego tantorum beneficiorum memoriam agens, & tãtam charitatem mihi exhibitam expendens, totus saltem ad redamandum accēdar, qui tali amore à tanto amatore præuentus sum. O Pater misericordiarum, & Deus totius consolationis, conforta me in hac hora, vt seclusis omnibus negotiis externis, cunctis phantasmatis & imaginationibus vanis in nihilum reductis, ego ex toto corde ad te conuersus, in me perfectè sentiam quanto amore nos filios hominum persecutus sis, quando Filium tuum vnigenitum de alto cælorum habitaculo in hanc diram lacrymarum vallem misisti; vt per ipsum in omnibus erudiremur, & ipse nobis omnium virtutum ac bonorum operum exemplum fieret. Misisti autem illum,

lum, vt quos amas, eius vestigiis insistere faceres. Sed vt hoc facere incipiam, da, illum in corde ac sensibus semper præsentem habeam, quocumq. me etiam recipiam: quidquid agam, siue dormiam, siue vigilem, omnia mea cum amaræ passionis memoria sint cōiuncta: imò non comedam aut bibam, nisi illud in pretioso eius sanguine cum summo dolore pro me effuso intingam; vt cibus & potus ad veram peccatorum pœnitentiam, & ad pium excitandum amorem erga ipsum (cui totum debeo, quod habeo & sum) mihi sapiat. O Deus Pater omnipotens ad hoc me dirige, vt te incessanter laudem atque glorificem per Iesum Christum Dominum nostrum, qui tecum viuit & regnat in vnitæte Spiritus sancti Deus; quem ad eum finem misisti in hunc mūdum in nostra natura, vt per ipsum in virtute Spiritus sancti omnes tecum essemus. Ad hoc igitur me adiuua, vt inter electos cum Christo Iesu in te vnum efficiar; hîc in gratia, & postea in gloria. Amen.

PARS SECUNDA.

VT autem, 'ô Pater cælestis, in meditatione dilecti Filij tui cum fructu me exerceam, da, à vera compassione, ad quam semper teneor, ex eo quòd pro me omnia tulerit & fecerit, principium ducam. Omnem igitur dolorem, quem tum in horto tum in aliis plerisque locis perpeffus est, ita in me traham, vt si nō in corpore, saltem in corde eum sentiam; atque ita particeps fiam, ac si præsens ei interfuissem. Scio enim, quòd, licet passio eius transierit, vt eam mea compassione mitigare nequeam, tamen citra hoc quòd ei condoleo, tibi placere nequeo. Coheredes namque illius erimus (*Rom. 8.*) si compatimur, vt & conglorificemur. Si tantam erga nos declarauit charitatem, vt pro similitudine (*Hebr. 4.*) absque peccato per omnia sit tentatus, vt possit compati infirmitatibus nostris; quomodo non compatiar illi, qui sua passione & morte, me ab æterna passione & morte liberare voluit? Quomodo non compatiar illi, qui Filius Dei est, cælū & terram implēs, iam ex regali stirpe Dauid

homo

homo factus, conceptus de Spiritu sancto, natus ex intemerata Virgine matre, sapientissimus, sanctissimus, ac maxime sincerus? qui (1. Petri 2.) peccatum non fecit, in cuius ore non est dolus inuentus, qui nec te Patrem suum cælestem nec hominem vnquam offendit; sed duxit tam piam conuersationem, vt numquam riserit, lacrymatus autem sit sæpissimè, deflens peccata nostra: qui speciosus præ filiis hominum, perfectissimæ complexionis, & sensus acutissimi: qui pro me intolerabiles dolores in omnibus membris ac sensibus, internis & externis, sustinuit: quippe in quo nihil erat secundum inferiorem hominem, quin totum fuerit doloribus plenum, seclusa omni consolatione interiore & exteriori, cùm diuinitatē sibi vnitam, magis nouercam, quàm matrē senserit: vtpote quæ humanam naturam ita sibi reliquit, vt verè quartū in cruce verbū dixerit: Deus meus, Deus meus, vt quid dereliquisti me? Dū hęc mecum expendo, ô Deus Pater omnium, quomodo non dolens & contristatus incedam, quasi paratus (si possibile fo-

ret) ad participādum cum illo, & prompto animo accipiendum. de manu tua, quæcumque etiam mihi eueniant. Eia igitur, Pater misericordiarum, da semel in corde meo sentiam, quantopere pro me Dominus meus & Deus meus laborauerit, quò in veritate semel ex toto corde ipsi compati valeam.

Prætereà Domine Deus salutis meæ, da per benedicti Filij tui passionē amarissimam, veram compunctionem & dolorem pro peccatis, ad agnoscendum quàm abominabilia ipsa sint. da, vt ex hac intolerabili dilecti Filij tui Domini nostri passione peccati magnitudinem cognoscam; vtpote, quod in te, qui infinitè magnus es, infinitum erat; vt secundum diuinam iustitiam non nisi ab Omnipotente tolli, atque in nihilum redigi potuerit. Quare vel homo infinitis tormentis consumi debebat, (quod possibile non erat) vel perpetuam cum damnatis in inferno pœnam sustinere, vel quispiam infinitæ potentia pro eo satisfacere debebat, qualis erat Filius tuus benedictus, infinitus dignitate substantiæ & potentia; quem peccata

mea

mea de summo cælorum habitaculo in
 hanc diram lacrymarum vallem pertra-
 xerūt. Si enim ego non peccassem, tuus
 dilectus Filius incarnatus non fuisset,
 nec passus, nec mortuus. Meritò ergo
 mihi abominandum peccatum, quod
 Dominum meum ac Deum meum in
 crucem pertraxit. Nam sicuti peccatori
 peccata in inferno locum præparant, &
 furi furtum pœnam mortis: ita cuiusli-
 bet hominis peccata ei necessitatē mo-
 riendi attulerunt. Sed nec putandum
 grauitatem peccati diminutam, quòd
 Dominus non tantum pro me, verum
 pro toto mundo passus est. Hinc enim
 non peccatum extenuatur, sed virtus
 passionis dilecti Filij tui aperitur, quòd
 non pro vno, nec pro paucis, verum pro
 omnibus abundanter satisfecerit: vt sol
 non vni homini, sed æqualiter omnibus
 inferuit; cum vnus solus tantum, quan-
 tum totus mundus de eius seruitio reci-
 piat. Et vt non minùs mortem homini
 infert, si solus quispiam eum ferro tru-
 cidat, quàm si ad hoc peragendum de-
 cem sibi assumat: ita mors dilecti Filij
 tui tam fuit necessaria ad vnum pecca-

tum

tum mortale tollendum, quàm ad totum genus humanum absoluendum, cùm ego non minùs gratiam eius in me experiar, quàm si pro me solo passus esset. Adferet ne igitur mihi passio benedicti Filij tui compunctionem & dolorem? Imò, dum hæc mecum considero, meritò sanguineas lacrymas emittam, ex eo quòd propter peccata mea huius passionis sim causa. Eia igitur, Deus meus & omnia, commoue cor meum, quoties in meditationem passionis Dominicæ descendo, vt per eam quotidie vitæ emendationem consequar.

PARS TERTIA.

PRætereà, ô Pater misericordiarum, necessaria mihi est imitatio passionis dilecti Filij tui, si non incassum eam meditari voluero. Ad hoc enim passus est (1. Pet. 2.) vt exemplum nobis daret, & vestigia eius sequeremur. Duo autem mihi potissimum imitanda. Alterum est, desiderium patiendi pro illo, qui tanta pro me perpeti dignatus est. Largire mihi ô Domine hanc voluntatem, ne omnino pusillaminis in mea tribulatione efficiar; sed amplius

semper

semper pati desiderem, donec pro mea fragilitate, per mortem satisfecero. Alterum quod mihi imitandum, est virtutum aggregatio: quæ si vniquam in vita, in morte multò abundantius sese aperuerunt. Quamuis enim sicut ouis ad occisionē ductus est, & quasi agnus coram tondente se obmutuit, non aperiens os suum; tamen de cathedra Crucis omnem virtutem docuit, imò docuit modo perfectissimo, omni interiore consolatione, quæ vt plurimum virtutes sequitur, destitutus. O igitur Pater omnium, da mihi in huius sacræ passionis meditatione diligenter attendere, quas quouis loco virtutes operatus sit, vt cor meum inflammetur, & eas in me sentiens imitari valeam. Fuit profectò humillimus, cùm multis & variis modis in derisum esset omni populo, tum quando veste alba, eaq. longissima, ductus est per plateas, tum quando purpureo vestimento circumdatus, coronam spineam in capite suo benedicto portauit, tum etiam quando cum homine seditioso, ac viro homicida siue latrone comparatus est, imò eo

dete-

deterior iudicatus est, vbi ipse latro vita donatus & Saluator noster morti adiudicatus est, ac in cruce denique medius tamquam princeps latronum pependit: quæ omnia opprobria & contumelias corde humillimo pertulit. Da mihi ô Pater hoc imitari, vt in omni iniuria, contemptu & opprobrio, coram te me semper humiliem, & cogitem me decere, vt tuo dilecto Filio conformer.

Manfuetudinem declarauit, quando pius & modestus omnia mala patienter tulit, & alto ac mirabili silentio ad iniurias & cõtumelias conticuit. Non enim se excusauit, neminem verbo læsit, nulli malè locutus, aut iniuriam fecit. O Pater misericordiarum, da, in vita tantam colam manfuetudinem, vt iniuriarum inmemor ad cuncta mihi aduersantia fileam, imò potiùs omnia vel à minimo perferā, quàm duriùs loquar, aut verbo, vel facto vllum mortalium contristem.

Obedientiam fortiter aperuit, quando non solùm tibi Patri suo cēlesti obediens fuit vsque ad mortem, mortem autem crucis, sed etiam iniquis iudiciis & sceleratis nequam, quos simpliciter,

citer, benignè & constanter secutus est, dum vestibus exueretur, & purpura circumdaretur, dum coronam spineam in piissimo capite acciperet, & crucis onere grauatius ad montem Caluarię deduceretur, manus ac pedes extenderet obtusis clauis perforandos, & ad alia multa tormenta perferenda sese accommodaret. O Pater benignissime, da & mihi hanc obedientiam, quò cunctis me inferiorem iudicem, & vel minimo propter te obedientiam præstem, ad gloriam nominis tui, & animæ meæ salutem. Pro gaudio ducam, dum abnegans meipsum, alterius voluntati in cogitando, loquendo, & operando obsecutus fuero, ut ita per me sanctissimum nomen tuum semper prædicetur atque laudetur, hîc & in perpetuum. Amen.

P A R S Q U A R T A.

Charitatem etiam perfectam, ô Pater æternæ, Unigenitus tuus in passione sua manifestauit, quando non solum amicos, verum etiam inimicos, à quibus omnem dolorem, iniuriam, & contumeliam accepit, dilexit. Imò in tantum eos dilexit, ut non hostes, sed

amicos

amicos reputauerit, optans illis quæque felicissima, ac orans pro ipsis in passione sibi ab illis illata, vt à malo resipiscentes ad cor redirent. Et dicebat per Prophetam (*Psal.* 104.) Pro eo vt me diligerent, detrahebant mihi; ego autem orabam. Cõfixus autem cruci, vbi tã pretiosus sanguis de benedictis manibus & pedibus efflueret, in fortitudine orauit, dicēs: Pater ignosce illis, quia nesciunt quid faciunt. Tandem cum in manus tuas spiritum suum commendaret, astantium corda fide inflammavit, & ad pœnitentiam commouit, vt alij dicerent, Verè hic homo Filius Dei erat; alij verò percutientes pectora sua, ad ciuitatem reuerterentur. O nunc Pater de cœlis Deus operare perfectè in me, vt ex passione dilecti Filij tui charitatem attendens, ipsius vestigiis insistam, diligendo ex toto corde omnes homines, tam paruos quàm magnos, tam inimicos quàm amicos. Imò sic diligam, vt ne inimicitiam quidem sentiam; sed adnitar, vt summa hostilitas summæ amicitiae occasionem præbeat ad omnes homines lucrificandos, in eo

qui

qui me supra modum dilexit. Si hoc effectum curauero, numquam ab iracundia superabor, sed mala cuncta ad exemplum dilecti Filij tui in bono vincam. Si hoc in passione Domini mei inueniam, non frustrà in ea me exercuero.

Verùm charitatis filia misericordia magna fuit in ipso, quando vestes, honorem, famam, cor iuuenile, sanitatem, vires animæ, pretiosum sanguinem, animam & corpus ex misericordia nobis donauit. Hæc omnia necessaria dedit nobis, imò seipsum totum; vt nos, qui nihil eramus, per ipsum verum esse consequeremur. Ad hunc modum, ô Pater omnipotens, passio benedicti Filij tui ad misericordiam me prouocet, vt totum quod per te sum, proximis meis propter te impendam, & hoc totum apud te in perpetuum inueniam.

Insuper ex passione dilecti Filij tui etiam mundum cōtemnere disco. Nam quæcumque mundus admiratur & magni facit, reiicit ille; & mundo terribilia elegit, quando pro diuitiis extremam paupertatem, pro honore contumelias, pro voluptate tormenta, pro fauore lu-

dibria

dibria acceptauit. O Domine cæli & terræ, versabor in hac palæstra perfectionis, & non exercebor in virtutibus? Eia da, cum tuo dilecto Filio, sponso mihi sanguinum, eligam à mundo contemni, affectē potius contumelia quàm honore affici, potius cum Christo Salvatore meo in pœnis, tentatione & tribulatione inueniri, quàm in delitiis aut voluptatibus, & magis gratam habeam paupertatem, quàm diuitiarum abundantiam. Ab his dependet salus nostra. Oportet enim membrum cum capite conuenire, nec sponsæ aliter quàm sponso esse debet.

Perseuerantiam quoque in hac Christi Domini passione addisco. Nam matris dolore, aut amicorum tristitia superatus non est, nec hostium contumelia victus, nec tormentorum asperitate prostratus. Quamuis dicerent; Si Filius Dei est, liberet eum nunc si vult; non est tamen motus, quin semper in omnibus conuitiis perseuerauerit. Quomodo ergo ego diabolicis suggestionibus, carnis motibus, aut consilio prauo sinam me vinci? Est ne mihi salubrius pugnare
susti-

sustinendo, & abstinendo cunctis diebus vitæ meæ, quàm vel in minimo locum dare diabolo? O mi Pater, da ex meditatione Passionis Dominicę omnes has & alias virtutes addiscam, vt hisce in dies occupatus prudentior efficiar, ad maiorem semper vitæ perfectionem consequendam, quò tamquam sponsa tandem cum sponso meo conueniam, & ex toto in me sentiam, quod & in illo, vt tu in me operans per ipsum tibi in me complaceas, nunc & in perpetuum, Amen.

Secunda MEDITATIO, ad deuotionem per CHRISTI Passionem acquirendam.

PARS PRIMA.

O PATER de cęlis Deus, exercebo ne me in meditatione passionis Domini ac Saluatoris mei Iesu Christi dilecti Filij tui, quæ me ad gratiarũ actionem pro omnibus beneficiis prouocat? Omnino Pater. Nam si aliquo modo gratum animũ exhibere volo, non possum in aliquo salubriũs ver-
fari

sari, quàm in passione sponsi mei mel-
litissimi. Quia per gratiarum actionem
recordamur beneficiorum nobis exhi-
bitorum, & ad laudem progredientes
gratias agimus, non solùm verbis (quæ
sanè minima est gratitudo) sed multò
magis corde & re ipsa, vt hæc seriò me-
ditantes caueamus nos ab omni re te ad
iracundiam prouocante, nullamque
interim negligentes occasionem, qua
laudem tuam enuntiemus. Huius pro-
fectò occasio sese offert, quoties Chri-
sti Filij tui passionem & mortem ex-
pendo. Verùm, ô Deus totius consola-
tionis, quinque sunt quæ nos ad gratia-
rum actionem mouere debent, Pri-
mum est, malum, à quo per passionem
Saluatoris nostri liberati sumus. Et
quod est illud? Peccatum omnium ma-
lorum maximum, mentis cæcitas, cor-
dis durities, seruitus diaboli, fœditas
animæ, præsens periculum æterni ignis,
ita grauis, vt cogitationem superet; ita
diurni, vt finem nesciat; ita certi, vt
sine dilecto Filio tuo vitari nequeat. Si
ab his omnibus passione ipsius liberati
sumus, quomodo me ad gratiarum actio-
nem

nem non mouebit? Secundum est, quod per hanc tanta beneficia consecuti sumus, videlicet gratiam, iustitiam, adoptionem filiorum Dei, Sacramenta, sacrificium, virtutes, promissiones vitæ æternæ, denique bona omnia animæ & corporis, interna & externa. Nihil enim bonorum in vita humana, quod non Christi passio donauit, vel conseruauit: nonne ergo meritò hæc ingrati animi crimen abhorrere nos faciet? Tertium est, personæ dignitas. Est ne Saluator noster Filius tuus dilectus, qui tecum uiuit & regnat in omnibus, & adimplet totum vniuersum? Quò igitur magis eius nobilitatem inspicio, & quæ perpessus est considero, eo magis ad gratiarum actionem moueor. Quartum est, modus præstiti beneficii, quod videlicet gratis & non sine summo labore nobis exhibuit. Cælum & terram vnà tecum condidit, nulla suscepta molestia, solo verbo; redemit autem nos doloribus, sanguine pretioso, & vita sua: omnibusque collatis, nihil à nobis requirit præter laudem & gratiarum actionem; quæ pri-

ma in eo posita est, vt rectè beneficiis eius vtamur. Eia igitur Domine largire, vt per huius dilecti Filij tui passionis meditationem incalescam, & perfectum ignem gratiarum actionis in me sentiam. Quintum est, conditio personæ cui hoc beneficium collatum est; quæ sanè vilissima est, hostilis, & maximè ingrata. Quid enim, ô Pater, & Deus cæli ac terræ, nos fœtidissimum sperma, puluis & cinis, sumus? Si (vt ait Sapiens *Sap*, 11.) ante te est totus orbis terrarum sicut gutta roris antelucani, qui descendit in terram, & statim ascendente sole, aut etiam in se ipsa consumitur; quid erit ad te collatus vnus homuncio, qui nihil est, si cum toto vniuerso comparetur? Hanc vilitatem nostram satis expressit sanctus Iob Propheta: (*cap*. 17.) Putredini dixi, pater meus es; mater mea, & soror mea, vermibus. Iam verò non solum viles, sed hostes quoque eramus, auersi à te, qui gratiam tuam nec petere, nec quærere studebamus: imò oblatam etiam tãquam insani respuebamus. Dum ergo, ô Pater omnipotens, agnosco me à

sum-

summo, certo & perpetuo malo liberatum; & summo incomparabiliq̃ue bono, à summa Maiestate, hoc est Filio tuo dilecto, dotatum, per tantum laborem, dolorem & tormenta, quibus nullus mortalium perferendis par fuisset; numquid tam vilis, abiecta, & peccatis fœdata creatura, cum laude & gratiarum actione clamabit, ad te laudandum & prædicandum per Spiritus sancti cooperationem pro his in Filio tuo? Omnino. Eia igitur, Deus Pater omnium, recollige sensus & cor meum, expelle omnem acediam, phantasmata & cogitationes pessimas, vt in meditatione passionis Dominicæ semper gratus inueniar. Amen.

PARS SECUNDA.

Benedictus sis tu Deus Pater omnipotens. Nam benedicti Filij tui passio dat etiam mihi spem ad solatium obtinendum hîc & in perpetuum. Tria sunt quæ spem nostram vacillare faciunt. Primum est, claritas & mundities, quæ requiruntur ad vitam æternam; in quam nihil coinquinatum, aut abominationem faciens aut menda-

B 2 cium,

cium, intrabit. (*Apoc. 21.*) Sed sicuti gloria æternæ vitæ magnam munditiam requirit, ita Christi Filij tui passio & sanguis lauat omnes iniquitates nostras, animam sole reddit clariorem, efficit nos filios Dei, & dat ius ad vitam æternam, vt iam non in alienam, sed nostram hereditatem ingrediamur, quam Christus Dominus sua passione & morte nobis acquisiuit. Secundum, quod spem nostram extenuat, est exactum examen Iudicis, qui etiam de quolibet otioso verbo exiget rationem, penetrabitq; vsque ad diuisionem animæ & spiritus, scrutabiturque cogitationes & intentiones cordis. Verum est, erit districtum hoc iudicium; sed passionis Christi dilecti Filij tui merita seueritatem hæc perferre possunt, cum maior sit satisfactio quam debita, & peccata numero sint finita, merita autem magnitudine infinita: & denique cum Christus ipse iudex futurus sit, qui fuit aduocatus, mediator, redemptor; qui vt mihi cælum daret, eius modò pretium obtulit, sanguinem (inquam) pro me effusum, cuius ipse, quæ magno labore

labore effudit, non ignorat dignitatem. Tertiò tandem infirmam reddit nostram spem, quòd tam viles peccatorum sarcinæ sumus, qui peccatis quotidianis toties tuam diuinam iustitiam offendimus, & pleni concupiscentiis ac imperfectionibus viuimus, & cordis nostri interiora ipsimet penetrare nequimus. Quare S. Iob (*cap. 9.*) dicit: Si simplex fuero, hoc ipsum ignorabit anima mea. Atque hinc sepè despondemus animum. Vt verum fatear, vilitas nostra satis magna est, cùm à nobis nihil possimus quasi ex nobis: verùm gratia, ex passionis Christi Domini Saluatoris nostri merito nobis communicata, admirabilem addit animis nostris splendorem, remittit peccata omnia, addit vires & facilitatem operandi, dat virtutem operibus nostris vt vitam æternam mereantur. Ad hunc modum spes nostra erigetur, si opes omnes Christi Domini, eius omnia merita, omnia ieiunia, labores, pœnas, & quæcumque demum vel fecit, vel sustinuit, cogitemus non aliter nostra esse, quàm mariti bona etiam ad vxorem pertinent, quibus

bus ipsa ad debitorum suorum solutionem, aliasque necessitates, uti potest. O igitur Deus Pater cæli & terræ, da sermō perpendam passionem dilectissimi Filij tui, ut spe iam in me confirmata, numquam pusillanimis fiam, sed cogitem semper id quod in me, ex me foetidum & turpe est, passione vnigeniti Filij tui purgandum quotidie. Dum stricti iudicij tremor mihi in mentem venit, recordor eundem iudicem Saluatorem meum esse, & pro me mortuum, ut illius morte ego viuam. Non etiam me infirmitas pessumdet: nam dilecti Filij tui perfectio infinitas meas imperfectiones superat. Quandocumque autem tamquam sponsus gratiam suam mihi communicat, subleuat me tamquam sponsam in infirmitatibus meis. Hæc omnia, ô Pater benignissime, habeo ex meditatione passionis charissimi Filij tui. Da igitur nunc tam alta mentis contemplatione his immorari, ut semper, plenus solatio, ad me ipsum redeam. Amen.

P A R S T E R T I A.

Verus etiam amor excitatur per passionē benedicti Filij tui. Quomodo enim non redamabimus, qui tanto amore præuenti sumus à nobilissimo & pulcherrimo amatore, cuius pulchritudine & scientia inflammati sumus, qui ex amore noluit moderari quod pateretur? Non equidem ore aut lingua nos dilexit, sed opere & veritate; dum patiens ac moriens pro nobis, omnia necessaria donauit: quæ attulit summo cum labore, dum propter me egenus factus est, ut ego ipsius opera diues efficerer; qui etiam omnem dolorem, miseriam & passionem in se recepit, ut me cunctis gratiis & beneficiis adimpleret. Sed heu quoties restiti ei, nolens obtemperare? auerti me ab ipso, & tamen non cessauit me amare; & pro omnibus his non aliud requirit, quàm ut redametur. Verùm hoc à tua paterna bonitate mihi expectandum. O igitur Pater amantissime, da assiduè in mente habeam, quē diligo; ut certior de amore factus, meipsum non decipiam. Imprimam illum, proprio ipsius exem-

plo, cordi meo, sicuti ipse me insculpsit benedictis manibus suis : vt sicut ille numquam prætermittet cicatrices vulnerum, ita numquam de corde meo exeat . Vbique memor sim illius, vt de abundantia cordis loquatur os meum: & hoc eius exemplo, quo ipse in cruce pendens tecum pro nobis locutus est, & seriò nos tibi commendauit. Nihil vsq. adeò deuitem, quàm prouocare iram eius, qui opera sua eò direxit, & omnia tulit & fecit, vt me ad amorem sui prouocaret . Vt igitur à peccatis deinceps abstineam, resigno me totum, nihil mihi in vllò negotio assumens, nisi pro eius sanctissima voluntate; nil quærens, nisi honorem eius; sicuti in cruce non sibi, sed mihi laborauit . Nam labores solus sustinuit, & beneficia inde promanantia mihi contulit. Ad hunc modum ego desidero agere, vt non nobis Domine, non nobis, sed nòmini tuo laus sit, honor & gloria. Da mihi quoque magno desiderio ad eius suspirare præsentiam, vt cum illo sim, cui singulares fuerunt delitiæ esse mecum; qui in terra, mari, aëre, atque inferis nos quæ-

siuit,

siuit, & iam inuentos sibi associauit in perpetuum, ad veram diuinitatem nobis communicandam. Ecce hæc operatur in nobis amara eius passio: numquid igitur in ea, ad omnia phantasmata obliuioni tradenda, contemplationem meam ponam? Planè Domine. Eia ergo, Pater benignissime, trahe post te cor meum, & amore Christi absorbeatur; ne aliud quàm charitatis ardorem, quo ipse exarsit erga me, sentiam; ne quidquam cogitem, loquar aut agam, nisi in charitate, quæ in omnibus nos ita gubernet, ne vñquam vel latum vñguem ab amore tuo recedamus. Amen.

P A R S Q U A R T A.

O Clementissime Pater, vt in meditatione passionis Dominicę deuotionem habeam, da illam cum summa admiratione expendam, qua eam plenam inuenio, si benè mecum considerem. Est ne admiratione dignum, quòd passus sit ille, in cuius maiestatem passio non cadit? qui est gloria & gaudium Sanctorum, cuius dignitas est infinita, vita est æterna, sublimitas immensa? & assumpsit talem passionem

ex mera charitate, pro nobis spurcissimis hominibus, peccatoribus ingratis, inimicis, imò pro illis à quibus morte afficiebatur, & tali qualem nullus umquam mortalium passus est, quidquid etiam attendamus, siue tormenta, siue ludibria, siue alias iniurias in præsentī vita illatas: & hac sua passione totum genus humanum liberauit. Quod modo quodam admirabili expediuit: nam humanam fragilitatem cum diuina potentia cōiunxit, & sic Principem huius sæculi diabolum prostrauit, summam iustitiam cum misericordia coniunxit. Nobis enim exhibendo maximam misericordiā in generis humani saluatione, passus est pro summo rigore diuinæ iustitiæ, quod Deus & homo solus pro nobis satisfacere poterat, factus est quasi vermis & non homo, opprobrium hominum & abiectio plebis. (*Psal. 21.*) Imò declarauit hīc summā sapientiam, quæ mundo summa stultitia videtur. Verbum enim crucis (*1. Cor. 1.*) per euntibus quidem stultitia est; iis autem qui salui fiunt, id est nobis, Dei virtus est. Et Paulus ibidem: Nos autem prædica-

dica-

dicamus Christum crucifixum, Iudæis quidem scandalum, Gentibus autem stultitiam: ipsis autem vocatis Iudæis atque Græcis, Christum Dei virtutem & Dei sapientiam. Porro magnam sapientiam ostendit, quando callidissimum hostem arte quadam patiando vicit; iisdemque armis, quibus superior euasit, deiecit. Nam qui ligno vetito deceperat hominem, ipsum ligno sanctæ Crucis vicissim superavit. Imò tali supplicij genere nos liberauit, in quo & medicinam omnium nostrorū morborum reponeret. Nam quamcumque patiamur infirmitatem in anima vel corpore, facillimè per crucem & passionem dilecti Filij tui curamus, vel ita vulnera alligamus, ne nobis exitium inferant. Prætereà in passione sua proposuit nobis omnium virtutum exempla. Quam enim virtutem exercere possumus, cuius exemplum non relucet in passione & morte Saluatoris nostri? Est enim ad instar thesauri absconditi, in quo inuenire est omnes diuitias, lapides pretiosos, margaritas, & quidquid expetere ad animæ salutem possimus.

Per hunc thesaurū fecit in nobis accendi ignem diuini amoris. Nihil enim ita nos excitat ad imitationem dilecti Filij & charitatem diuinam amplectendam, quàm amara passio Iesu Christi Saluatoris nostri. Eia igitur, clementissime Pater, largire Spiritum sanctum, qui quouis tēpore in me operetur, auertat cor meum à peccatis & ab omni specie mala, liberet me ab omnibus occupationibus & sollicitudinibus externis, vniat vires animę meę, introuertat sensus meos, & totum quod in me est, sibi obtemperare faciat, quò ipse pro arbitrio suo me fruatur, & aptū faciat, ad passionem dilecti Filij tui meditandum; quò cor & sensus mei per Spiritum sanctum vniantur, & tu in me, sicuti in Filio tuo dilecto, tibi complaceas, & fruaris te ipso in me, pro tua sanctissima volūtate, hīc in gratia, & postea in gloria. Amen.

*Tertia MEDITATIO, de exitu
DOMINI in hortum.*

PARS PRIMA.

O Deus benedicte Saluator noster,
quàm obediens factus es Patri

vsque

vsque ad mortem, mortē autem crucis!
 Nam cū ex obediētia esses homo factus, vt secundū hominem solueres, quod nos debebamus, nō quieuiſti antequam voluntatem Patris adimpleres: ad quod te trahebat immensa charitas, qūam ab initio erga nos habuiſti. Quare ardenti desiderio affectaſti hanc cœnam vltimam celebrare cum discipulis, dicens (*Luc. 22.*) Desiderio desiderauī hoc Paſcha manducare vobiscum, antequam patiar. Et (*Matth. 12.*) Baptismo habeo baptizari, & quomodo coarctor vsq. dum perficiatur? In hunc enim finem homo factus fueras, vt calicem bibendo, nos tuo pretioso sanguine potares. Quare cū semel decreuiſſes mori, morte tua omnes homines redimere volens, quō cunctis diebus vitæ, beneficij huius memores essemus, reliquiſti teipsum nobis tempore vltimæ cœnæ pro testamēto in venerabili Sacramento; vt quotiescumque hoc faciamus, id est offeramus, vel ipsum sumamus, in nobis renouaremus charitatem immensam, ex qua in Cruce pro nobis mori dignatus es: quo & nos semper paratos

exhiberemus ad idem præstandum pro te, quod tu pro nobis miserrimis peccatoribus inimicis fecisti. Verùm enim- uerò si me non præordinasti vt cum gratiarum actione vicissim sanguinem meum pro te fundam, saltem omnes persecutiones, tentationes, dolores & iniurias mihi quouis modo inferendas accipiam de manu tua, libenter patiendo pro te ad aliqualem remunerationem præstandam pro ineffabili charitate mihi exhibita. Vt autem hoc commodiùs effectum curem, da mihi gratiam quàm sæpius te recipiendi inter sancto ac tremendo Sacramento; quò indefinenter memor tui in finiti amoris, ego vicissim redamare non obliuiscar, sed meditatione passionis tuæ, omnes meos dolores & anxietates vincam. Imò sit mihi gaudium & solatium aliquid pati pro te, quò cogitem me necdum apud te in obliuionem venisse. Nam sicut tu ad patiendum homo factus es, ita & ego ad laborem & dolorem natus sum, vt ad patiendum semper præstò sim, quoad vixero, modò membrum tuum esse velim. Si enim

hic

hic compatiar, & postea conglorificabor. Amen.

PARS SECVNDA.

O Dulcissime Domine, & Sponse
 misericordissime, recordare tristis ac miserabilis exitus tui, quo cum
 discipulis peracta vltima cœna ad mortem Oliuarum iuisti. Nam quando tibi placuit, tua diuina potestate assumpsisti dolores, & tam vehementes, vt puro homini sustinere impossibile fuisset, & hoc solummodo propter me, vt videlicet, quantopere oderit Pater cœlestis peccatum, pro quo tu pati debuisti, ostenderes. O Domine, da mihi ad minimum hæc semper & vbique locorum expendere, vt pro his aliquo saltem modo gratus inueniar. At si volo singulariter gratus esse pro tua tam amara passione; est mihi necessaria cognitio & detestatio peccati, quod perfectè nunquam cognouero, nisi per veram & exquisitam passionis tuæ meditationem. Debet enim esse detestabile & execrabile malum, propter quod Pater cœlestis te suum vnicum atque dilectum Filium tantopere percussit. Vt igitur à
 pecca-

peccato præseruer, da passionem tuam amaram, quocumque me recepero, in mente habeam: quidquid agam, siue comedam, siue bibam, siue vigilem, siue dormiam, numquam benedictæ passionis tuæ obliuiscar, sed semper cogitem, ac si tecum paterer; vt sic omnes vanas passiones obliuioni tradam, quæ in me obstaculum ponerent charitati, quæ te ad hanc amarissimam passionem pertrahit, vt per hanc in amore tuo perseuerem, & tuæ benedictæ passionis particeps fiam. Amen.

PARS TERTIA.

DIcebas ad discipulos tuos: Omnes in me scandalum patiemini ista nocte. Scriptum est enim: Percutiam pastorem, & dispergentur oues gregis. Postquam autem resurrexero, præcedam vos in Galilæam. O Domine, quoties ego in te scandalizatus sum, tristitiâ & dolore me obruente? Ex charitate tribulationem & dolorem mihi immisisti, & hoc non assequebar. Ego signum iræ æstimabam, & tu paternè me visitabas. Ego me distractum arbitrabar, & tu me congregabas. Ego se-

cun-

cundum sensum me derelictum putabam, & curam mei habebas. O Domine, quoties in te scandalizatus sum, cum tua diuinæ prouidentie tam parum tribuerim? Eia Domine, sentiam, quanto me, ab initio, amore persecutus sis, & in æternum prosequi velis; & ampliùs in te non scandalizabor, sed in omnibus quomodocumque mecum egeris, contentus erò. Nos enim pars tui sumus, cum sis caput omnium nostrum. Quomodo scandalizabor aliqua re, quæ mihi eueniat, cum nihil mihi accidere possit, nisi per te, qui es caput, cum quo omnia membra concordare habent? Verum, amantissime, Pater, membro fragiliori aliquantulum indulgendum. Intuere igitur infirmitatem meam, & conforta me, vt te in omnibus sequar. Respice meam intolerabilem insipientiam, & da gratiam discernendi omnia quæ mihi eueniant, ne vmquam tentationes pro tua diuina inspiratione acceperem. Nam ex hoc supra modum deciperer, mihiq; ipsi scandalum mouerem. O igitur Domine, asta mihi, & custodi me, vt tecum in

tenta-

tentationibus permaneam, nec aliud solatium quàm teipsum quæram, quò semper tecum sim & maneam in perpetuum. Amen.

PARS QUARTA.

Dicebas Domine discipulis, quòd sicut oues gregis essent dispergendi. Heu quoties sensus mei disperguntur, huc illucque me discurrente, ac nesciente vbi meipsum tandem inuenire debeam. Eia mellitissime sponse, qui discipulis tuis promisti quòd te post resurrectionem tuam viderent, manifesta etiam teipsum mihi, quò post omnes tentationes tibi repræsentatus, iterùm cōfortari & solatium percipere merear. Non sinas me ire post concupiscentias meas, ac si sensu communi carerem, nec præualeant aduersum me phantasmata, in varia sensus distrahentia: sed secundùm rationis iudicium vitam meam instituam, quò ad te respiciens, vestigiis tuis semper inhæream. Et si præuideris in me, sicuti in discipulis, distractionem, non sit mihi in damnationem: verùm post dispersionem me recollige, & post passionem

sola-

solatium infunde, & omne amarum fac dulce; vt post tentationem, rerum vicissitudinem inueniam, atque te de prætèrita & obliuioni tradita miseria laudem atque glorificem, sicuti post hanc vitam futurum speramus. Quod solummodò peto, vt ibi tecum sim, vbi omnem lacrymam ab oculis meis abstergas, & non sit vltra neque mors, neque clamor, sed tu verus Agnus, qui in medio throni es, regas nos, & ducas ad vitæ fontes aquarum: in te est omne refrigerium & confortatio, tu gaudium & solatium animæ & corporis. Hoc vnum oro charissime sponse, vt sic perpetuò in Galilæa, hoc est post hanc vitâ, te iterum videam, & gaudeat cor meum, & gaudium meum nemo à me tollat. Amen.

Quarta MEDITATIO, quòd DOMINVS appropinquauit loco orationis in horto.

PARS PRIMA.

O Domine, conferens cum discipulis tuis de passione, venisti ad villam quæ dicitur Gethsema-

ma-

mani; vbi erat hortus, in quem introisti cum discipulis, non vt te absconderes, sed vt à discipulo traditore inuenireris. Sciebat enim (*Luc. 18.*) locū, quòd frequenter conuenires illuc cum discipulis tuis. Eia Domine largire gratiam, ne pati subterfugiam; sed cum patientia cuncta de manu tua accipiam, sicuti tu libenter admodum, & parato animo passionem tuam pro nobis assumpsisti. Sed heu ego subterfugio labores quoad possum, quia sensuū appetitui satisfacere nequeo: video quòd displicet, & emendare non valeo: & si pro arbitrio corrigere possem, forsitan cristas erigerem, & volens omnia fieri ex animi sententia, putarem me aliquid esse. Et quid est quòd ego pati subterfugio, cum tu tam parato animo passionem pro me aggressus es, recipiens te ad locum vbi ab hoste inueniri volebas? Eia Domine, sum tam aeger & infirmus, quòd passioni obuiam procedere nequeam; da saltem à te immissam patienti animo accipiam, & perferam ex charitate, diligendo illum qui mihi tribulationem & dolorē infert, vt ipse etiam

edo-

edoctus patientia mea, tandem ad meliorem frugem sese recipiat; quò posteaquam alter alterum satis superque exercuerimus, tandem ad vnum omnes saluemur, Amen.

P A R S S E C U N D A.

POsteà dixisti discipulis tuis: (*Matthai 26.*) Sedete hîc donec vadam illuc & orem. Eia Domine, tribue mihi indies sedere, quò in vera pace spiritus, omnem aduersitatem transire sinam, & quàm diligentissimè ad influxum tuæ diuinæ gratiæ recipiendum me præparem, Infunde mihi orationem tibi gratam, qua muniar, ne vlla tentatione vincar, sed per triumphû victoriæ omnes inimicos meos despiciam, Imò, si sedendo me quieti dem, fiam sedatus, & cum intellectu omnia discernam, nec subito exandescam, si quid cōtrarium mihi eueniat; & ex corde hoc acceptem, quo meipsum pariter & proximum pacatum reddam. Nullus equidem tam perfectus, quin facilè aliquid in medium adferat, quod alium quempiam perturbet. Quidquid igitur alteri alicui quandoq, improuidè facio, hoc liben-

ter ac prouidè ab alio perferam. Verùm ad hoc mihi oratio necessaria. Nam spiritus maligni circumeunt nos homines, & ad omne malum prouocant: quibus si resistere velimus, gratia tua opus habemus, Moueas igitur spiritum, & regas intellectum, vt passim, quidquid etiam mihi eueniat, mentem meam in te eleuatam habeam; quò tu stes pro me, & pugnes contra omnes hostes, visibiles & inuisibiles, saluti animæ meæ insidiantes: atque ita sit oratio mentis meæ refugium in omnibus, vt semper pacatus & tranquillus tuo diuino nitar auxilio. Amen.

P A R S T E R T I A.

ET assumpsisti Petrum & Iacobum & Ioannem tamquam primarios discipulos, quos voluisti experiri tristitiam & miseriam, sicuti antè in monte Thabor gloriam tuæ diuinæ maiestatis gustauerant. Ita enim solebas agere cum amicis tuis intimis, vt in omnibus exercitari, modò in dulcedine charitatis, modò cum patientiæ amaritudine vestigia tua sequantur. O Domine fac me hoc ex toto corde meditari, vt in omnibus

bus tecum sum, vbicumq. te inueniam,
 siue in monte Thabor, siue in horto.
 Scio enim, quòd & mihi erit, sicut &
 tibi, si membrum tuum esse velim. Iu-
 cundum autem est mihi esse tecum in
 monte Thabor, hoc est, quando te in
 anima mea presentem inuenio, vbi trās-
 figuratus es presente Moyse & Elia, hoc
 est carne & spiritu, carne quasi mortua
 cum Moyse, & spiritu tamquam viuen-
 te cum Elia; vbi tecum est intellectus
 meus in Petro, memoria mea in Iacobo,
 & voluntas mea in Ioanne significata;
 quòd si ita dominaris mihi, optimè me-
 cum erit. Verùm sicuti hoc iucundum,
 ita & meritorium mihi erit, si tecum in
 horto inueniar, hoc est si tecum perse-
 cutionem patiar, propter te odio ha-
 bear, vel alio quouis modo in nomine
 tuo patiar, affligar, aut turber. Accipiam
 Domine vtrumque hoc beneficium de
 manu tua, & cogitem quòd semper sit
 voluntas tua, quomodocumque me-
 cum agatur. Verùm ô Domine, postea-
 quam natura mea debilis est & trepida,
 vt pati exhorrescat, adiua me, & con-
 solare me in omni difficultate, ne ym-

quam

quam in foueam desperationis incidam, sed in te semper confidam, tam in tribulatione maxima, quàm in summa quiete, & gaudio spiritus perfectissimo, Amen.

PARS QUARTA.

ET cœpisti contristari & mœstus esse, dicens: Tristis est anima mea usque ad mortem. O Domine, quis in se potest sentire, quanta hîc te inuasit tristitia & miseria? Primus dolor fuit ex formidine grauissimarum pœnarum, & mortis turpissimæ imminentis; sed terror fuit maior ex eo quòd hominem peccatorem repræsentares, pro quo pati veneras, vt ego huius tuæ maximæ tristitiæ causa fuerim. Secundus dolor fuit tædium, quo te tædebat omnium rerum in hac vita, cùm videres te planè desertum, nō ab hominibus solùm omnibus, sed à Patre quoque cælesti; qui in nullo auxilium præstabat, quin tua humanitas sola omnia perferre deberet. Quod mihi magnum solatium adfert, quando me quasi derelictum reputo. Tertius dolor tuus fuit tristitia ob peccata grauiora, quibus Iudæi in tua nece se

se

se obstringerent, ac etiam propter exiguum numerum eorum qui huius tuæ tantæ passionis essent participes, cum essent qui se indignos tua gratia facerent. Quartus dolor fuit grauis animi anxietas, dum videres nullum tibi esse effugij locum, dum hîc vrgeret iustitia Patris, illic summus amor humani generis excitaret, contrâ verò reformidaret natura, vt meritò anima tua tristaretur vsque ad mortem. Largire nunc ô Domine per hanc tuam intolerabilem tristitiam, vt omnes meos dolores & anxietates superem. Ego sum creatura fragilis, impatiens dolorum, & pœnas infinitas commerui. Eia igitur Domine, sit omnis hæc tua afflictio & tristitia pro peccatis meis: & sicut peccata mea sunt causa tuæ passionis, ita passio tua me mundet & muniat contra omnia peccata; vt ego memor harum tuarum angustiarum, omnem difficultatē temptationum & dolorum obliuioni tradam. Amen.

Quinta MEDITATIO, de oratione DOMINI in horto.

PARS PRIMA.

O Domine, benedictus sis tu in æternum, qui flexis genibus prostratus in terram, procidisti in faciem, petens ut si possibile foret, à te transiret hora ista, dicens: Abba Pater, si fieri potest, transeat à me calix iste: verumtamen non sicut ego volo, sed sicut tu vis. O Domine, in quantum me dilexisti, qui in mea persona flexisti genua, & quasi mortis reus, propter peccata mea varia procidisti in terram, ad offerendum te ipsum pro salute nostra; & simul exhibuisti, qui nos representabas, abiectum & vile genus hominum, qui indigni sumus cælum oculis intueri, sed magis ab hominibus conculcari: atque in hunc modum tu iam oppressus præ peccatorum pondere, prostratus es in terram. Ais ergo, Abba Pater: quasi diceret, Ego sum Filius, qui patiar pro foetidissimis peccatoribus, Iudæis & Gentibus; parces ne Fi-

lio

lio tuo vnigenito? Si fieri potest, scilicet salua tua diuina iustitia, transeat calix à me: verumtamen non sicut ego volo, sed sicut tu vis. O Domine, quanta in te pugna fuit, cùm caro sibi relictà ita abhorruit humanitus passionem, verum hominem demonstrans. At nolens te neque in dexteram neque sinistram inflectere, paternè te realiter subdidisti voluntati, dicens: Verumtamen non sicut ego volo, sed sicut tu vis. atque hac prolatione verborum spiritus palmam obtinuit. In hunc modum, ô Domine, commendo tibi omnem meam difficultatem: si placet, aufer à me; verumtamen non quod ego volo, sed quod tu vis. asta mihi, da gratiam portandi crucem meam ad gloriam nominis tui summam, & animæ meæ salutem, & fiat voluntas tua beneplacens & perfecta. Amen.

P A R S S E C V N D A.

HVius pugnae triumpho iam celebrato surrexisti, & ad discipulos, quos orandi causa reliqueras, rediisti. Non te ita absorbere potuit tua passio, vt discipulorum obliuione tenereris,

quin surrexeris ab alta contemplatione, & discipulis aliquid solatij impartieris. Ad hunc modum, Domine, in dextera Dei sedens noli obliuisci miseriæ ac tristitiæ meæ, vide quàm miser & desolatus quandoque sum, ac si in obliuione essem apud te, & ad orationem meam non respiceres. Noli mihi ô misericors Domine esse formidini: sed sicuti in propria afflictione, mœrētium discipulorum recordatus es; ita iam in gloria Patris ad dexteram constitutus, noli obliuisci mei, sed adesto mihi, ne sine tuo solatio inueniar. Nam sine tuo auxilio in tribulationibus meis perseuerare nequeo. Verùm enim uerò inueniebas discipulos tuos dormientes, & dicebas Petro: Simon dormis? ac deinde ad alios: Non potuistis vna hora vigilare mecum? Vigilate & orate, vt non intretis in tēnationem. O quantopere hoc opus habeo! Nam multi sunt hostes visibiles & inuisibiles qui me assiduè persequuntur, & contra hos omnes oratio mihi necessaria: quia sine te nihil possum. Sed singulariter contra diaboli insidias oratione opus habemus, ne ille

præ-

preualeat aduersum nos, neve in desperationem nos adigat. Sed præter orationem, cōtra carnem etiam vigilare oportet, quò vires eius tempestiuè infringamus, ne tandem cristas erigens nobis dominetur. Eia igitur, Domine, da gnauiter semper tecum vigilem, & feropem ne vñquam obdormiam. Sed si omnia mea somnum quandoque capiant, semper tamen mens mea & intellectus tecum vigilent. Amen.

P A R S T E R T I A.

POsteaquam iam, amantissime Domine, discipulos tuos hac admonitione & exemplo instruxisses, iterum ad orationis locum rediisti, dicens: Pater si vis, transfer calicem istum à me; verumtamen non mea voluntas, sed tua fiat. Et quamuis hīc non videaris exaudiri, tamen ex æquo cum Patre tuo cælesti conuenisti, ei omnia tua commendans. Ad hunc modum piissime Domine largire gratiam, ne tibi vñquam in oratione modum præscribam, sed per omnia me resignem, sicuti tu te Patri tuo cælesti resignasti: & cū orandum mihi fuerit, da diligenter expendam,

quid orem, & orem cum summa humilitate, sed tandem totum me tuæ diuinę prouidentię committam. Quamtuuis honestum, vtile, aut necessarium secundum hominẽ precatus fuero, nunquam tamen negligam voluntatem meam tuæ sanctissimę voluntati conformare, dicendo: Fiat voluntas tua. Hac oratione peracta, rursus ad discipulos rediens, inuenisti eos dormientes. Erant enim oculi eorũ grauati, vt ignorarent quid responderent tibi. cogitabāt enim: Iam antè inuenit nos dormientes, & redarguit nos, quid iam in excusationem prætereundum poterimus? Ita ô Domine sepius mecum agitur: ego vno die, imò vna hora frequenter te ad iram prouoco dormiendo, dum meipsum oblitus inuehor in proximum, vt postea ad me rediens, non habeam quid dicam, nisi quod mea sit culpa. Eia Domine agnoscam hoc, ne vnumquam infirmitatem meam excusationem habeam. Sed non iam reprehendisti eos, vti supra, tamquam ad suscipiendam correctionem inhabiles. Da etiam mihi Domine, vt proximũ meum

in

in infirmitate supportem, & singulariter meipsum; ne si quando lapsus fuero, incōsolabiliter meipsum prosternam, sed omnem spem meam in te colloceam, vt si cecidero, resurgam. Non enim vis mortem peccatoris, sed magis vt conuertatur & viuatur. Cū igitur citra tuam gratiam (quæ tamen nemini petenti negatur) emendationem inuenire nequeam, concede, vt proiciam me in te, & faciam quod in me est, donec tempus adueniat quo me oculis tuæ misericordiæ cum Maria Magdalena respicias. Hoc oro Domine manè & vespere, & orabo sine intermissione quoad viuam; nihil dubitans de tua diuina bonitate, quin, si in hac vita consequi dignus non fuero, saltem in hora mortis mihi quod peto dederis: & hoc fiat, ne in perpetuum à te separari contingat. Amen.

P A R S Q V A R T A.

Post hæc ad orationem rediens, dixisti? Pater mi, si non potest calix transire à me, nisi bibam illum, fiat voluntas tua. & hoc verbo totum te resignasti, & simul mente attraxisti totum benedictæ passionis tuæ cursum, sicuti

postea pro me pati dignatus es. Et apparuit tibi Angelus de cælo confortans te (*Luc. 22.*) ne ab inchoatæ redemptionis nostræ opere nobilissimo desisteres, nisi consummares illud. Hoc autem factum est non impellente aliqua necessitate, quippe cum alacri animo, & voluntariè planè hoc perageres: sed propter nos hoc fieri voluit Pater cælestis, ne in nostris pœnis desperemus, verum Angelorum solatium nobis semper adesse speremus. Cum autem perseverares in oratione, & instantem passionem, quò diutius, eò acrius in te traheres, factus es quasi in agonia, & sudor tuus sicut guttæ sanguinis decurrentes in terram. Accede nunc, ô anima mea, & quale hîc coram te positum compassionis incentivum, attentissimè considera. Redemptorem tuum, Regem cælorum orantem, paudentem, agonizantem, sanguinem sudantem, mentis oculo contemplare; non tamen sine profluvio lacrymarum. Quomodo enim, ô anima, lacrymas continere valebis, aspiciens piissimi Domini sponsi tui guttas sanguinis decurrentes in terram?

Cerne

Cerne diligenter Iesum totius suauitatis fontem, pallentem facie, genibus flexum, tremmentem corpore, corde verò mœrore trāsfixum, vultu rubicundum sudore sanguineo, & iuxtà Angelum eundem confortantem: compati, gemere, flere, vlulare ne cesses. O Domine, quanta lateat in corde tuo tristitia, ex vultus madefactione cognoscitur; quā intolerabilis fuerit passio, ex sudoris qualitate colligere est, cū non aquam, sed sanguinem sudasti. Porro, si ex sola passionis consideratione tua pænè defecit vita, quid in ipso crucis fuit supplicio? Si in certaminis tui principio tantopere præualuit mœror; alapæ, conuitia, flagella, acetum, fel, arundo, sputa, clauī, quid doloris non attulerunt? O Domine, per hanc diram passionem adesse dignare mihi in omni necessitate, tentatione, & tribulatione, & non finas me ab oratione sine tuo solatio vñquam recedere; sed trahe me in te, vt semper tibi conformari merear, nunc in passione, & postea in gloria. Amen.

FERIA TERTIA.

Prima MEDITATIO, quomodo DOMINVS hostibus appropinquantibus obuiam processerit.

PARS PRIMA.



BENEDICTVS & laudabilis es Domine in sæcula, qui tam parato animo, ac voluntariè te ipsum propter nos in manus hostium tradidisti. Nam postquam tertio orasses Patrem, ex animi magnitudine, ex reiectione pauoris surrexisti iam ab oratione, & veniens ad discipulos, inuenisti eos dormientes, & dixisti: Dormite iam, & requiescite: sufficit. Ecce venit hora, & Filius hominis tradetur in manus peccatorum: surgite, eamus. ecce appropinquat qui me tradet. Tibi Domine nihil est absconditum, qui omnia nosti, antequam fiant. Quare hæc discipulis prædixisti? vt se ad instātem passionem præpararent. Hinc dicebas: Dormite iam, & requiescite: hoc est, conuertimini ad

. VOS

vos ipsos, discite primùm superare proprios defectus, quàm ad aliorum infirmitates perferendas exeatis. Intrate vos ipsos & præparate animos vestros, vt fortes efficiamini, ad hostes debellandos, & prudentes ad pericula euadenda. His omnibus, ô Domine, ego indigeo. Da ergo gratiam, vt quotidie me ipsum ingrediar, & sim magis paratus ad propria quàm aliorum vitia castiganda. Numquam prodeam in publicum, nisi cor & sensus pacatos habeam ad omnes huius sæculi perturbationes, tentationes & tribulationes imperterrita patientia perferendas, paratus etiam ad tolerandum patienter omnia, quæ mihi euenire possint. Amen.

P A R S S E C U N D A.

TE adhuc loquente verba hæc, Domine, ecce Iudas vnus de duodecim, & cum eo turba multa, à Pontificibus & Pharisæis missi, venerunt illuc cum lanternis, facibus & armis. Et Iudas dedit eis signum, dicens: Quemcumque osculatus fuero, ipse est, tenete eum, & ducite cautè. Et confestim te accedens, ait: Aue Rabbi. & tu conuer-

sus ad eum, dicebas: Amice, ad quid venisti: ille propius accedens, te vitæ Auctorem ad mortem osculatus est: & dicebas ei: O Iuda, osculo Filium hominis tradis? Hac voce percussus traditor, parumper recessit, quatenus armatis militibus circumuentionis locum daret. Tu verò horum nihil veritus, tamquam bellator robustissimus, & Christianæ militiæ insuperabilis dux, iis qui te detinere veniebant procedens obuiam, dixisti: Quem quæritis? Et illi responderunt: Iesum Nazarenum. Quibus dixisti: Ego sum. Vt ergo dixisti; Ego sum; abierunt retrorsum & ceciderunt in terram. Fulgorem siquidem æternæ claritatis sustinere non valentes, à tuo lumine reperiussi, & diuinæ vocis tonitruo territi, retrorsum ceciderunt more impiorum. Tunc si voluisses, occultare te potuisses, & manus eorum euadere: imò ad instar Eliæ potuisses mādare, vt ignis descendisset de cælo, qui eos deuorasset, sicut Elias Quinquagenarium cum suis quinquaginta occidit. Sed non veneras occidere, verum saluare; nolebas potestate pugnare, sed humilitate vincere,

atque

atque fortitudinis tolerantiam superare. Eia Domine , da ut ego hæc omnia traham ad meipsum, quod ab operibus tuis & passione exemplum sumam . Traditus es à proprio discipulo , cui multam gratiam præstiteras, & patienter tulisti. Ne igitur ego respiciam ad ullum hominem, qui me iniuria afficiat , verum cogitem , quod quo mihi propinquior fuerit , & plura à me perceperit beneficia, eò passio mea perfectior & tuæ passioni conformior fuerit. Da ergo, ut tuo exemplo edoctus bene afficiar erga inimicos, & magis ipsis qui se pessime habent, quàm mihi ipsi compatiar ; ut aliquando ad meliorem mentem redeuntes , culpam suam agnoscant . Verum sicuti hosti obviam processisti , ut patientia & humilitate eum vinceret ; ita & ego gaudium existimem , si quando patientiam aliquid sufferre habeam , & me omnium minimum reputem. Nam tuo exemplo disco perfectionem in compositam esse , ut, si quis hostem habeat in manu sua, parcat ipsi , imò etiam obsequium humanitatis illi præstet . Hæc tu Dominus meus & Deus meus egisti,

quando aurem à Petro abscissam Malco restituiſti, & attactu ſanaſti.

P A R S . T E R T I A .

PRoſtratos iam diuina potentia hoſtes ſurgere feciſti, vt libera, ſi velent credere, eſſet eorum confeſſio. quibus denuò dixiſti : Quem quæritis ? Et illi dixerunt : Ieſum Nazarenum. Miſeri illi homines iam ad cor rediſſent per hoc miraculum, & credentes cum Paulo dixiſſent : Domine, quid me vis facere ? Sed vocem tuam non audierūt, quia non erant de ouibus tuis. Erant lupi rapaces, & ſitiebant ſanguinem agni innocentis. Sitiebant quidem, ſed non niſi permiſſi bibere valebāt. Expectabant à te licentiam, vt raperent, crucifigerent, occiderent, & biberent. Quia autem hæc omnia pati veneras, audierunt : Dixi vobis, quia ego ſum . Si ergo me quæritis, ſinite hos abire . O Domine, quàm promptus & paratus, præſcius omnium, teipſum pro nobis in mortem tradidiſti. Inimici tui erant planè excæcati; & tu ex obedientia Patris, in omni contumelia, tormentis, & pœnis perfe-
rendis, illis es obſecutus : ſed diſcipulis
peper-

pepercisti. Te quidem obtulisti, verum illos illæsos abire fecisti. Noueras quippe ad tolerandas passiones, ipsos adhuc minùs esse idoneos. Distulisti ad tempus, quoadusq. habiles fierent: quemadmodum nutrix circa infantis curam materno vigilat affectu, donec educatus validior fiat. tunc & ipsa, quem priùs fouebat gremio, exercet laboribus, & ad mundi perferenda mala non parcit. Hinc dicebas: Si ergo me quæritis, sinite hos abire. Eia Domine, da mihi, vt tibi in omnibus obediam: nec respiciam ad proximos, qui me per iniuriam contristant; sed ad tuam immensam charitatem, ex qua tribulationem mihi immisisti: sic gratiam tuam in me agnoscam præ omnibus excæcatis, qui tibi in mea vocatione quotidie contradicunt; ac illis magis compatiar, quàm meipsum contristem. Verum sicuti pepercisti discipulis, tamquam adhuc ad passionem imparatis: ita benignus intueri meam infirmitatem; & supple tua diuina gratia, quod in me desideratur. Amen.

PARS QUARTA.

DIcebas : Si me quæritis, finite hos abire. O Domine, quantam erga nos ostendisti charitatem, quando solus pati, & nullum hominem tua de causa affligi voluisti, qui passione tua temporali nos ab æterna liberare decreuisti; non quòd nos sine tribulatione & dolore huius præsentis vitæ pelagus enauigaremus, sed exemplum nobis dedisti, vt sequamur vestigia tua; verum suo tempore. Vnde colligimus tuam diuinam omnipotentiam cum prouidentia coniunctam, qui pro tuo beneplacito nos à tribulatione malorum & dolorum præseruas, & quando placuerit, nobis immittis; sed tunc, quando pro tui nominis gloria nobis saluberrimum duxeris. Hinc discipulis, adhuc pavidis & infirmis, tamquam pueris pepercisti, vsque dum per Spiritum sanctum confortati, ad decertandum impauidi essent. Tunc enim ad omnem persecutionem paratos exercuisti. Qui enim antè te negauerunt, & ex hostium manibus resilierunt, post gauisi sunt, quòd pro nomine tuo con-

tume-

tumeliam pati digni inuenirentur. Ad hunc modum etiam mecum age clementissime Pater, respice infirmitatem meam, & habere mecum patientiam, ne umquam aduersitatibus frangar. Intuerre fragilitatis meae conditionem, & visita me in tempore opportuno, quo praesentia sancti Spiritus satis fortem, & ad pugnandum intrepidum me cognoueris; tunc crux & dolor me inueniat, ut gloriosum & sanctum nomen tuum per me semper praedicetur, tam in infirmitate, dum mihi parcis, quam in fortitudine, dum tua diuina gratia patientiam & robur experior, ac fortis in bello inuenior. Sic tamquam cum prole tua age mecum misericordissime Pater, ut tecum sim & maneam in perpetuum. Amen.

*Secunda MEDITATIO, de
DOMINI captiuitate.*

PARS PRIMA.

CUm iam dixisses Domine: Si ergo me quaeritis, sinite hos abire: manus tibi iniecerunt, & addu-

adduxerunt ad Annam primùm, qui erat socer Caiphæ, Pontificis anni illius, & morabatur in via. At quāta cum difficultate, labore, & dolore hoc peractum est? Inuaserunt te tamquam lupi rapaces (iam enim potestatem in te acceperant, cū diceres: Hæc est hora vestra, & potestas tenebrarum.) & partim te crinibus apprehenderunt, partim verò barba benedicta traxerunt, & tamquam bouem te humi prostrauerunt: restibus te constrinxerunt, & tenerrima membra tua quā crudelissimè colligarunt, vt pretiosus sanguis ex vnguib; sacris erumperet; & sic pertraxerunt te, alius huc, alius illuc, vt humanitus nescires, quem sequi deberes, dum sæpiùs in terram prosternereris. Postea festinanter cucurrerunt, & percutientes te afflixerunt: clamoribus variis præ gaudio vociferati sunt, non secus, quā si feram intercepissent, aut prædam attulissent; imò tam dirè tractarunt te, ac si nō Filius Dei, sed mortalium omnium sceleratissimus fuisses. Eia Domine, imprime hæc ita cordi meo, vt quotidie in omni aduersitate
mea

mea horum recorder, cogitans me hæc omnia promeruisse, cum tamen nihil simile mihi inferatur. Sit igitur hæc tua miseria mihi doctrina, qua humilitatem mihi familiarem faciam, ad abnegandum meipsum in omnibus, quò me dignum iniuria æstimem, vnde-
cumque etiam mihi adueniat.

PARS SECVNDA.

O Domine Iesu Christe, ductus iam ad Annam summum sacerdotem, non composuisti argumenta, non aspera locutus es, non protulisti blanda, vt iudicatis flecteres animum; sed quod prudentiæ erat, quod virtutis, quod gloriæ. De discipulis enim & doctrina interroganti, non respondisti ad discipulos; ne malum de ipsis diceres, cum bonum dicendum non haberes. Sed ad doctrinam prudenter admodum respondisti, dicens: Ego palàm locutus sum mundo, ego semper docui in synagoga, & in templo quò omnes Iudæi conueniunt, & in occulto locutus sum nihil. Quid me interrogas? interroga eos qui audierunt quid locutus sim ipsis: ecce hi sciunt, quæ dixerim
ego.

ego. O quàm bonam causam, agebas Domine, quando etiam hostes tuos adhibuisti, vt doctrinæ tuæ ferrent testimonium. Ambages profectò non quæris, sed omnibus cupis innotescere. Da mihi ô Domine hoc tuum exemplum imitari: quòd caueam mihi ab omni detractiōe; & respiciens ad meipsum, pro ratione meæ fragilitatis, cum proximi infirmitate condescendam. Si quid de me dicatur, quo famæ detrahi posset, da mihi patientiam. Sed si defensionis locus datur, respondeam tam humiliter pro mea excusatione, vt etiam ab hostibus meis veritatem audire non subterfugiam. Amen.

PARS TERTIA.

CUm tam humiliter hostes in testes vocares, & præter veritatem nihil affectares, vnus ministroꝝ dedit tibi alapam, dicens: Sic respondes Pontifici? Hic fuit vnus ministrorum Pontificis, qui missi vt caperent te in sermone & apprehenderent (*Ioan. 7.*) Sed reuersi & interrogati quare te non adduxissent, respōderunt: Numquam sic locutus est homo, sicut hic homo. Propter quod,
odium

odium dominorum suorū incurrerunt. Verūm vnus illorum videns iam totum mundum tibi aduersari, in feliciorē (vt putabat) sese inclinauit parietem, & vt in domini sui gratiam rediret, alapam tibi infregit, dicens: Sic respondes Pontifici? ac si malè locutus fuisses. O quanta hæc erat percussio, quæ facta est armata manu, qua reuersus ab itinere captiuitatis tuæ percussit te tam acriter, vt cum terræ motu te prosterneret, & pretiosus sanguis ex ore & naribus proflueret. Sed propter me, Dñe, hanc alapam pertulisti, vt semel corporaliter perferres, quod toties in spiritu à nobis pateris. Quotiescumque enim murmuro contra tuam diuinam iustitiam, aliud volens quàm tu, hanc alapam tibi impingo. Eia, Domine, per hæc diram alapam remitte mihi omnia peccata, quæcumque humana fragilitate cominisi.

PARS QUARTA.

Sed respondebas: Si malè dixi, testimonium perhibe de malo; si autem benè, quid me cædis? O piissime Domine, quoniam in virtutis ostensione singulorum profectum quærebas, ala-

pam

pam hanc voluntariè suscipere non expauisti, neque declinasti cùm potuisses, sed spontè ferienti genas exposuisti. Verùm non alteram præbuiisti maxillam secundùm doctrinam antè datam, & hoc ad instructionē nostram. Aliam vtique maxillam, si voluisses, potuisses præbere; sed maluisti respondendo insinuare mysterium, quàm faciem exhibendo demonstrare virtutem. Volebas enim hac tua sapientia nos docere, ne vlli mortaliū peccandi occasionem daremus. Verùm si quis nos vlteriùs percutere velit, alteram potiùs præberemus maxillam, quàm de proximo vindictam sumi peteremus. Vtrumque tamen sapientissimè egisti, nunc quidem mysterium sapientiæ, postea autem documentum præbendo patientiæ. Poteras ne offerre genas, qui totum corpus postea exposuisti? Omnino. Largire igitur mihi donum sapientiæ & scientiæ, vt sciam quando & vbi mihi loquendum, & silendum; an patientia necessaria, vel excusatio aliquādo prætendenda; vt in omnibus me tibi conformem, & in nullo resistam. Amen.

Tertia

Tertia MEDITATIO, de passione DOMINI in domo Caipha.

PARS PRIMA.

HIs iam peractis, misit te Annas vesperi serò ligatum ad Caipham, qui erat Pontifex anni illius. Hic de nouo tecum festinanter currunt, huc illucque trahentes. Omnem tibi mouerunt difficultatem, non obstante eo, quòd tam miserabiliter in domo Annæ tractatus esses. Et hæc non erant admiranda. Nam plenariam iam nacti erant in te potestatem, quòd pro peccatis nostris patereris & satisfaceres, cum nostra sint peccata, quæ per malignos Iudæos hanc tibi miseriam intulerunt. Illi gaudebant, quòd per contumeliam tibi illatam impijs sacerdotibus placerent, vbi tu supra modum contristatus, nullum tibi propitium haberes. Eia Domine, concipiam ex hoc animum, quòd in omni tribulatione mea solatium inueniam; singulariter, quando meipsum ita desolatum inuenio, ut nec in cælo, nec in terra refrigerij se-
dem

dem reperiam. Da, tunc contra spem in spem cum Abraham credam, non dubitans, quin tandem hisce dederis finem, hîc, aut in futuro: sicuti tu aliud solatium non habuisti, quàm spem resurrectionis, qua frustrari non potuisti.

P A R S S E C U N D A.

CUM ad Caipham Pontificem adductus esses, summi Sacerdotes, & omne concilium quærebant aduersum te testimonium, vt te morti traderent. Falsidicorum vtique petebant suffragium, vt ad mortem damnarent vitam, ne ipsi viuerent in æternum. Vicissim cōtendebant, vt candorem æternæ lucis suis obnubilarent tenebris. Fiebat autem, vt quò sollicitiùs inuestigarent, eò in depressioribus ipsi tenebris remanerent, perseverante in suo splendore te Veritate incommutabili. Tandem cùm plurimas finxissent oppositiones, venerunt duo falsi testes, & dixerunt: Quoniam nos audiuius eum dicentem; Possum destruere hoc templum manufactum, & in triduo aliud non manufactum reædificare. quod in medium attulerunt, ac si con-

tra

tra templum locutus fuisses; cum non de templo exteriori siue materiali, sed de templo corporis tui, quod in cruce dissolutum, tertio die per resurrectionem reparasti, locutus esses. Vnde Scriptura addit: Et non erat conueniens testimonium illorum: vt faciliè intelligamus, quàm malitiosè te obruere conati sint, vbi ex animi amaritudine non considerarèt quomodo tecum agerent, modò te morti traderent; quod dolores tuos non parum auxit. Nam quò irrationabiliùs quis obruitur vi publica, & iniuria manifesta, omni destitutus auxilio, eo maiori dolore affligitur. Da ergo Domine gratiam, ne attendam vnde dolor & afflictio mihi proueniat, aut quæ miseria me inuadat, sed in omni tribulatione & dolore ad te respiciam, qui vis quandoque me tam irrationabiliter obrui, vt patientiam meam probatam reddas. Amen.

P A R S T E R T I A.

CUm autem ad hæc non responderes, surgens in medium summus sacerdos, interrogauit te, dicens: Non respondes quidquam ad ea, quæ tibi

D

ob-

obiiciuntur ab his? Et hoc dixit, vt te ad loquendum prouocaret, & ex ore tuo aliquid audirent, quò te morti traderent. Verùm tacuisti, & non respondiſti vllum verbum. In tacentis quippe lingua nil reperitur indignum. Rurſum ſummus ſacerdos interrogauit te, dicens: Tu es Chriſtus Filius Dei benedictus? Adiuro te per Deum viuum, vt dicas nobis, ſi tu es Chriſtus Filius Dei, Hæc malignus homo ſolummodò interrogauit, vt ex ore tuo te iudicaret. Sed tu ſumma Veritas, vt nos tuo exemplo informares, ad hæc ſilere nolens, dicebas: Tu dixiſti. Verumtamen dico vobis, amodò videbitis Filium hominis ſedentem à dextris virtutis Dei, & venientem in nubibus cæli, Quibus verbis ineffabilem declaravi claritatem, quam in die Aſcenſionis tuæ nactus es, & in nouiſſimo die toti mundo aperies. Prioris etiam poſtea admonuit eos ſanctus Stephanus, cùm diceret: Video cælos apertos, & Ieſum ſtantem à dextris Dei. De ſecundo paulò antè locutus fueras diſcipulis, vt Pontifex ille meritò ad iſta verba expauereſceret.

Sed.

Sed totus excæcatus, scidit vestimenta sua, dicens (nam eius dominatio secundum verus Testamentum iam finem habebat) Blasphemavit, quid adhuc egemus testibus? Ecce iam audistis blasphemiam, quid vobis videtur? Qui omnes condemnabāt te reum esse mortis: ex quo statim te Pontio Pilato Præsidi tradidissent, nisi intempesta nox fuisset. Viri ergo illi, qui te huc illucque traxerant, iam defatigati dederunt se quieti, & novi recentesque in eorum locum successerunt. Quanta autem illa nocte perpeffus es, nulla lingua eloqui poterit. Viri enim illi, qui tenebant te, illudebant tibi, & expuebant in faciem tuam, & colaphis te cædebant, & palmas in faciem tuam dabant. Imò cū inter has contumelias amicabilem vultum tuum perferre non possent, velarunt faciem tuam, dicentes: Prophetiza nobis Christe, quis est qui te percussit? & alia multa in te blasphemantes dicebant. O Domine, quā duri fuerunt tibi aduersarij! quomodo te affligerunt! Fuere quippe ex ipsis, qui calcibus te Dominum meum pessumdātes, scapu-

las, os, omne corpus liuoribus compleuerunt. Inter ipsos ille beator, illeque præstantior habebatur, qui in contumeliis irrogandis, infligendisque verberibus crudelior inueniebatur. Flete nunc oculi mei, & flumina emittite lacrymarum in hoc tam crudeli horrendoque spectaculo. Maxima namque & inaudita coram vobis plorandi est oblata materia, si tamen quæ geruntur peruigili consideratione aspiciatis. Poterit ne quis se continere, cum Regem gloriæ, vitæ auctorem, Dominum Maiestatis, atque hominum redemptorem viderit conspui, facie velari, alapis cædi à gehennæ filiis, à peccatoribus alapis verberari, ab elatis irrideri, iniuriari ab inimicis, atque à corde pollutis multipliciter blasphemari? Lugete quantum potestis, numquam sufficietis vel minimam partem iniuriarum lacrymis assequi. Plus enim quam triennio sitierant, quod illis nunc permittebatur implere.

PARS QUARTA.

MAnè autem factò, ô Domine, consilium inierunt omnes principes

cipes sacerdotum & seniores populi, vte morti traderent, & duxerunt in concilium suum, dicentes: Si tu es Christus, dic nobis. & dicebas: Si vobis dixerero, non credetis: si autem & interrogauero vos, non respondebitis mihi, ne dimitteretis. Ex hoc autem erit Filius hominis sedens à dextris virtutis Dei. Dixerunt autem omnes: Tu ergo es Filius Dei? & dicebas: Vos dicitis. O Domine, quàm fortiter omnia tibi illata pertulisti, quantopere teipsum abnegasti propter nos, vt nos abnegantes nos ipsos, tuo exemplo peccati occasionem deuitemus. Tu omnia tibi euentura præsciuiſti, ac proinde nihil incassum perferre voluisti. Iam enim tempus aduenerat secundùm propositum diuinæ voluntatis, vt pati & mori te oporteret pro nobis omnibus, & non diſmittere. Sed quod gloriam Patris cælestis concernebat, reticere nequiuiſti. Quare dum omnes simul interrogarent, dicentes: Tu ergo es Filius Dei? respondiſti: Vos dicitis. Et ex hoc ipso te morti tradere decreuerunt, cùm dicerent: Quid adhuc desideramus testimonium? ipsi

D 3 enim

enim audiuius de ore eius. Hinc surgens omnis multitudo eorum duxerunt te vinctum à Caipha in prætorium, & tradiderunt te Pontio Pilato Præsidi. Eia Domine, da mihi nunc in omnibus tuo exemplo habere patientiam, vt in omnibus meis difficultatibus ad Patrem cælestem respiciam, & cuncta de manu eius accipiam, quęcumque etiam mihi eueniant, quò in omni aduersitate semper pacatus & tranquillus inueniar. Amen.

*Quarta MEDITATIO, de falsis
accusatoribus coram Pilato.*

PARS PRIMA.

Surgens omnis multitudo eorum, duxerunt te vinctum à Caipha in prætorium, & tradiderunt te Pontio Pilato Præsidi. O quanta proteruia traxerunt te per viam tota iam nocte defatigatum, quàm hilares fuerunt, quantum tumultum & strepitum fecerunt? Iam namque se rerum potitos putabant, cùm accepissent potestatem tradendi te Præsidi; iam te morti destina-

tum,

tum, imò iam quasi sententiam pronuntiatam arbitrabantur. Erat autem manè cùm traderent te Pilato, & ex hypocrisis nolebant ingredi prætorium, ne contaminarentur, sed Pascha manducarent. Exiit ergo Pilatus foras ad eos, & dixit: Quam accusationem adfertis aduersus hunc hominem? Responderunt: Si non esset hic malefactor, non tibi tradidissemus eum. O hypocrisis magna, quæ non erubuit sanctitatem veram sub vmbra sanctitatis tam impiè morti tradere! Pilatus audiens tam indignam responsionem, dixit: Accipite ergo eum vos, & secundum legem vestram iudicate eum. quasi dicat: Quid ad me tam insana responsio? Tunc cœperunt accusare te summi sacerdotes in multis, dicentes: Hunc inuenimus subuertentem gentem, & prohibentem tributa dare Cæsari, & dicentem se Christum Regem esse. Quæ tria tam impiè sunt excogitata, quàm falsò tibi imposita. Non enim tu Verbum Dei in carne veneras, vt à via veritatis homines subuerteres, sed vt subuerfos ad vitam reuocares. Quod prouidens Propheta,

in spiritu exultans ait: Deo nostro sit iucunda decoraque laudatio. Ædificans Ierusalem Dominus, dispersiones Israelis congregabit. Sicur & Caiphas (*Ioan. 11.*) ignoranter prophetauerat, dicens: Expedit vobis, vt vnus homo moriatur pro populo, & non tota gens pereat. Quòd autem prohibuisses censum dare Cæsari, falsissimum est. Tu namque (*Matth. 17.*) mandasti Petro, vt pro se & te tributum daret. & aliàs dixisti: Date quæ sunt Cæsaris Cæsari, & quæ sunt Dei Deo. Vnde mentita est Iudæorum iniquitas sibi, aduersus veritatem testificantium iniqua. Oberrauerunt Pontifices à vero intentione nocendi, opposcentes mendacia veritati, nedum in soluendo tributum, verùm etiam in regia potestate, quam te ambire dicebant. Numquam enim in corde te extulisti, nec inanibus verbis hominum fauorem captasti, sed docebas humilitatem; sæculi pompam, operibus & sermone insinuabas populis esse fugiendam. Cùm enim turbæ vellent te constituere regem, aufugiens latuisti. In cunctis igitur elucet conspicuè sacer-

dotes

dotes contra te esse mentitos. Tu igitur ô Domine tam falsò accusatus es, & tulisti patienter: cur nos excandescere volumus, si per iniustitiam famæ nostræ detrahatur? Eia, Domine, da mihi tuo exemplo veram humilitatem, qua cuncta libenter perferam propter nomen tuum, qui tanta patientia pro me hæc perferre dignatus es.

P A R S S E C U N D A.

Pilatus hisce auditis in prætorium ingressus est, & vocans te, dixit: Tu es rex Iudæorum? & respondebas, dicens: A temetipso hoc dicis, an alij tibi dixerunt de me? quasi diceres: Rem acutegisti, & beatus qui de me cognitionem habet. Pilatus autem singulariter hanc mouit quæstionem, ceteris omis- sis: hæc enim ipsum concernebat. Ne igitur perderet, aut tibi aut alicui alteri communicaret, quo solus gaudere cupiebat, quærit an sis Rex, cogitans hoc non esse pro se, qui tamquam Præses hîc à Romano imperio constitutus erat. Nam cùm carnalis esset, non nisi carnalia sapiebat. Vnde reiecta grauitate, prorumpens in vocẽ, aiebat: Num-

D 5 . quid

quid ego Iudeus sum? Gens tua & Pontifices tui tradiderunt te mihi, quid fecisti? Insipientiam paucis verbis magnā ostendit. Non enim propter astantium notam, neque ob præfectoriam dignitatem, animi sui immoderatū compescuit motum. Eia Domine, si te intrinsecus solatio destitutum, etiam extrinsecus ita obruerunt, & patienter tulisti; quid me volo affligere, si interiūs passionibus ingruentibus, exteriūs perturbor? Da quæso gratiam, ut in omni tribulatione mea, ad tuam passionem respiciens solatium merear. Amen.

PARS TERTIA.

NE autem almæ sapientiæ tuæ regnum carnaliter cogitetur, humiliter respondisti: Regnum meum non est de hoc mundo. Si enim ex hoc mundo esset regnum meum, ministri mei utique decertarent, ut non traderer Iudæis. Nunc autem regnum meum non est hinc. Tu quidem es æterna Sapientia regnans in hoc mundo, sed regnum non habes ab hoc mundo. Regnum enim huius mundi finem habet, sed numquam erit finis regni tui; quod

tunc

tunc primum in oculis nostris perfectum erit, quando hic mundus finem habuerit. Si regnum tuum esset de hoc mundo, ministri tui utique pro te pugnarent, ne Iudæis tradereris. sed iam regnum tuum non est hinc, verum de cælis. Da ô Domine hoc intelligam, ne ullam mundi gloriam, aut carnis delicias quæram, sed solum virtuti intendam, cogitans me tunc regnare, quando in humilitate, patientia, mansuetudine, & ceteris virtutibus me exercuero. Verum non finas me incidere in desperationis foueam, si quando hæc mihi ex animi sententia non succedant, sed habeam tecum patientiam, & sperem me hoc consecuturum, si non hodie, saltem cras, vel quando tibi placuerit: interim ad omne opus bonum suspirem. dicit Pilatus: Ergo Rex es tu? citra intellectum hîc distinctionem fecit. Verum respondere non es dedignatus, dicens: Tu dicis quia Rex sum ego. Ego in hoc natus sum, & ad hoc veni in mundum, ut testimonium perhibeam veritati. Omnis qui ex veritate est, audit vocem meam. Da

ô Domine, vt hoc in me sentiam, vt vocem tuam audiens, me ex veritate esse declarem. Largire quoque gratiam, vt semper vbicumque fuero, siue benè siue malè mihi sit, tamquam filius veritatis tibi auscultem, paratus potiùs tecum quauis tormenta ferre, quàm cum mundo quibusvis delitiis affluam; & tunc Rex ero tecum, vel te Rego existente ego Regina ero, atque ita in veritate vnum erimus, si ego in veritate stetero, & te ipsam veritatem quæsiero. Amen.

PARS QUARTA.

DIcebat ad te Pilatus: Quid ergo est veritas? Ecce quomodo veritatis inimicus cum Veritate loqui permittitur. Verùm cum sit alienus à veritate, non nisi ad tempus claritatem tuam intueri meretur. Cùm enim percontatus fuisset: Quid est veritas? illicò exiit, vim claritatis tuæ ferre non valens. Vnde quàm hoc dixisset, iterùm exiuit ad Iudæos, & dixit eis: Ego non inuenio in eo causam. Abhorrebat falsitatis fieri testis, qui multa fuerat cum ipsa Veritate locutus. Participauerat vtcumq; de lumine Veritatis (quamuis

non

non ad vitam) quamdiu præsentem habuit Veritatem . sicut quis pertractando aromata, odorem de vestimento effundit & manibus ; ita etiam infidelis hic, atq; indignus. studuit namque te Veritatem commendare , non pertinentibus ad illam , & quem traxerat odorem exhibuit ; sed quoniã eundem minimè habebat in se, vsq. ad penetralia Iudæorũ nequiuuit immittere. Vnde obstinatissimo animo , cordis sensibus obduratis te Veritatem accusarunt. Sed cùm accusareris à principibus sacerdotum & senioribus, nihil respondisti. Pilatus autem rursus interrogabat te: Non respondes quidquam? Vide quanta aduersum te dicunt testimonia! nõ audis? Et non respondisti ei vllum verbum, ita vt miraretur Præses vehementer. Et meritò. Omnia enim æquo animo perferebas, vt nostram salutem operareris. Da igitur mihi Domine, vt in omnibus habeam patientiam, quò vestigia tua sequi valeam, & pro omnibus beneficiis me gratum exhibeam. Da vt in omnibus virtutibus diues sim & perfectus, vt eas non solùm exteriùs declarem, ve-

rùm etiam interiùs in me sentiam , quo-
cas quando tibi placuerit , in proximis
meis etiam operer. Verùm enim uerò , si
vis ut dolores in bonum accipiam , da ut
ad te respiciam , ad passionēs & misérias
meas in patientia per tuam passionē su-
perandas . At illi inualescebant , dicen-
tes : Commouit populum , docens per
vniuersam Iudæam , incipiens à Galilæa
vsque huc. O benignissime Domine ,
quàm duri fuerunt tibi aduersarij , vi
& iniuria te obruētes ! Commoueres aut
turbares tu aliquem , qui omnibus in
terris pacē dare veneras ? Certè summa
cum mansuetudine hoc pertulisti . Nam
cùm pro voluntate Patris tui cēlestis ad
hæc perferenda in terram venisses , non
curasti injuriam vndecumque illatam :
adeò ut summa cum patientia trāsieris ,
dum omnia opera tua bona in pessimā
partem interpretata pro malitia & ne-
quitia homines acciperent. Eia Dñe da
gratiam , ut ad tuum exemplum semper
resignatus stēm subter te ; atq. tale sola-
tium experiar , dum homines opera mea
bona in malam partem accipiunt , ac si
propter te crucē portare haberem. Amē.

Quin-

Quinta MEDITATIO, de passione, quam DOMINVS in domo Herodis sustinuit.

PARS PRIMA.

Pilatus audiens Galilæam, interrogavit si homo Galilæus esses. Ut autem cognovit, quòd de Herodis potestate esses, misit te ad ipsum, qui etiam Ierosolymis erat illis diebus. O Domine, quomodo huc illucq. tractus es & defatigatus citra causam! Deduxerunt te ab vno ad alterum, ac si tanta fuissent facinora tua, vt ab vno sententia pronuntiari non potuisset. Et huius occasionē dederunt peccata mea, quæ tot & tanta erant, vt in multis diuersis locis pro iis supplicium pati deberes. Peccata enim mea te huc illucq. pertraxerunt, atque in tantum te grauauerunt, vt ab vno ad alterum deducereris. Eia Domine, largire & mihi patientiam, quando huc illucque discuro, & nihil perficio; & sit tibi voluntas mea pro facto, vt mea vestigia frustranea per hunc tuum miserabilem incessum

cessum mihi compenses, atque perficias. Amen.

PARS SECUNDA.

Herodes autem, te viso, valdè gausus est. Erat enim cupiens ex multo tempore videre te, eò quòd multa audierat de te, & sperabat signum aliquod à te fieri. Verùm quod infidelis Rex curiosè quærebat, obtinere non meruit. Non enim volebas margaritas spargere ante porcos, cùm scires, vbi sapientia tua locum haberet. Etenim non sincero affectu, sed curiosa sensualitate ducebatur. Gaudebat quidem tuo aspectu, sed ex nouitate quadam, & rerum nouarum appetitu. Si generosa ductus fuisset virtute, tamquam vir sapiens tibi obuiam processisset, cum Regina Saba, quæ à longè venit videre & audire prudentiam Salomonis. Sed quàm parum doluit de adulterio & latrocinio, quo internecioni tradidit tuum S. Baptistam, tam paruo erga te Deum ac Dominum meum ducebatur affectu. Qualem ergo ipsum inuenisti, talem te ei declarasti. Tu enim sciebas quid esset in homine, nec opus habebas de quopiam

piam interrogare . Da ô Domine , vt in omnibus virtutibus ac bonis operibus cor habeam sincerum , vt ex totis viribus vestigiis tuis insistam , nec expectem donec tu ad me venias , sed cum alacritate surgam , & summo conamine ad te curram , vt gratiam apud te inueniam.

P A R S T E R T I A .

Herodes interrogabat te multis sermonibus , an videlicet esses Ioannes Baptista , quem ipse in carcere decollari iusserat : an esses ille propter quem pater infantes circa Bethlechem à bimatu & infra occidi mandauerat ; & multa alia : sed responsum ei non dedisti . Stultæ enim & risu dignæ interrogationes responsum non merentur . Da & mihi ô Domine hanc prudentiam , vt tempore & loco fileam , & loquar . Loquar autem tantum , vbi elogium tuum diuinum pias atque attentas aures inuenit , & silentio inuoluam , quod non ædificat : ne verbis meis maleuolum quempiam ad malum prouocem , aut alto silentio piis scandalum moueam . Quare hîc , ô æterna Patris sapientia,

ipse-

ipſemet loquere per me, & ſilentium ſerua in me, ſecundùm tuam ſanctiſſimam voluntatem; vt tu mecum, & ego tecum ſim in perpetuum. Stabant autem Principes & Scribæ conſtanter accuſantes te. Timebant enim, ne Herodes te tamquam inſanum & miſerum hominẽ dimitteret, cùm viderent quòd te tam ſimplicem præberes, & ad omnem eius interrogationem ſileres. Sed quòd hi te tam conſtanter accuſarent, & ab Herode tamquam inſanus habereris, patienter admodum tulifti. Eia Domine largire mihi hanc gratiam, vt omnia patienter feram, vndecumque etiam mihi obueniant; ſiue verbis malitioſis falſò accuſer, ſiue ab hominibus contemnar, ſiue pro puero vel minimo habear, ſemper ſub tua profundiffima humilitate latẽs, æquo animo accipiam. Si enim meipſum ita perdidero inter homines, certus ero, quòd & in te meipſum perpetuò inueniam. Amen.

PARS QUARTA.

VErùm Herodes videns quòd nihil proficeret, ſpreuit te cum exercitu ſuo, & illuſum veſte alba remiſit

ad

ad Pilatum. Multam tibi intulit iniuriam, ignorans qua contumelia te afficeret, iuxta morem aulicorum malè disciplinatorum, qui sibi relictī quidvis attentare audent. Illuſit autem te, & veſte alba indutum remiſit ad Pilatum. O quàm difficilem & miſerabilem hīc ingreſſus es viam! Veſtis fuit alba, & à longè conſpicua, vt quiſquiliæ & fæx nebūlonum accurrerent, & omni te opprobrio exciperent, cū tamquam inſanum te riderent atque obruerent. Prætereà fuit valdè longa, vt progrediendo, & eam calcaueris, & ſæpius in terram corrueris; quod iſtis mouit riſum, & tibi dolores attulit: atque ita ludibrio, contumeliis & iniuriis afficientes, Pontio Pilato Præſidi te reſtituerūt. Quæ omnia patientiſſimè propter me pertuliſti. Ego has contumelias & opprobria merueram, & tu Filius Dei viui ea perpeſſus es. Eia Domine, ſi pro gratiarum actione hæc ipſa perferre nequiuero, da, vt ad minimum cum lacrymis expendens gratus inueniar. Da, in me ſentiam, quod nullo honore dignus ſim; vt cum patientia de manu tua accipiam,

piam, si quando neglectui aut contemptui habear, & maximè salutare reputem si tecum opprobriis aut contumeliis satier.

Sed facti sunt amici Herodes & Pilatus ipsa die, qui antea inimici erant ad inuicem. O Domine Dominus noster, quàm admirabile est nomen tuum in vniuersa terra! Tibi infertur ignominia & iniuria, sed pacem & vnitatem refundis. Numquid malum pro malo reddidisti? Nequaquam. Sed bona pro malo, vt legem charitatis perfectè adimpleres. Da mihi Domine hoc tuum exemplum imitari, vt Filius inueniar Patris cælestis, qui solem suum oriri facit super bonos & malos; & æqui bonique consulam si quid à malignis mihi inferatur, & precer illis saltem quæque felicissima pro malo mihi allato, si opera ipsa in bonum conuertere nequeam. Largire Domine, vt in omnibus tecum vnum sim, quò non frustrà pro me passus sis, sed in omnibus passionis tuæ documentum habeam, vt intelligam, quomodo nunc in doloribus & miseriis me gerere debeam, Amen.

FERIA

FERIA QVARTA.

MEDITATIO prima, de doloribus & tormentis qua DOMINVS noster in Pilati domo pertulit.

PARS PRIMA.



BI iam Pilatus te Dominum ac Saluatorem meum recepisset in pratorio, conuocatis principibus sacerdotum & magistratu & plebe, ait illis: Obtulistis mihi hunc hominem quasi auertentem populum: & ecce coram vobis interrogans, nullam causam inuenio in homine isto, ex his in quibus eum accusatis; sed neque Herodes: nam remisi vos ad illum, & ecce nihil dignum morte actum est ei. Emendatum ergo illum dimittam. O miranda res! alienigenarum Principes innocentiae tue defensores erant; & Hebraei ipsi, de quibus secundum carnem natus es, morti te tradere satagebant. Verum longè antè prädixeras, quòd inimici hominis domestici eius. Si tu ergo Dominus
meus

meus & Deus meus ita odio habitus es à populo tuo, quorsum ego indignè feram, si à proprio sanguine persecutionem patiar? Sed respice ô Domine infirmitatem meam, & tuo exemplo me conforta, vt in iniuria quam proximi mihi inferunt, solatium habeam per hanc tibi illatam; super omnia gratias agens, quòd me tuis doloribus & miseriis conformas: atque ita omnia, quæ à fratribus, sororibus, aut amicis inferuntur, de manu tua accipiam, cogitans quòd sic oporteat me crucem tuam portare, & Patri tuo cælesti gratum obsequium seruitutis præstare.

Sedente autem Pilato pro tribunali misit ad eum vxor eius, dicens: Nihil tibi & iusto illi. multa enim passa sum hodie propter illum. Quod à bono Angelo proficisci potuit, vt memor esset Pilatus, ne rei tam iniquæ sese immisceret; sed naturaliter per istam admonitionem confortatus, falsum iudicium declinaret. Verùm quàm chari nos & salus nostra tibi erat, tam obstinati facti sunt hostes tui in malitia sua, vt nec rationi, nec intellectui, nec naturæ, nec sancti

sancti Angeli admonitioni locum darent. Operetur quæso Domine fortius in me tua diuina gratia, vt dum ego in naturali ratione, Angelica admonitione promoueor, totis viribus sequar; & tuam bonam, beneplacentem, atque perfectam voluntatem adimpleam, ac tibi in perpetuum placeam. Amen.

P A R S S E C V N D A.

NEcesse autem habebat, & consueuerat Pilatus populo dimittere per diem festum & sollemnem, vnum ex vinctis quem volebant. Habebat autem tunc vinctum Barabbam, insignem latronem, qui cum seditiosis erat vinctus, & in seditione fecerat homicidium in ciuitate. Et turba exclamauit, & cœpit rogare, sicut semper faciebat illis. Congregatis ergo illis dixit Pilatus: Est consuetudo vestra, vt vnum dimittam vobis in Pascha. Quem vultis ergo dimittam vobis, Barabbam, an Regem Iudæorum qui dicitur Christus? Sciebat enim quod per inuidiam tradidissent te summi sacerdotes, O Domine, quomodo tractant te peccatores, & hoc in summo totius

anni

anni festo, videlicet in festo Paschæ, in quo omnibus modis te ipsum pro nobis obtulisti? Tu eras ipsorum captiuus pro nobis, vt nos vinculis peccatorum constricti, liberaremur. Populus rogabat pro vno victo dimittendo: verum tu, qui pro nobis esse sacrificium decreueras, liberari planè volebas. Quid igitur? Pilatus qui pro humana fragilitate te absolueret quærebat, ne quem offenderet, te tamquam captiuum populo exhibuit, & vt omnino te eximeret, adiunxit tibi insignem latronem, conferendo falsitatem veritati, vitam latroni, pacem homini seditioso. Mira comparatio, vbi Deus homini, iustitia iniquitati confertur. Quid tibi Domine cum tenebris, qui es lux vera? Quid tibi Saluatori cum homicida? Quomodo maior tibi potuit inferri iniuria, quàm quòd cum tanto latrone conferreris. Quid te reddidit tam contemptibilem? Peccata mea, pro quibus in te susceptis, quasi in mea persona pœnas dare veneras. Da ergo mihi misericordissime Domine, gratiam patienter ferendi si quando contemnar aut parui fiam, cùm mihi

mihi tanta ignominia, quanta tibi irrogata est, inferri nequeat, & ego peccatis meis ignominiam tibi illatam promeruerim. Patienter igitur feram, si quando cum homine paupere & abiecto numeratus fuero. Non equidem tanto peccatori comparari queo (sileo hominem abiectum, simplicem & pium) quin ipse in aliquo virtutum aut honestatis genere me vincere possit.

P A R S T E R T I A.

Sed Principes, qui secundum legem in multis veritatem agnoscabant, ne virtus prævaleret, turbam concitabant, & persuadebant populo, ut peterent Barabbam, & te Dominum meum perderent. Respondens autem Præses, ait illis: Quem vultis de duobus dimittam? Exclamavit autem simul vniuersa turba, dicens: Tolle hunc, & dimitte nobis Barabbam. O quàm deploranda res, quòd tu Deus cæli & terræ, Rex regum, & Dominus dominantium hîc ignoreris! Non fuit magnum, quòd Pilatus alienigena, à testamento æterno extraneus, te Christum æternum Regem nesciebat, cum Hebræorum Pon-

E tifi-

tifices, quibus in diuinis locis de te erat vaticinatum, ignorantiam tui prætenderent. Te infantem panniculis inuolutum, & in præsepio recubantem, nouerant Herodi indicare, scriptum esse dicentes: Ex te exiet Dux qui regat populum meum Israel: & nunc iam adultum, miracula facientem, virtutum magnalia operantem, dæmonibus impetantem, regnum Dei prædicantem, negare te non formidant. Hic est cursus huius mundi. Quamdiu enim quis in silentio agit, & nulla singulari actione sese aperit, toleratur facile. Sed si in veritate sese exercet, vitia reprehendendo, ac virtutes exercendo, à multis contemnitur, quantumcumque etiam boni faciat. Da ô Domine gratiam, vt hæc ipsa corde expendam, ac semper tecum sim contentus, siue honore siue contumelia afficiar, siue charus siue despectus habear, Tu enim solus causam omnium nosti, cum nihil sub cælo frustra fiat. Si igitur tuæ diuinæ voluntati me conformauero, tunc in omnibus ego, quod tu quæris, & à nobis postulas, inueniam; videlicet tuum imperium,

glo-

gloriam & honorem in perpetuum.
Amen.

PARS QUARTA.

Iterum autem Pilatus locutus est ad eos, volens te dimittere: Quid faciam de Iesu Rege Iudæorum? At illi omnes iterum clamauerunt: Crucifige, crucifige eum. O amantissime Domine, in quantum te grauauerunt mea crimina? Tam molesta tibi fuerunt, ut etiam te vitam ipsam morri tradiderint. Quid enim aliud prætendebat iste clamor Iudæorum dicentium, Crucifige, quàm accusationem qua coram Patre cælesti diuina iustitia me peccati accusabat? Pilatus quidem animaduertebat tuam innocentiam, quòd sine peccato esses tu in cuius ore dolus inuentus non fuerat: sed peccata mea tam dura tibi fuerunt, ut misericordiam ad me liberandum superexaltauerit iudicium. Ad hunc modum clementissime Deus, da gratiam, qua mihi ipsi durus, misericors sim proximis, semper magis ad misericordiam quàm ad iustitiam inclinatus. Imò cum obruor ab vilo mortalium, sicuti hîc te maligni Iudæi oppresse-

E 2

runt,

runt, magis ad te, & ad occulta tua iudicia, quæ mihi in bonum cooperari possunt, respiciam, quàm ad hominem; & si amici mei & proximi, qui mihi auxiliari satagunt, nihil proficiunt, habeam patientiam, & expectem auxilium in tempore opportuno, quò magis in perpetuum post hanc vitam, quàm in præsentiarum solatium inueniam.

Pilatus autem tertio dixit ad illos: Quid enim mali fecit iste? nullam causam mortis inuenio in eo. Pilatus non vi, sed honesta ratione adamantina corda Iudæorum mouere volebat. Cogitabat namque, si te, à quo tanta beneficia perceperunt, tantopere calumniatur, quid in me facerent, si quid contrarium iustitiæ reperirent? Agam quod voluit, iustitiæ censura postposita. Quomodo, ô Domine, peccata mea excæcarunt Pilatum, ne mortem euaderes? Loquebatur quidem pro te, dum iniuriam & vim patereris: sed ex humana fragilitate, te ipsa iustitia relicta, iniquitatem sectatus est. Interim adhuc medium te liberandi quærebat, dicens se curaturum ut castigareris, ac adeò turpis ac

fœti-

foetidus appareres, quò ex compassione adhuc viuum te dimitterent. Sed quid dicis Pilate? Vísne vim inferre iusto? vísne castigare sanctum ac innocentem, què ex inuidia tibi traditum nosti? Cessa quæso talia cogitare, sileo quòd loquaris. Nam si vel minimum quid attentaueris contra iustum, non conquiesces. Tentator enim non cessabit, nisi totum adimpleueris. Ita, Domine, reuerà actum est. Nam contineri non poterant, quin clamarent, & magnis vocibus instarent, vt crucifigereris, & inualecebant voces eorum. O Iesu bone, quanto oneri tibi fuerunt peccata mea! imò tam acerba, vt nulla fuerit gratia ad te in pœna subleuādum. Non est profectò mirum, quòd peccata propria sepè me tantopere grauēt, quòd hîc & alibi frequenter minutissima quæque mihi dolorem adferant, cùm peccata aliena, videlicet totius humani generis, cum quibus partem non habebas, in tantum te obruerint, vt in nullo gratiam inuenire potueris. Ego si quid patiar, hoc promerui omnibus modis, sed tu nihil mali feceras. Eia igitur Domi-

ne, da mihi patientiam in omni tribulatione mea, vt & ego cum gaudio crucem meam portem. Amen.

Secunda MEDITATIO, de flagellatione DOMINI.

PARS PRIMA.

O Amantissime Domine, Pilatus iam oblitus iustitiæ, animæque cura neglecta, apprehendit te, & flagellandum tradidit. O nunc anima mea, vt scias quanti te æstimauerit Christus sponsus tuus, vt compassione patiaris cum illo, atque amoris ipsius, vices rependere possis, in spiritu intra in prætorium Pilati, ac diligentissimè considera quid tuus propter te in eo sustinuerit Deus: lacrymas habeto paratas, cordis gemitum tene, vt cum lamentationes, carmen, & væ in libro vitæ repereris scripta, teipsum ad lamentum prouoces. Quis ô Domine à fletu continere se potest, cum te Dei Filium, vt ibi durissimè flagelleris, in prætorium mente conspexerit introduci? Da mihi Domine ita ex corde hæc medi-

tari,

tari, ac si præsens cum lacrymis conspexissem. Da mihi ita inpræsentiarum lacrymari, ac si in persona hæc pertulissem: quod mihi impossibile fuisset, quia vel in deliquium animæ, vel periculum mortis incidissem. Merito ad hæc considerata laborare debebam. Nam ego hæc promerueram, & tu pro me pertulisti. Præsta igitur Domine, ut in anima mea hoc sentiam, quod tunc in te fuit, quando cum tanta ignominia introductus es ad hæc perferenda; ut cum aliud facere nequeam, saltem in anima sentiam, quod tu in corpore pro me perpeffus es. Amen.

P A R S S E C V N D A.

A Ccedunt ministri crudelitatis, quatenus detractis vestibus te nudum exhibeant. Porro tamquam agnus coram tondente se, non aperuisti os, conuitia patienter audis, tranquillo animo te expoliari permittis. Tanta siquidem mansuetudinis es usus modestia, ut fortè de astantibus quosdam incitares ad lacrymas. Verùm ô Domine, quanta tibi fuit afflictio hæc denudatio? qui eras verecundus præ omnibus

filiis hominum , vt quod indecorum est , nullum vñquam hominum tātum læserit quantum te , qui omnium maxime inordinata odisti , vt hæc denudatio tibi maximam attulerit tristitiam . Et quamuis peccatum pudorem generaue- rit , & tu peccatum non haberes ; tamen peccata nostra , quæ in te suscepisti , tibi hunc dolorem , quem super nos induxerant , attulerunt , eo solo excepto pudore qui peccatum coniunctum habebat . Verum , ô Domine , cū pudor mihi sit utilis (licet ex peccato eum habeam) da semper sentiam honestam verecundiam , qua sanctè & honestè in hoc mundo semper agam , & timeam ne quid indecorum manifestè coram hominibus , aut in secreto coram te & Angelis tuis attentem ; sed ita viuam in præsentī sæculo , ne in futuro me confusum inueniam .

Post hæc Domine alligarunt te columnæ , & diris restibus tenerrima mēbra tua constrinxerunt , tanta eum crudelitate , vt pretiosus sanguis etiam ex sacris vnguibus tuis erumperet . Et hæc omnia quā patientissimè tolerasti .

Tener-

Tenerrimum corpus tuum in tempore exposuisti, vt nobis parceres in perpetuum. Diris restibus & funiculis constringi voluisti, vt nos à vinculis peccatorum eximeres. Eia Domine, per hæc dira tua ligacula libera me à vinculis imperfectionis meæ, quibus ligatus sum intus & foris. Intus ligatus sum, dum ex re minima turbor, & nec iræ nec concupiscentiæ resisto, sed affligo meipsum supra modum, nullo ad rationem aut intellectum habito respectu. Foris verò constringor, dum quidquid video, audio, olfacio, gusto, vel attingo, traho ad meipsum, vt re admodum parua interueniente à meliori bono me abstrahi sinam. Ab his vinculis libera me Domine, & columnæ tuæ diuinæ gratiæ me alliga, vt à peccatis liber ad omne opus bonum me expeditum inueniam. Amen.

P A R S T E R T I A.

FEcerunt flagella rotata, quæ prima acie adinstar acus erant, & totum benedictum corpus tuum dilaniarunt, ac vulneribus infinitis fulcarunt. Cuius iam tam ferreum pectus, quod non

E s emol-

emolliat tanti Redemptoris benignitas? Ligaris, cæderis, atque flagris corpore dissiparis. Nunc scapulas, nunc ventrem, nunc brachia, nunc crura cingunt, vulnera vulneribus, plagas plagis recentibus addunt. Hinc liuor tumens, inde sanguis erumpens, omnem corporis decorem immutat; adeò vt membrorum compages visibiles fieret. Prophetæ vaticinium tunc completum fuit, dicentis (*Isa. cap. 53.*) Vidimus eum, & non erat aspectus, & desiderauimus eum: despectum, & nouissimum virorum, virum dolorum & scientem infirmitatem: & quasi absconditus vultus eius & despectus, vnde nec reputauimus eum. Verè languores nostros ipse tulit, & dolores nostros ipse portauit: & nos putauimus eum quasi leprosum, percussum à Deo & humiliatum. Ipse autem vulneratus est propter iniquitates nostras, attritus est propter scelera nostra: disciplina pacis nostræ super eum, & liuore eius sanati sumus. Eia Domine, da mihi hæc ex intimo cordis meditari, vt horum dolorum tuorum consideratione ego quotidie per pœnitentiam quasi diluam,

luam, quod variis multisq. modis peccavi. Intuear tuum benedictum ac miserabile corpus tot innumeris vulneribus dilaniatum, quando in mentem venit pulchritudo corporis mei, aut propriæ naturæ complacentia, atq. ita sensus meos supprimam, ne vlla alia re quàm tua profundissima humilitate, ac passionis, quam pro me tolerasti, acerbitate occupatus inueniar; quò tandem in te transformatus, nihil aliud in me sentiam, quàm in te erat, cùm tam dirè flagellis cadereris.

P A R S Q U A R T A.

VBi iam Domine infinitis vulneribus totum benedictum corpus tuum delaceratum esset, vestimenta resumere compelleris. Secessisti igitur solus, & doloris nimietate debilitatus, sine alicuius adminiculo induis te. Hoc unico exemplo, potentium superbiorumq. superfluos damnas famulatus. Tu enim Dominus Maiestatis nō habuisti adiutorem saltem vel minimum, qui in tanta necessitatis vehementia, suffragij manum tibi apponeret. Da igitur mihi ô Dñe, vt semper in omni patientia, quo-

modocumq. etiam mecum agatur, sim contentus. Sum autem derelictus, vt nullum auxilium aut solatium habeam; in hoc sit meum subleuamen, quòd ad te respiciam, qui in extrema necessitate solatium vel auxilium non inuenisti. Nos volumus summo honore affici, vbi nil prater confusionē promeruimus: & tu Dominus meus, & Deus meus, qui omni gloria & honore dignus es, neminem ad tuum ministerium paratum inuenisti. Et quomodo hæc possunt simul subsistere? Tu passus es pro nobis, ab omnibus derelictus; nos ergo in deliciis viuentes pro vno famulo tres in subsidium nostrum assumemus? Eia Domine, age mecum pro tuo beneplacito. Magna siquidem mihi fiet gratia, si in patientia tecum quasi desolatus tristitiam & dolorem inueniam. Tunc enim sperabo, quòd tecum aliquando solatium percepero, quando absterges lacrymas ab oculis meis, & luctus aut dolor non fuerit vltra. Hæc sit spes mea, & solatium meum; & erit tandem, vt ab omni dolore & labore liberer. Amen.

Tertia

Tertia MEDITATIO, *de Coronatione* DOMINI.

PARS PRIMA.

MIlites te iam vestibus resum-
ptis ducunt in atrium præto-
rij, & congregantes vniuer-
sam cohortem, rursus exuerunt te, re-
nouantes infinita ista vulnera tua, qui-
bus vestimenta inhærebant, vt totum
benedictum corpus tuum esset dolori-
bus plenum, tamquam vlcus præma-
turum. Hoc factum profectò homini
pio lacrymas excussisset, hic tuus dolor
hominis sensati cor penetrasset. Verùm
illi ex maleuolentia & tyrannide hosce
tuos dolores in risum & cachinnum
conuerterunt, vt tota tua natura afflicta
tremere & paueret. Quis mortalium
Domine hæc pertulisset? Addiderunt
ne tibi dolorem super dolorem? Eia da
mihi gratiam, qua omnem iniuriam &
afflictionem, vndecumq. mihi proue-
niat, sine tædio perferam. Contristor
sæpè vna re? exprobratur mihi sæpè
mea magna imperfectio? incido fre-

quenter præter meam voluntatem in idem vitiū? obruor sæpè ab vno homine (quisquis ille fuerit) propter meam vocationem? respiciam ad hanc tuam sanctissimam passionem, & in hoc me consoletur, quòd tu sæpiùs in vno vulnere læsus sis, & postea toties sint innouata omnia. Ego miser sum tam fragilis, vt ad minimam iniuriam perturber; & tibi Domine non vnum, sed multa mala inferuntur; & necdum finis est, quin ipsi maleuolè perseuerantes in sua malitia perfidos sese declarent, vsque dum te à vita in mortem transferant. Da igitur gratiam Domine, ne in primo certamine despondeam animum, sed cogitem esse principium, & maiorem adhuc afflictionem mihi imminere; vt non vincar impatientia, sed multò magis acceptem tamquam præparationem ad maiorem tribulationem, quæ mihi euenire possit; atque ita dolores meos, consideratione dolorum tuorum mitigem. Amen.

PARS SECVNDA.

EXtractis vestimētis tuis, chlamyde coccinea induerunt te, & plecten-

tes

tes coronam de spinis posuerunt super caput tuum. Hic parumper, ô anima mea, considerationis gressum fige, & Redemptoris tui intolerabilem dolorem attende, modum cogita, ludibrium meditare, atque tormenti huius immanitatem ex te ipsa metire. Statue te in persona Domini, taliaque arbitrare te passuram; capitis delicati sensibilitatem animaduerte, spinarum compunctiones cerebrum perforantes mirare, sicque sanguinem decurrentem lacrymarum inundatione absterge. O horrendum spectaculum, Regem aspicere gloriæ, cui cælorum famulantur obsequia, & illum tantis laceSSI iniuriis, opprobriis grauari, atque incomparabilibus premi pœnis! Mirabantur planè cæli, mirabantur Angeli, omniumque cælestium spirituum legiones, videntes Verbum, per quod facta sunt omnia, contemni à perfidis; Sapientiam, hominum sordidissima super se sputa suscipere; vndique Dei Filium despectum, agitarum, illusum. Nam circumdederunt tibi clamydem purpuream, tamquam regale vestimentum, quo orna-

bant

bant tam dolorosum & vulneratum corpus, & plectentes coronam de spinis, imposuerunt capiti tuo, & dederunt arundinem in manu dextera tamquam sceptrum. Est ne hæc intolerabilis contumelia, qua sub tantis tormentis tantum Regem subsannant, & ludibrio habent? Flectendo genua te deridebant: incipiebant te salutare, dicentes: Aue Rex Iudæorum, & dabant tibi alapas, & conspuebant te, & percutiebant caput tuum arundine, & positis genibus adorabant te. O Domine, quis potest hanc contumeliam tecum ferre, vbi tu Rex gloriæ tantam fers iniuriam, tantaque ignominia obrueris, & tam intolerabiles dolores ac pœnas suffers? Sume nunc ô anima mea lamentum grande, plange contumelias Domini tui, depone nuptialem vestem, ornamenta regalia tibi concessa, induere cilicio, asperge caput tuum cinere, faciem immuta, atque cordis tui gemitu illius leni mœrorem, totum te illi conforma; & si non vales corpore, saltem hoc age mente. Qualis autem sponsus tuus fuerit, utique præ filiis

homi-

hominum speciosus, recale. Largire mihi Domine, hanc tuam contumeliā & opprobria quotidie deuota mente expendere; quò exemplum sumam à te, & solatium sentiam, quotiescumque ab amicis meis opprobria & contumelias patior, ac si ipsorum mancipium essem: cogitem tunc Domine, maximè salutare mihi, si tecum ac propter te irrisiones & contumelias pariar, & vbi me contristare nituntur, ibi mihi summum gaudium ducam. Atque ita tecum in secreto later, dum ab huius sæculi filiis contemptui & despectui habeor. Amen.

P A R S T E R T I A.

SED quid tantum contumeliæ inhæreo? accingam me ad dolores & pœnas, quas hîc perpeſſus es, considerandas. Coronarunt te tamquam Regem, sed corona spinea; qua, si coronandi essent Reges terræ, non esset Rex in toto mundo. Coronant te corona (inquam) spinea, quæ ipinas longas & acutas fouebat: superiùs impressæ supra benedictos oculos, & circa totum caput sanctissimum inferiùs videbantur. Spinæ autem

autem fuerunt septuaginta duæ, quæ vnico actu septuaginta duo vulnera benedicto capiti tuo inflixerunt. O quanta tormenta hîc passus es Domine! Si nos vel vno vulnere in capite læsi essemus, satis superque putaremus, quasi iamiam morituri, aut sensibus priuandi: tu tamen septuaginta duo vulnera recepisti, vt etiam pretiosus sanguis per totam benedictam faciem tuam transflueret. Si diuinitas, quasi dura tibi propter peccata mea, te non confortasset, impossibile fuisset homini tot vulnera in capite sufferre. Quid si nos vel acicula lædamur, statim in clamorem prorumpimus: quid igitur fieret, si nostrum aliquis in capite ita vulneratus esset? Et non tantum vnum habuisti vulnus, sed septuaginta duo, cum vnum plus satis fuisset. O nunc anima mea, considera qualis fuerit sponsus tuus: vide elegantiam eius, decorum aspectum, suauem faciendam, incessum maturum, benignitatem, mansuetudinem, humilitatem, suauitatem vultus, pristinamq. pulchritudinem meditare, hanc mente retine, delectabiliter aspice, atque
dul-

dulcissimè amplectere, vt iam cognoscas qualia quantaque tulerit pro te: vera considerationis oculum ad illū conuertere, qui astat tibi coccinea amictus chlamyde, coronatus spinis, sputis illitus, cruore fordidatus, cordis dolore transfixus, corporalibus pœnis incomparabiliter cruciatus, plagis plenus, circumdatus vulneribus, liuoribus tumidus, sanie deturpatus, illusus ab hominibus, à gentibus flagellatus, à discipulo venditus, ab Apostolis derelictus, persecutus à pontificibus, subsannatus à turbis, accusatus iniuste, à Rege expulsus, & omni humano auxilio destitutus.

PARS QUARTA.

CLama nunc, ô anima mea, in fortitudine, & quasi tuba exalta vocem tuam, non oris, sed cordis, sponsoque tuo dicito: Es tu Domine ille, qui paulo antè per ciuitates & castella Iudeorum discurrebas benefaciendo, languores curando, & oppressos à diabolo liberando? Loquere mihi, ô Domine, vt audiat seruus tuus, & enarra si fortè tu idem ipse es, qui glorificatus in mon-

te,

te, Diuinitatis tuæ potentiam discipulis ostendisti. Si tu es de quo loquor, quomodo sic immutatus es? quomodo pristinum amisisti decorem? Regia dignitas, honorabilis aspectus, fulgentissimus faciei splendor, vestimentorū candor cur sic repentinè pertransiit? Delectabar utique priùs, in te nihil deforme reperiens: nunc (proh dolor!) te intueor nouissimum virorum, virum dolorum, sine specie, sine decore, absque gloria, sine honore, & absque vlla corporis sanitate. Obduxit cruor defluens imaginem vultus, sputa humanam deturparunt formam, sicque factus es opprobrium hominum, & tuorum gaudium inimicorum. Et quare hæc tibi, ô Domine, acciderunt? Vt sanares infirmitatem meam, & oleum ac vinum vulneribus meis infunderes, & solueres quod ego debebam. Imò tu ita segregatus à mundo indicasti, quomodo nobis hoc sæculum relinquendum. Sponsa sponsum in tempore sequi debet, vt ipso in perpetuum fruatur. Nulla etenim sponsa aut sponsus hoc modo ornatur, sed tantum sponsa tua ad exemplum à te datum,

tum, vt & interiùs & exteriùs solatio destituta, tecum quasi vulneribus plena spineam portet coronam in capite, & fiat idem quod tu es, vt tuo exemplo mundo mortua, ac quasi desolata tibi subsit, atque tam fortiter à te expectet solatium, vt intus & foris quasi derelicta, potiùs centum annis eligat tecum pati, quàm vel minima cogitatione à te recedere. Da mihi, ô sponse mellitissime, hæc intelligere, & de manu tua cum summa patientia accipere; vt sic per tribulos & spinas, libenter ex toto corde te sequar, propterea sanctissima voluntate, ad gloriam & honorem nominis tui summum, & animæ meæ salutē. Amen.

*Quarta MEDITATIO, de misera-
bili Saluatoris nostri ostensione.*

PARS PRIMA.

Hisce peractis, exiuit iterum Pilatus, & dixit ad Iudæos: Ecce adduco eum vobis foras, vt cognoscatis, quia nullam inuenio in eo causam. Exiuiſti ergo bone Iesu, portans coronam spineam, & purpureum
vesti-

vestimentum. Et dicit Pilatus: Ecce homo. quasi dicat: Vidistis vñquam hominem ita miserabilem, dilaniatum & vulneratum? Ô grande mysterium, ô diuinæ miserationis ineffabile signum, videre Dei Filium, Angelorū gaudium, & cælestis Ierusalem inextinguibile lumen, solem scilicet iustitiæ, totū cruentatum & squalidum coram vñuersa astare plebe! Et quare, ô benignissime Domine, sic abiectus es, factus quasi vermis & non homo, opprobrium hominum & abiectio plebis? Vt pro meis variis vitiis & imperfectionibus responderes. Ego superbia plenus eram, & hîc te plenum doloribus & miseriis inuenio. Ego in abundantia deliciarum & voluptatum fui, & te hîc infinitis afflictionibus agitatum video. Vt summam dicam, ego nullam in me imperfectionem expendere possum, pro qua tu in hac miseria pœnas non dederis. Fui ego gloriosus & arrogās? tu pro his derisui & contemptui habitus es. Fui avarus & valdè attentus ad res temporales? tu hîc nudus & inops appares pro me. Fui ebrius, & excessi in cibo, potu, & vestimen-

stimentis, aut in aliquibus aliis rebus? tu pro his pretiosum sanguinem tuum effudisti. Fui quandoque in deliciis? tu pro his coronam spineam portasti. Fui iracundus, & odio plenus? tu vulnera pro his in abundantia dignatus es accipere. Fui ego tardus & piger in bono opere exequendo? tu pro his, vinculis & catenis constrictus es. Da quęso, Domine, vt in omni mea miseria ad hęc tuam passionē respiciam, & inter omnia peccata mea per tuos hosce dolores spem concipiam, ne vñquam de tua diuina gratia desperem, sed in omni opere bono perseuerem, atq. cum omnibus electis cōtra spem in spem credam. Amen.

P A R S S E C V N D A.

CUm iam vidissent te Pontifices & ministri, clamauerunt dicentes: Crucifige, crucifige eum. O Domine, quàm durum fuit hoc tibi audire, vt te vitam omnium morti tradere stude- rent, & irruerent in te tamquam in parietem inclinatum, & in maceriem depulsam? Sed si hęc in te operati sunt. quid ego volo conqueri de iniuria, quando mihi inferatur? qui meritò

com-

complicatis manibus tibi gratias agere debebam, quòd me dignum ducas pro nomine tuo aliquid pati. Nihil mouit eos tua ingens miseria, quin adhuc postularèt vt morte damnareris. Eras illis spina in oculis, non obstantibus beneficiis ipsis collatis. Quid igitur refert, si ego contemnar aut iniuria afficiar, quod satis superque promerui. Eia igitur Domine, adiuua me, illumina oculos mentis meæ, vt capiam, me omnem dōlorem interiorem & exteriorem satis promeruisse, firmam spem concipiendo, quòd gratiam tuam obtinere possim, ne vñquam in desperationis foueam incidam, quantumcumque etiam peccauerim. Nam miserationes tuæ sunt super omnia opera tua.

Dicit eis Pilatus: Accipite eum vos, & crucifigite eum. Ego enim non inuenio in eo causam. cui responderunt Iudæi: Nos legem habemus, & secundùm legem debet mori, quia Filium Dei se fecit. Ecce, ô Domine, ita veritas in te contemnitur & odio habetur: quid ergo ego volo in omnibus locum habere? Tu eras Filius Dei in veritate, & nō es

agni-

agnitus ab illis: ego ne ergo turbari debeo, si quid dicens pro gloria tua, non audiar? Fac ô Domine, vt ego tecum vnus sim intus & foris, vt si foris tecum obruar, intus tecum solatium percipiam, ne vñquam despondeam animum, sed cogitem te eò mihi vicinior, quò tribulationē maiorem sensero. Tu enim iuxtà es his qui tribulato sunt corde, & humiles spiritu saluabis.

P A R S T E R T I A.

ITerùm in prætorium ingressus Pilatus, interrogat te: Vnde es tu? Hic interrogat te Pilatus humanitus loquendo, & nescit, quid dicat. Tu diuinitus non habes originem ab hominibus, à carne vel sanguine, licet ex nobilissima virgine Maria natus esses secundùm hominem. Nam de Spiritu sancto conceptus es, qui Deus eras ab æterno; cùm interim secundùm humanitatem ex mera charitate hanc miseriam & diram passionem acceptaueris, quando hoc tibi ex obedientia Patris placuit. Hinc responsum non dedisti ei. O Domine, si hanc nactus essem sapientiam, vt circa te occupatus, nullam

altitudinem aut gloriam mundi quæ-
rerem , sed potius tecum despici &
contemni desiderarem ; imò crucem
tecum libentiùs portarem , quàm in hoc
mundo ab omni miseria immunis esse
affectarem ! Sim igitur mutus , dum de
huius terræ altitudine interrogatus fue-
ro : sim quasi sine intellectu , dum præ-
sentis vitæ voluptas mihi conceditur ;
quò ad omnia quæ in hoc præsentì
mundo mihi eveniunt , siue sit dolor
siue gaudium , sileam , ac si non haberem
in ore meo redargutiones ; ut ita san-
ctissima , beneplacens & perfecta vo-
luntas tua semper in me fiat , in omni-
bus , siue bona siue mala fuerint , & sim
in singulis & cunctis tecum contentus .

Dicit ergo tibi Pilatus : Mihi non lo-
queris ? nescis quia potestatem habeo
crucifigendi te , & potestatem habeo
dimittendi te ? O superba locutio ! quid
te iactas ? quid de te sentis , quòd hæc au-
deas Verbo Dei dicere ? O ingens vesa-
nia , quòd homo in præsentia Dei sibi
tantum vendicat ! Quid quæso magis
horrendum , benignissime Domine ,
quàm quòd homo aduersum te super-
biat ,

biat, creatura in conspectu sui creatoris, pulvis & cinis coram tua diuina Maiestate, peccator ante thronum gratiæ? Ne quaeso, Domine, superbia vñquam ingrediatur cor meum, quò me aliquid esse putem; sed respiciam potiùs ad peccata mea innumera, ad fundamentum creationis meæ, quid videlicet ego sim, & quid è contra sis tu Dominus meus & Deus meus, quanta beneficia mihi præstiteris, vt semper ex cordis humilitate dicam: Non intres in iudicium cum seruo tuo Domine, quia non iustificabitur in conspectu tuo omnis viuens. Quoniam verò Domine in carne apparueris, vt errantes in viam reduces, & ignorantes doceres, respondisti Pilato: Non haberes potestatem aduersum me vllam, nisi tibi datum esset de super. Propterea qui me tradidit tibi, maius peccatum habet. Benedictus es tu Domine in sæcula, quòd nulla creatura quidquam in nobis possit operari, nisi à te sibi datum habeat. Quocircà si quid nobis eueniat, non est quòd respiciamus ad hominem, sed ad te Domine, qui in omnibus & singulis pro tua

occulta iustitia cuncta permittis . Hoc saltem largire , ne mali quidquam causeremus, siue cogitationibus, siue verbis, siue factis ; sed libenter vnà tecum innocentes patiamur pro sanctissima Patris cælestis voluntate , vt tandem vnà tecum remunerati, perpetuam coronam mereamur. Quis autem malorum magis in nos peccet , hoc committimus tibi , qui vnicuique secundum opera sua reddes. Iudæi qui meritò cum gaudio te recepissent , & tradiderunt te morti ex mera inuidia , maius peccatum habent quàm Pilatus, qui secundum officium à Deo Patre sibi traditum te condemnauit. Interim non fuit immunis à peccato etiam maximo, qui tibi ipsi Veritati citra diligentem inquisitionem mortem intulit : & suo iudicio seipsum damnauit , cùm te, quem innocentem agnoscebat, cruci configendum tradidit. Nihil igitur commercij habeamus cum peccato , siue illud magnum sit , siue paruum ; sed semper stemus à parte veritatis , & magis tecum opprimi, quàm cum malitioso mundo dominari affectemus. Amen.

PARS

P A R S Q V A R T A.

EX hoc tuo responso quærebat Pilatus oportunitatem dimittendi te. Meditabatur vtilia, honesta cupiebat, sed non ea virtute qua debuit. O quàm instabilis est homo iensibus, qui bonum quidem quandoque facit propositum, sed nimis facilè impeditur, quò minùs illud executioni mandet. Eia Domine, adesto mihi miserrimo peccatori; & si quid boni mihi inspiraueris, hoc per te ipsum pro tua infinita bonitate effectum cura. Non me impediat, vel honor, vel vtilitas, vel hominum violentia, in eo quod vel fieri vel omitti per me volueris, diligit te super omnia cor meum, quia tu solus es, præter quem quidquid est, nihil est. Quid igitur me subiiciet peccato, quod solum à te separat? Numquid tu melior es toto vniuerso? Eia igitur Domine confirma me in omni opere bono, ne vel satanas, vel infernus, vel mors à te separet, sed in amore tuo semper perseuerem, hîc & in perpetuum.

Iudæi autem clamabant, dicentes: Si dimittis hunc, non es amicus Cæsaris.

Omnis enim qui se Regem facit, contradicit Cæsari. O bone Deus, quomodo hostes tecum egerunt? Non quiescunt nisi te æternam Veritatem morti tradiderint, quò ipsi sine veritate in mendacio perseverarent. Tu non indigebas Romano imperio ad regiam dignitatem defendendam, sed illud ipsum quod erat, tibi acceptum ferre debebat, quies Rex omnium sæculorum. Verùm cùm Iudæi hætenus rationibus Pilatum contra te non potuerunt concitare, vi & cum imperio iam ipsum aggrediuntur, ac minis quodammodò, vt te morti tradant, compellere nituntur. Per legem quidem, cuius planè ignarus erat, commotus fuit, at vi imperiali planè superatus est. Sed peccata mea, quæ tibi quasi vim inferebant, ipsum pusillanimum fecerunt. Verùm quid dicā, benignissime Deus? Si tibi tam importuni fuerunt, vt nullum esset euasionis medium, quin omnia patientia vincere ad mortem vsque debueris; quorsum ego volo in meis angustiis animum abiicere, vt non cogitem mihi cum patientia omnia suffe-
renda,

renda, vndecumque etiam veniant, siue à satana, qui quandoque se transfigurat in Angelum lucis, quandoque cum impetu tamquam in anima & corpore simul me absorbere volens adoritur, siue ab aliis creaturis, quæ simulatè aut in secreto ex obliquo, aut impetuosè me obruunt? Scio equidem, quòd mihi fuerit sicut & tibi. Hoc namque commune est omnibus electis tuis, vt hîc lateant & sileant, hîc pro minimis habeantur, & ad tempus tecum opprimantur. Da igitur Domine, vt hæc ipsa ita in me sentiam, sicut & in te fuerunt; vt & ego in eadem charitate omnia patienter perferam, vti tu pro omnibus nobis, ex immensa charitate, hæc, ad mortem vsque perseverando, libenter pertulisti. Amen.

*Quinta MEDITATIO, quomodo
SALVATOR noster indicatus sit.*

PARS PRIMA.

CVM audisset Pilatus, quòd inimicus Cæsaris esset cōstituentus, si te dimitteret Dominum

Deum meum; adduxit te foras, & sedit pro tribunali in loco qui dicitur Lithostratos, Hebraicè autè Gabbatha. Erat autem Parasceue, hora quasi sexta, & dicebat Iudæis: Ecce Rex vester. Pilatus tacitus præteriuit quæ in contradictionem Cæsaris vergebant. Erat enim amicus huius sæculi, & verebatur hominis fieri inimicus. Hinc Cæsaris oblitus, ad tuam se miseriam conuertit, si fortè animos Iudæorum ad commiserationis affectum mouere potuisset. Sed erat parasceue Paschæ, figura eorum quæ iam in te fiebant, vt sic veritas figuræ applicaretur. Quia verò eras verum Pascha transiens ex hoc mûdo ad Patrem, quò nos transferres ex ira in amorem Dei, è carcere in libertatem, ex morte in vitam, de vita gratiæ in vitam gloriæ, in Paschate mori voluisti. Et hac contigerunt hora quasi sexta, hoc est inchoante iam sexta mundi ætate, quam tuo saluberrimo aduentu nobis fecisti, in qua nos viuimus, & quotquot ante nos à passionis tuæ tempore venerunt, & ad nouissimum vsque diem venturi sunt. Cum hac simul cursum habet septima

ætas,

ætas, quæ est illorum, qui in te hinc dis-
 cedunt. Hac sexta hora, hoc est in præ-
 senti vita, tamquam Rex corona spinea
 coronatus, & vestimento purpureo, in
 nudo, vulneribus sulcato, ac pretioso
 sanguine deturpato corpore, indutus,
 arundinem tamquam sceptrum regium
 in manu portans ostenderis populo. Et
 quare hoc? Ut nos in dies ad te respice-
 remus, & tuo exemplo edoceremur,
 quale regnum in terris nos administra-
 re habeamus; videlicet regnum humili-
 tatis & patientiæ, tribulationis & abne-
 gationis nostri ipsorum. Da igitur Do-
 mine, ut oculos meos semper ad te con-
 uersos habeam, sicuti à Pilato Iudæis
 pro nobis exhibitus es; quò cogitem
 omnes regni tui clientulos tribulationi
 malorum & dolori subiectos esse, & per
 patientiam triumphare. Quod vnum
 nos in perpetuum singulariter consola-
 ri debet. Si enim compatimur & con-
 glorificabimur. Quomodo quæso pos-
 sum superbire, aut deliciis affluere, quã-
 do ad te Dominum Deum meum re-
 spicio? Si cælorum Rex in terris humi-
 liatus patientiam habet vsque ad mor-

F 5 tem,

tem, mortem autem crucis, quomodo vermiculus terræ in superbia cristas eriget? O igitur clementissime Domine, sis quæso ita miserabilis & desolatus inclusus cordi meo, quod semper oculos intellectus mei ad te introuersos habeam, & in omnibus quæ mihi eueniunt ad te respiciam, quod in meis deliciis medium teneam, & in miseriis per patientiam solatium habeam. Amen.

P A R S S E C V N D A.

Iudæi autem clamabant: Tolle, tolle, crucifige eum. O Domine, quàm durum fuit hoc audire! Eras doloribus plenus, & nullum in te mēbrum quod non vulneribus dissipatum esset; stabas circumdatus veste purpurea, grauatus acerbitate coronæ spinæ, tenens arundinem in manu tua, imò stabas tremēs & pauens, & qui compateretur nō erat. Eras illis spina in oculis, nec fatiari poterant; nisi te morte turpissima damnatum in crucem egissent. Hinc clamabant: Tolle, tolle, crucifige eum. Quid ita Domine sine misericordia clamauit, Tolle? Peccata mea, quæ verè te premebant coram Deo Patre omnipotente,

qui

qui volebat omnium nostrum redemptionem à vinculis diaboli: qui non aliter, quam sicuti imperium sibi usurpauerat per meam superbiam, propriam voluntatem & inobedientiam; ita nunc è contrario per tuam humilitatem, patientiam & obedientiam, prostratus superari debebat. Hoc quæso Domine quotidie sit in corde meo, ut per istud à peccatis præseruatus, numquam à dæmone per pusillanimitatem, aut aliam quamuis tentationem, vincar: sed magis cogitem, quòd vna gutta pretiosi sanguinis tui pro me effusi plus virtutis habeat, quam omnia totius mundi peccata: sileo de tua inexplicabili passione, quæ ad vnam guttam pretiosi sanguinis comparisonem non habet; nec etiam peccata mea, quantumuis multa & magna, sunt æstimanda respectu peccatorum totius mundi. Desperabo igitur, memor tuæ benedictæ passionis? Nequaquam. Tua etenim inexplicabilis bonitas, quæ te ad patiendum pro me impulit, in perpetuum me conseruabit.

Dicebat illis Pilatus: Regem vestrum crucifigam? Responderunt Pontifices:

Non habemus Regem nisi Cæsarem. Quid dicunt isti miseri homines? Reiciunt illi te Regem viuum, Regem cæli & terræ, & præferunt tibi hominem mortalem, vermiculum super terram reptitatem? Profectò facta factis compensantur. Cæsarem appellantes, te Dominum Deum repudiant. Verùm ab eodem quem tibi anteponunt, oppressi, & in nihilum redacti sunt, quando Titus & Vespasianus filius & pater eos circumdederunt vallo, & in terram prostrauerunt, sicuti ipsi te, & Patrem tuum cælestem persecuti fuerant. Numquam enim benè cedit illi, qui te fontem vitæ derelinquit. Nam qui te amicum habet, habet & creaturas sibi addictas, & quiduis per ipsas à te consequi potest. Sed qui tibi contrarius est creatori, quomodo creaturas sibi fauentes habebit? O quàm fragile fundamentum ponit, qui in homine confidit! Maledictus enim, qui carnem ponit brachium suum. Homines namque in horas mutantur, vt si hodie amici, cras inimici comperiantur. Tu verò Domine charitas es, & manes in perpetuum.

tuum: Tecum igitur ego manebo. Licet mihi sis factus sponſus ſanguinum, & quaſi faſciculus myrrhæ, cū te videam Regem corona ſpinea coronatum, atque ita deturpatum, vt vix hominis ſimilitudinē referās; tamen cum tua corona ſpinea mihi charior es, quā omnes honores, diuitiæ, aut voluptates huius ſæculi. Es namque Rex gloriæ, ſicuti poſtea patebit. Si igitur iam tibi compatiar, tandem etiam tibi cōregnabo. Da Domine hæc ita proſequi, ne aliter regnum tuum in terris æſtimem, quā in humilitatē, patientia & obedientia, quod hīc ita me tecum perdam, vt poſt hanc vitam in æterna me apud te inueniam. Conforta me tamquam ſtrenuum militem, qui in omni tribulatione fortiter tibi aſtem, & vexillum patientiæ manu tenendo, in mortem vſque te ſequar. Nam te quæro, te deſidero, apud te viuere & mori cupio, quidquid dolorum aut tribulationum mihi eueniat. Et ſi hoſtis malignus vñquam mihi ingeſſerit, quod tuo diuino honori ſit contrarium, hoc deteſtor & anathematizo, nec volo hoc vllō modo ac-

ceptare : & si videar acceptasse, non tamen est hæc mea mens, & peto, qua possum humilitate maxima, ne in perpetuum me assensum præbuisse existimes. Nam apud te qui mihi factus es sponsus sanguinum manere volo, nec quæram alium in perpetuum. Hæc, ô Domine, tua diuina gratia confirma, & rata habe nunc pro tunc, & tunc pro nunc, ne vmquam me à te separari contingat. Amen.

PARS TERTIA.

Pilatus videns quia nihil proficeret, sed magis tumultus fieret, volens populo satisfacere, adiudicauit fieri petitionem eorum. Et accepta aqua, lauit manus coram populo, dicens: Innocens sum ego à sanguine iusti huius, vos videritis. O Domine, nullus hîc fuit qui corpus aut animam daret pro te? Totus mundus erat in maligno positus, & non inueniebatur qui operaretur bonum ad vitam æternam obtinendam, nisi hæc tua benedicta passio præcederet. Nam per tuam mortem, iram Patris sedari necessum erat. Hinc nullus corde aut opere pro te loqui poterat. Ira Dei super

pec-

peccata nostra ita commouit populum, & reddidit pusillanimum Pilatū, quod à tumultuariis sit superatus. Eia Domine, in quantum peccata mea causerunt mortem tuam, in tantum da mihi ea in posterum odisse, ut te ita redamem, sicuti me prior amasti, ne tui amoris in perpetuum obliuiscar. Tu hæc omnia præsciuiſti, & has diras calamitates ex obedientia quàm libentiſſimè acceptaſti. Sed vera tua innocentia in iuſtitia vera latere planè nequiuit. Vnde Pilatus ſententiam pronuntians, ſeipſum ſecundùm rectam iuſtitiam condemnauit. Quia te quem iuſtum nouerat, morti adiudicauit. Et hæc propter nos libenter admodum pertuliſti. O ſi in tribulatione mea hoc intelligerem, ut delicta mihi eſſent, quando in innocentia mea pati haberem!

Pilatus lauit manus ſuas, tamquam liber à peccato, cùm interim procederet in malo, & malignorum petitioni, voluntatem eorum perficiendo, annueret; & te iuſtum, imò iuſtitiam ipſam, damnaret. Poſſe ne ita homo excuſari à peccato? Nequaquam. Deus enim

Pater

Pater tuus cælestis sic nō irridetur, cū magis cor & intentionem hominis, quā externa verba intueatur. Lotio enim manuum non liberat malam voluntatē, qua quis homines magis quā omnipotentem Deum timet. Da ergo Domine illam sapientiam, qua in omnibus negotiis secundū rectam rationem agam, & tuo diuino honori seruiam. Sit cor meum sincerum; & secundū exteriorem hominem non alium me declarem, quā secundū interiorem in me sentiam, ad gloriam nominis tui summam, & animæ meæ salutem promouendam. Nam tibi nequaquam imponere possum, qui multo perfectiūs cognoscis etiam minima mea ab intus, quā homo aliquis prudens mea euidentissima ab extrā consideret. Fac ergo ex me & te vnum Domine, vt tecū perfectē tamquam sponsa cum suo sponso conueniam. Amen.

PARS QVARTA.

ET respondens vniuersus populus dixit: Sanguis eius super nos, & super filios nostros. O. quantopere hic populus excæcatus fuit, vt omnia mala tibi

tibi illata in ipsos redundauerint. Sanguinem tuum super seipsos requisierunt, & terribiliter ipsis superuenit: adeò, vt in hodiernum vsque diem, vindictam sentiant, & contemtibiles facti sint omnibus nationibus & linguis, tam infidelibus quàm fidelibus. Sit quæso hic pretiosus sanguis tuus, Domine, nobis in bonum, & non in vindictam. Væ nobis, si sanguis tuus vindictam postulanerit. Tunc enim hîc & in futuro pœnæ nobis dandæ fuerint. Sed si nobis cooperetur in bonum, adferet gaudium hîc & in perpetuum. Nam ad hoc effudisti pro nobis sanguinem tuum pretiosum, vt nos in eo tamquàm in balneo lauaremur, per quod mundati à peccatis, tecum in patria locum haberemus. Exhilareret ergo me hic tuus pretiosus sanguis in corpore & anima, solatium mihi præstet contra omnes hostes, quò secundùm rationem & intellectum reparatus, à nullo impediar, quin tandem ex hac vita ad vitam æternam felicem transitum faciam.

Tunc dimisit illis Pilatus Barabbam,

missus

missus fuerat in carcerem, quem petebant, te autem flagellatum tradidit voluntati eorum. Iam, ô Domine, data est sententia super te quòd iuxta desiderium Iudæorum in cruce mortem subires. Tua sanctitas, probitas, virtus, nobilitas & diuina Maiestas, nihil tibi præstiterunt, quin te mori oporteret, & hoc propter me. Quid ego igitur volo me excusare ne quid patiar pro te, cùm tam voluntariè te ipsum pro me in mortem tradideris? Sed est ne mirabile? Barabbas latro dimittitur, & tu vita ipsa morti adiudicaris. Quorsum ego volo in admirationem trahere, si alio liberato ego interdù pati habeam? Non est quòd me alicui alteri præferam, cùm fortè omnium pessimus sim. Si ergo me inueniat tribulatio, quæ alium transit, non est quòd putem mihi iniuriam fieri, cùm tu Dominus meus & Deus meus præ homicida mortis sententiam in te sumpseris. Si ego nihil haberem pati in terris nisi iniuste, & malitiosis parceretur, sufficiens in hac tua passione solatium haberem, quòd videlicet non essem melior te: sed magnam ducerem

gra-

gratiam , quòd dignus fierem pati aliquid, cùm alij in deliciis viuentes, miseriam & dolorem ignorent. Imò dum ad hanc tuam passionem respicio, non potest mihi tanta fieri iniuria , quanta tibi Domino meo ac Deo meo propter me & meam salutem illata est . Nam quid sum ego respectu tuæ diuinæ Maiestatis, qui ne nominari quidem merui ante oculos tuæ diuinitatis ? Et quis est peccator, cuius respectu ego possem superbire ? Est aliquod genus peccati sub sole, à quo me liberum estimare queam ? Non sanè . Et si hætenus hoc vel illud non commiserim , facile tamen in illud incidissem , si tua diuina bonitas me non præseruasset. Ne igitur Domine in vlla tribulatione sãm impatiens , sed respiciam semper ad iniuriam & vim tibi propter me illatam; & sic solatio percepto , gaudium existimem, quòd ego per meam miseriam tuę benedictę passionis particeps fiam. Amen.

FERIA

FERIA QUINTA.

*Prima MEDITATIO, de Crucis
baiulatione.*

PARS PRIMA.

BENIGNISSIME Domine, iam susceperunt te, deposita purpura, & propriis vestibus indutum educunt te, crucifigendum. Quæ tormenta, quas contumelias tibi non irrogarunt? Cùm iam ad crucifigendum te educerēt, propriis rursus vestibus te induerunt, ut omnibus innotesceres. Fueras vir magnus, & insignis, ac in summo honore habitus, cuius fama in exterarum nationes erat diuulgata virtute diuinitatis tuæ, qua turbas sæpiùs paueras in solitudine, ex quo te Regem creare venerant. Multos cæcos illuminaueras, surdis reseraueras auditum, leprosos mundaueras, mortuos suscitaueras, imò Lazarum quatrduanum, quod totus mūdus mirabatur, ad vitam reuocaueras; & iam in paschate, quando Iudæi & gentes ex cunctis terris conuenerant, cum summa

con-

contumelia eductus es ad crucifigendum. Imò propriis te induerunt vestibus, ut quicumque te antè viderat vel audierat, vel etiam loquenti de te auscultauerat, iam hoc symbolo te recognosceret; atque hinc colligeret, quòd hypocrita & fallax homo fuisses, qui sub specie virtutum & bonorù operum, tantus peccator hanc contumeliæ viam ad montem Caluariæ promeruisses. Quomodo, Domine, post tot virtutes, tantaque bona opera, maiori potuisses contumelia affici? Si tecum tam turpiter egerunt, qui es virtus & veritas ipsa; quid ego volo excandescere, si quandoque ignominiam patiar? Tu eras iustus, imò Deus ipsa iustitia, & hæc tolerasti cum patientia; volo ego reus & peccator maximus irasci propter aliquam contumeliam, quæ mihi inferri possit? Ego tantum pati nequeo, quia amplius iniquitatibus meis promeruerim. Eia Domine, imprime hanc inauditam tuam contumeliam cordi meo, ut ad eam respiciens, nullam ignominiam mihi illatam sentiam. Hæc namque tua contumelia omnem confusionem superat, ut

merito

merito pudore suffundar, si quando simile habeam pati, quod in infinitum promerui. Per hanc igitur tuam contumeliam ita commoue cor meum, ut ego illa occupatus, iniuriam mihi illatam non animaduertam; sed cogitem quod ita deceat, & minor sit peccatis meis.

PARS SECUNDA.

EDuctus es ad montem Caluariæ, portans propriam crucem. Est ne hæc summa contumelia, quæ tibi illata est? Omnino Domine. Nam hoc quod tibi contigit, nulli unquam mortalium usu venit, ne latronibus quidem tecum crucifigendis, & dignam facinoribus suis pœnam expectantibus. Tibi verò crucem portandam imposuerunt, quod te summa ignominia afficerent, atq. isto symbolo omnibus notum facerent, te inter omnes maximè reum mortis, & plusquam hi latrones, qui tecum in mortem ibant. Dum intueor personam, quam tu innocens assumpsisti, ut tu ipsa sanctitas hæc pari volueris in persona totius humani generis, non possum satis mirari tuam infinitam charitatem, qua tu qui peccatum non feceras, in

cuius

cuius ore dolus inuentus non fuerat, tantum propter nos hanc summam contumeliam in te susceperis. Sed hinc colligo, quis sum, Ego namque hanc extremam ignominiam promerueram, ut meritò semper habeam occasione humiliandi me, quò subiiciar tuo regimini, qui in tantum me dilexisti, Nam si tanti factus sum cum adhuc essem inimicus; quanto magis mihi intendes nunc, cum me lotum pretioso sanguine tuo sponsam tuam effeceris, & verissima carne tua & sanguine quotidie cibaueris? Ne igitur Domine in posterum diffidam de tua ineffabili bonitate, sed accipiam de manu tua cuncta quæ mihi eueniant; & cogitem quòd tam tribulationes & dolores quàm perfectissima gratia mihi in bonum cooperari possint, cum etiam tribulatio in gratia, gratia magna sit.

P A R S T E R T I A,

O Domine, hac crucis via adimplesti figuram quæ in Isaac summi Patriarchæ Abrahamæ filio præcesserat. Dum enim Pater cælestis mandaret Abrahamæ, ut filium suum vnigenitum offerret in

vno montiū sibi monſtrando (*Gen. 22.*)
impoſuit illi ligna holocauſti portan-
da. Ad hunc modum tu verus Iſaac,
Abrahæ & omnibus nobis lignum ſan-
ctæ Crucis libenter admodum ex obe-
dientia Patris , propriis humeris ad
montem Caluariæ deportaſti ; vt fieres
nobis riſus , id eſt, gaudium , eò quòd
nos per hanc miſerabilem crucis baiu-
lationem ab æterna inferni cruce libe-
raremur. Eia Domine largire , vt alta
mentis contemplatione hæc meditanda
ſumam, vt per crucem à Deo Patre tibi
impoſitam, diligenter attédam ex quan-
ta charitate crux mihi quotidie impo-
natur. Verùm ô Domine , intueri meā
magnam infirmitatem, & ſuccurre mi-
hi tamquam ſponſus ſponſæ , nec ſinas
me tentari ſupra id quod poſſum. Ego
libenter tecum obediam Patri cæleſti,
ſed inuenio me fragiliorem , quàm vt
ſolus crucem meam portem. Itaque
Domine adiua me , & da cum tenta-
tione promentum , vt ſuſtinere poſſim;
ne charitas in me per tentationes dimi-
nuatur, ſed augmentum ſumat , atq. ita
virtutē paſſionis in me experiar. Amen.

P A R S

PARS QUARTA.

CUm iam ita grauatus onere sanctæ Crucis progredereis, factus est tumultus per totam ciuitatē maximus; ante fores palatij aderat innumerabilium concursus populorum; quoniam (vt moris est) omnes ad hoc confluxerunt spectaculum. Murmurabat populus contra se inuicem, cum alius diceret te iustum & sanctum, alius turbarum seductorem. Alij dicebant: Itane relinquitur iustus, vt non sit qui cogitet in conde suo? alij dicebant: Transeat, ne vniquam in hominum memoriam reuertatur. atque ita, misericordissime Deus, fuerunt tibi amici & inimici. Verumtamen tu ad neminem respexisti, sed oculos ad Patrem tuum cælestem cōuersos habebas, & ad eius obedientiam in finem vsque sub cruce perseuerasti. Eia Domine sis mecum, & hanc perfectionem in me operare, ne vniquam per gloriam aut ignominiam, per amicos aut inimicos, per speciem amoris aut odij à te separer; sed permaneam tecum in tribulationibus ad coronam vitæ consequendam, quam per

G

hanc

hanc diram crucis baiulationem nobis impetraſti. Verùm portabas crucem in ceſſu humili, dimiſſo vultu, totus fatigatus & anxius: quippe qui tota nocte fueras colaphizatus, conſputus, illuſus atque oppreſſus, poſteà flagellatus ac ſpinis coronatus, Deſecerat planè in te naturalis virtus, propterea cruciabar ſ immaniter, atq; in omnibus his patientiam cum humilitate coniunctam habuiſti, cum tamquam ſpōſa viam illam tristem ad ſponſum ingredereris; vt & nos, in quorum perſona hanc viam diſcillimam ſtrauiſti, in patientia & humilitate crucem noſtram portemus: quò ad locum perfectionis deducti, vnum tecum efficiamur. Verùm tu, ô Domine, ſupple quò in me deſideratur, & da gratiam, quam nondum habeo: tolle à me omnem infirmitatem, & fer auxilium: da gratiam, & conforta me, vt per te ſponſum meum, ſiam quod non ſum, & perdam quod malum in me inueneris, quò per te ipſum tibi verè vniri merear. Amen.

Secun-

*Secunda MEDITATIO, de
ipsa Crucis via.*

PARS PRIMA. ¶

O Benignissime Deus, sicuti in die Palmarum cum magna gloria & honore ingressus es civitatem Ierosolymitanam, turbis acclamantibus: Hosanna filio David: benedictus qui venit in nomine Domini: & vestimenta sua deposuerunt, & ramos de arboribus cadentes strauerunt in via: ita nunc cum omni ignominia vestibus propriis reindutum, & grauissimo crucis onere grauatum te ad montem Caluarię educunt. O Domine, quis poterit comprehendere tuorum operum & passionis amarę mysteria? Verē enim opposuisti illis altitudinem diuinę Maiestatis, quę in die Palmarum sese manifestauit, & immania peccata totius humani generis, quę in die Parasceues per passionem tuam & mortem manifestantur. Ex eo namque quod nostra innumera peccata in te suscepisses, tam tristem & difficilem viam in-

gressus es: atque ita miscuisti diuinam altitudinem, & humanam fragilitatem, faciens ex his medicamentum nobile ad nos sanandos & cōfortandos in anima & corpore: vt semper, quomodo-cumque etiam nobiscum agatur, contenti simus. Eia Domine, da mihi miserrimo peccatori singulariter hoc cogitare, vt semper mihi benè sit, siue in tristitia siue lætitia inueniar; quòd te laudem atque glorificem, tam de meis imperfectionibus subtracta gratia tua diuina, quàm de maximi perfectione in summa contemplatione, si quando in me operatus fueris. Scio equidem & verum iudico, quòd in subtractione tuè diuinæ gratiæ tam benè gratia operetur, quàm in summa cooperatione Spiritus sancti. Sis igitur ô Domine in me, vt in omnibus hoc sentiam in me, quod & in te est. Amen.

PARS SECUNDA.

O Misericors æternæ Deus, quàm tristem & miserabilem viam ingressus es, dum crucis onere grauatus, ires ad montem Caluariæ, vt debitum pro nobis solueres, & de diaboli tyrannide

nide nos redimeres. Eras per totum corpus miserabiliter flagellatus, & plenus vulneribus, eras grauatus dira corona, quę septuaginta duo vulnera benedicto capiti tuo apposuerat. Crux erat magna & ponderosa, insuper longa, vt à tergo per terram & lapides traheretur, & per illum tractum intolerabilem dolorem sentire, vt etiam totum benedictum corpus tuum expauesceret. Præterea quoties progressum faciebas, toties altius radices agebat corona spinea benedicto capiti tuo impressa, vt etiam pretiosus sanguis tuus per benedictam faciem tuam in terram proflueret. Quis ô Domine satis superque meditando expendere potest, quantos dolores in hac via crucis tuleris? Eia Domine, trahe me in præsentiam tuam, vt quasi in spiritu videam, quàm desolatus hîc fueris propter me, vt & ego quandoq. in mea desolatione solatium percipiam. Dignare quæso hos tuos intolerabiles dolores tam arctè imprimere cordi meo, vt omnium miseriarum obliuionem in me operentur. Singulariter Domine, quando cogitationibus prauis & inor-

dinatis, vel etiam phantasmatis obruor, fac cor meum huc conuersum habeam ad tempus meum vtiliter transigendum, ne propter phantasmata varia iacturam temporis faciam, & profundius in foueam desperationis demergar; sed potius per huius benedictæ passionis tuæ meditationem, tēpus lucrifaciam, quò in corde meo illuminationem, & in intellectu doctrinam percipiam. Nam per meditationem sacrosanctæ passionis nō tantum solatium inuenio in tribulationibus meis, aut ad cordis mei illuminationem; verum etiam secundum intellectum addisco, quomodo humilitatem, patientiam, & obedientiam exercere debeam. Eia igitur Domine, suscipe me in huius miserabilis viæ tuæ contemplatione, vt hīc tamquam in schola virtutū & perfectionis inueniar. Amen.

PARS TERTIA.

CUm iam esses in hac tristi & sanguinea, cum cruce, via, obuiam habuisti in hac desolatione sanctissimam matrem tristem & anxiam; quæ miserabiliter te intuens, auxilium ferre nequiuit. Illa ex magno cordis dolore

c on-

concidit, & tu paulò post sub crucis onere prostratus es in terram; ita, vt mors vos absorpsisset, nisi diuina potentia, seuera hac in parte, vobis ad maiora certamina pepercisset. Non enim habebas in mandatis sub crucis onere succumbere, sed vt cruci tribus clauis confixus, quando Patri placeret, moreris: & hæc omnia benedicta mater tua præsens videre debebat, vt ipsa in corde sentiret, quod tu in corpore patiebaris. Hoc & animæ meæ sponsæ tuæ largire ô Domine, vt cum Maria matre misericordiæ in corde sentiam, quod propter me, & meam salutem, tam acerbè in corpore perpeffus es. Præcipuè Domine, qui adhuc habes portare crucem, fer eam in omnibus electis, qui propter nomen tuum patiuntur. Obuiam quæso procede nostri omnium matri Ecclesiæ anxie & afflictæ, quæ in tantum grauatur, vt multis in locis ad terram prosternatur: fer ei opem, & conforta per hanc tuam diram passionem, nec deseras illam vsque in finem: sed exurge quasi crapulatus à vino, & fac vindictam in hostes tuos, à quibus passim

tam miserè opprimitur, ut iam in mediis calamitatibus semel respiret, & se numquam à te deserendam sentiat: quia tu nobiscum es omnibus diebus vitæ usque ad consummationem sæculi. Dignare igitur aliquem excitare, cui gladium cum Gedeone tradas, qui cum omni diligentia in fortitudine defendat electam tuam sp̄sam, pro qua hanc viam difficillimam es aggressus, ne tuus pretiosus sanguis in vllō electorū percat. Euigila igitur Domine, & excita vnum Sampsonem, qui populum tuum ab hostibus liberet, quò sponsa tua charissima plenum super terram solatium in conspectu tuo percipiat. Amen.

PARS QUARTA.

IN hac etiam diræ crucis via obuiam habuisti Veronicam piam marro-
nam, quæ tibi vasto crucis ligno onerato, & pretiosi sanguinis sudore deturpato compassa est. Quare alacrior cum lacrymis occurrit, exhibens tibi linteam tamquam sudarium, quo benedictam faciem tuam abstergeres. Beata mulier, quæ digna fuit hac in parte tibi ministrare! Quia nullum bonum irre-
mune-

muneratum relinquis, qui potēs es exiguum pietatis opus magno gratiæ beneficio compensare. Quam ergo gratitudinem huic matronæ exhibuisti? Profectò beneficium quod simile non habet. Nam benedictam faciem tuam linteo impressam ei restituiisti. Quid pretiosius reddere potuisti? In hac tua benedicta facie, seipsam considerare poterat, ad discendam humilitatem, patientiam, mansuetudinem, lōganimiratem, & obedientiam, quę omnes virtutes superat. Nam tua benedicta facies erat tamquam schola perfectionis; in qua omnia, quibus intrinsecus & foris indiget homo, discere potest. Imò benedicta facies tua est dulcedo, & reparatio omnium vulnerum, & relaxatio omnis tristitię & tentationum; ut homo respiciens in benedictam faciem tuam, omnium dolorum & miseriarum obliuiscatur. Sed ut summatim dicam, benedicta facies tua, est satietas omnium quę homo desiderare potest. Qui namque te habet, omnia habet; & qui gaudet benedicta facie tua, te gaudet. O si & mihi hac gratia eueniat, ut cum pia Veronica tibi

obuiam procedam, ad idem benefici-
cium, quod ipsa consecuta est, obtinen-
dum. Ita Domine, munda & conforta
me, ut quotidie cum mundo cordis mei
sudario tibi obuiem, ad miserabilem
sanguineam faciem tuam abstergen-
dam, per intimam benedictæ passionis
tuæ contemplationem, quò in spiritu
tam perfectè, ac si corporaliter præsens
essem, in tua salutari passione me exer-
ceam, & expendam quàm tristem &
acerbam viam hîc ambulaueris, onus-
tus duro sanctæ Crucis onere, grauatus
spinea corona, ac per totum corpus vul-
neribus sulcatus, ut ne homini similis
videreris. Hoc, benigne Domine, ex
toto corde meditari studeam cum gra-
tiarum actione: recogitem in amaritu-
dine animæ meæ, cum vera cordis con-
tritione, quòd causa sim horum om-
nium: recogitem cum tanta charitate, ut
aliud non affectem, nisi inhaerere tuis
vestigis, quò tua benedicta facies cum
gratiarum actione cordi meo imprima-
tur; ne vniquam in perpetuum tuæ be-
nedictæ passionis obliuiscar, sed omnia
mea verba, facta, & cogitata, imò ci-
bum

bum & potum cum tuo pretioso sanguine misceam, & non nisi de tua amara passione loquar : & si comedam aut bibam, nihil aliud cogitem, nisi de hac desolata crucis tue via, quam & ego omnibus diebus vite mee ambulare desidero. Imò quaeso des mihi, ne vigilando, aut dormiendo, aliud cogitem vel somniem, quàm de tua benedicta passione, de qua in tempore & æternitate nil nisi vita & salus promanant. Quod si, ô Domine, hanc tuam salutarem passionem cordi meo imprefferis, saluus ero, & Patri tuo cælesti hîc & in futuro placebo. Quod in me dignetur operari Spiritus sanctus, qui solus testimonium dat cordi, quod ego tecum sim, & tu mecum, quò tu cum Patre & Spiritu sancto viuas in me ex hoc nunc & in perpetuum. Amen.

*Tertia MEDITATIO, de adiutorio
Simonis, qui coactus opem ferre,
crucem cum DOMINO portauit.*

PARS PRIMA.

VBi iam, amantissime Domine, tanto onere grauatus hucusque ve-



nisses, eras totus defatigatus. Nam vires naturales deficiebant, cum totus exhaustus vix guttam pretiosi sanguinis reliquam haberes ad cor tuum fragile confortandum. Eras autem in tantum angustiarus sub crucis onere, ut metuerent ne in via extinguereris, quamuis diuinitas hac in parte durior te pro iustitia peccatis nostris debita confortaret. Poterat ne cadere Dñe in admiratione, quod naturaliter esses defessus, qui ita vndiq. angebaris? Imò mirum erat, quod adhuc respirares, dum corpore vulneribus dissipato tantum crucis onus portares, & vestimenta tua diris vulneribus adhererent, ut in toto benedicto corpore tuo nil nisi rubra caro apparet, ac insuper in capite haberes coronam spineam, quæ toties, quoties progredieris, aut te moueres, profundius sacrosanctum caput tuum penetrabat. Esset igitur admiratione dignum, quod in te anima angustia retur? Sed incomprehensibilis diuinitas te in vita conseruabat. Per hanc ergo diram passionem, succurre mihi Domine in necessitatibus meis, & noli mihi crucem grauiorem

rem

rem imponere, quàm sustinere queam. Ego peccatis meis multa merui, cùm hac omnia mihi perferenda fuissent. Sed non secundùm peccata mea facias mihi, neq; secundùm iniquitates meas retribuas mihi: verùm secundùm multitudinem miserationum tuarum respice in me, & miserere mei. Quando verò videris me Domine propter peccata mea dira pati, noli me derelinquere, nec in desperationem cadere sinas: sed me per veram in te spem conforta, sicuti tu solatium habuisti per charitatem erga nos: & quod in te operata est diuinitas, hoc in me tua diuina gratia perficiat, & tunc me non anget tribulatio, nec charitatē erga te diminuet. Amen.

PARA SECVNDA.

CUm iam, Domine, tãto onere grauareris, timebant ne in via sub cruce prostratus mortem incurreres. Vnde adsciuerunt tibi coadiutorem, non ex commiserationis affectu, sed ex destinata cordis malitia, vt videlicet ad impium propositum peruenirent, ac simul Prophetarum dicta, ac Patris cælestis voluntatem adimplerent, & sicut

Moyſes ſerpentem in deſerto, ita te in cruce exaltarent. Atque ita facile eſt inuenire diuerſas tuæ benediſtæ paſſionis cauſas. Pater namque cæleſtis voluit, vt in cruce, tanta iam cum afflictione portata, vitam cum morte commutares, & hoc pro totius humani generis peccatis. Prophetæ hoc multifariâ, multisque modis prædixerunt, ſacrificia ac cærimonię veteris Legis nobis præſignarant, ad agnoſcendam voluntatem Patris tui cæleſtis, qui ex charitate pro nobis hoc fieri voluit. At impij Iudæi hoc ex deſtinata malitia, ex odio & inuidia effectum curarunt, quod tu propter nos libenter admodum pertuliſti. Non autem reſpexiſti ad impios Iudeos, quibus magis quàm tibi ipſi cōdoluiſti, cum in extrema paſſione etiam oraueris pro ipſis, dicens: Pater ignoſce illis, quia neſciunt quid faciunt. Non, inquam, ad illos, ſed ad Patrem tuum cæleſtem reſpexiſti, cui etiam obediens fuiſti vſque ad mortem, mortem autem crucis. Ad hunc modum da mihi Domine crucem portare quotidie. Non intendam huic, aut illi, à quo mihi iniuria fiat; ſed tuæ
infi-

infinitæ bonitati, quæ illam mihi præordinauit. Omnes enim capilli capitis mei numerati sunt, & ne vnus mihi excideret citra tuam diuinam voluntatem. Et quare Domine hoc aut illud mihi euenire permittis? Non aliam ob causam, quàm vt ex mera charitate me tibi conformem facias, sicuti ex mera gratia me tecum torcular calcare dignum ducis; vt si hîc tibi compatiar, postea etiam tibi conglorificer. Amen.

P A R S T E R T I A.

EXeuntes autem inuenerunt hominem, Cyrenæum, nomine Simonem, venientem de villa, Patrem Alexandri & Rufi, hunc apprehenderunt & angarianerunt vt tolleretur crucem tuam, & imposuerunt illi crucem portare post te. O quàm fortunatus fuit hic Simon, ad crucem tecum portandam vocatus! Beatus enim, qui tecum portauerit. Crucem namque portare oportet, si non tuam, saltem satanæ. Sed vae illi qui satanæ crucem portauerit. Illius enim crux est ad initium facilis; verum ad finem nimis difficilis, vt etiam cum pusillanimitate coniuncta, hominem in despe-

desperationem adigat. Quæ est quæso, Domine, crux satanæ? Saltare, choreas ducere, die ac nocte cum sodalibus cibo & potu sese obruere, cum periculo vitæ genio indulgere, in cōtinuo garritu & contentione viuere, nullum tædium sentire in discurrendo & laborando ad terrestres thesauros congregandos, aut honores acquirendos. Hæc omnia secundum carnem homini sunt gratissima, sed finis omnium mordet vt coluber; vt homo, qui sic in bonis duxit dies suos, meritò cum amaritudine lacrymetur, quòd tanta temporis iactura se ipsum consumpserit. Lacrymarur inquam, quòd pro hisce deliciis & voluptatibus iam infernum sibi paratum videat, nec speret se ab hac cruce liberandum, quin huic temporali æternam crucem successuram magis metuat. Verùm enimuero, Domine, qui tecum crucē portat, onus graue fœcit in principio. Nam ieiunare & orare, omnibus sese inferiorem præbere, viuere in humilitate, patientia, & obedientia, tuis inherere vestigiis, valdè laboriosum est & molestum hominibus; attamen cum

tem-

tempore hæc crux tua facilior, suauior,
 & dulcior redditur, dans tranquillita-
 tem & pacem hîc & in futuro. Adsit
 igitur mihi Domine crux tua, ne crux
 diaboli in me locū habeat. Quid enim
 mihi iucundius esse potest cruce tua,
 quæ me tecū & cum omnibus electis in
 tribulationibus tuis perseverare facit?
 Perseuerāti autem promisti mihi cum
 tuis sanctis Apostolis, vt manducem &
 bibam tecum in mensa tua. Hîc igitur
 ita tibi compatiar, vt etiam in perpe-
 tuum congaudeam. Amen.

PARS QUARTA.

Sed Simon coactus est crucem por-
 tare post te. Licet autem egrè admo-
 dum fecerit, tamen suppetias tibi tales
 quales tulit, de necessitate faciens vir-
 tutem. O diuinam bonitatem, quæ con-
 sueta opera sapientiæ tuæ reserasti, quā-
 do de malitia sapientiam, de nocendi
 proposito benefaciendi affluentiam, de
 malo bonum, de peccatorum tenebris,
 miserationis fecisti splendescere lucem,
 atque de ipsa crucis angaria spirituale
 contulisti Sacramentum. Quid igitur
 hoc Sacramento significasti? Sanctam
 necessi-

necessitatem meliorem esse malitiosa libertate. Tu namque nos cogis, vt voluntarios facias, & necessitatem in virtutem commutas. Noli igitur Domine intueri meam magnā imperfectionem, sed tuam immensam bonitatem ac sapientiam: nec agas mecum pro desiderio meo carnali, verū pro tua sanctissima voluntate, & animæ meæ salute. Tu namque meliùs nosti, quàm ego ipsemet, quid mihi expediat. Si igitur pertractus dolorum, non libenter patiar secundū sensualitatem, non hoc cures: sed semper diuina fiat voluntas ad gloriam nominis tui summam, & animæ meæ salutem, siue gratum, siue ingratum carni meæ fuerit. At verò, amantissime Domine ac Pater, da mihi cum tempore illam sapientiam & fortitudinem, vt meipsum vincens, in omni tribulatione tuam sanctissimam voluntatem cognoscam, donec extra meipsum me recipiens ad tuam sanctā vñionem perueniam, quò in omnibus tam aduersis quàm prosperis, tam in dulcibus quàm amaris, tam in tribulatione quàm in pugna tecum vñum efficiar, & post hanc

hanc vitam locum habeam, vbi tu es omnia in omnibus, & absterges omnem lacrymam ab oculis nostris, quò omnium malorum præteritorum oblitus, tecum tranquillitatem & pacem habeamus in perpetuum. Amen.

*Quarta MEDITATIO, de
crucis baiulatione.*

PARS PRIMA.

O Domine Iesu Christe, Deus Redemptor atque Saluator meus, hucusque iam peruenisti totus defatigatus, & labore quasi victus, & necdum liberaris, sed grauissimum sanctæ crucis adhuc portas onus. Modicum quidem Simon te subleuauit, sed potissimum crucis pondus adhuc sustines. Simon quidem parumper tibi succurrit, sed totā molem humeris sanctissimis sustentas. Quid igitur ego cōqueor de mea miseria quasi diuturna? Potest esse dolor maior quā tibi infertur? Dum igitur te intueor, qui es Filius Dei, & immane supplicium, quod innocēs, & propter me tantum, qui inimicus
tuus

tuus eram, pertulisti, meritò cōfundor conquerens de tribulatione mea, ve eam grauem æstimans. Ego enim perpetuum supplicium promerueram, quod tu Filius Dei viui temporali supplicio aboleuisti: nihil ergo in gratiarum actionem pro te in terris perferam? Planè. Nam si post Baptismum nunquam te offendissem, tamen charitas inter te & me tanta esse debebat, vt de nulla afflictione conquererer. sed omnia libenter admodum, ex vera charitate & fide, quam sponsa debet sponso, libentissimè perferrem, quidquid etiam illud fuerit. Suscipe ergo me erudendum in spiritu Domine, quò in corde meo sentiam immensam tuam charitatem erga nos, ad intelligendum quomodo in omni necessitate & tribulatione erga te affecti esse debeamus, vt pro amore ineffabili nobis exhibito, amorem semper rependamus. Verùm, ô Domine, hoc sine te ego consequi nequeo. Sis ergo in me tamquam in teipso, ad operandum in me sicut & in teipso; vt tibi per te semper placeam in omnibus, nūc & in perpetuum. Amen.

PARS

PARS SECVNDA.

O Nunc anima mea, & omnia quæ intra me sunt, egredimini, & videte Regem Salomonein, in diademate, quo coronauit eum mater sua Iudæa: videte, quàm tristi incessu portet onus grauissimum sanctæ Crucis, vt sub eo ad terram inclinatus procederet, sæpiùs per verbera & tractus inordinatos ad terram prostratus: respicite magnam eius miseriam & dolores grauissimos, vbi corona spinea grauatus, non alius quàm sanguine tinctus appareret: respicite diligenter, & non sine singultu & gemitu, vt hinc solatium in cunctis tribulationibus percipiatis.

O omnipotens sempiterne Deus, qui propter me te huic passioni subiecisti, me tibi spiritu atque animo coram fac adesse, ad inuendum te in hac tua tristitia; quò in cordis contritione docear seruire patientiam, humilitatem & obedientiam; & te per abnegationem meipsum, in omni persecutione & tribulatione quæ me inueniant, sequar; ac in cunctis confortatus cogitem, non me, sed te hac pati in me, quia tu es ca-

put,

put, sponsus, & salus mea. Si contumelia afficiar, non mihi eam inferri autumem: tu namque es in quem omnia redundant, quæcumque etiam minimis tuis, ut mihi, inferuntur. Si quid igitur in me pertuleris, à me non reiciam, sed cum gratiarum actione de manu tua accipiam, laudans atque glorificans te, quòd tuæ passionis me, quamvis aliquando in paruo, participem facias. Da mihi Domine hoc consequi ex acerbissima passione tua, ut non frustrà in spiritu tibi crucem portanti obviam processerim. Amen.

PARS TERTIA.

SEquebatur autem te multa turba populi & mulierum, quæ plangebant & lamentabantur. Merito planxissent, si te in veritate cognovissent. Quis enim non lamentaretur, considerata tua innocentia? imò quòd tu Dei Filius hanc contumeliam, quam ipse promeruerat, patereris? Profectò vel saxeo corde esse debebat, & omnium ingratisissimus, qui hinc non lacrymaretur, ubi duæ tam magnæ plorandi causæ offeruntur; videlicet, quòd homo peccator

cator hæc pati debuisset, & tu ipsa Iustitia, verus Dei Filius, qui peccatum non feceras, in cuius ore dolus inuentus non fuerat, pro homine hæc pati dignatus sis. Si horum fuissent memores, rectè fleuissent, & passionis tuæ participes fuissent. Verùm lamentabantur ex humano compassionis affectu, putantes te per magnū infortunium, quasi derelictum à Deo, in hanc miseriam incidisse, sicuti multi calamitates sustulerunt, & nesciunt quomodo. Sed hoc procul à te, qui non ex improviso, nec ex necessitate, sed ex libera animi voluntate, per obedientiam Patris, hanc passionem ex mera charitate propter nos, & propter nostram salutē, assumere dignatus es. Meritò igitur ego tibi compatiar, deplorans die ac nocte peccata mea, quæ tibi horum malorum occasionem dederunt. Insuper ex charitate lamentari possum, scilicet gratitudinis ergo, quod tu cū inimicus essem, in tantum me dilexeris, vt hanc ingredereris pro me viam, cū hoc nondum affectarem, aut petere auderem. Super omnia autem ex vera cordis contritione

meri-

merito in lacrymas quotidie prorumpere teneor, eò quòd peccatis meis innumeris hanc tuam diram passionem, quantum in me est, toties renouo, ac denuò tibi hanc immanem crucis molem portandam impono, quoties iterum peccari reus fio. Da igitur mihi Domine, ex charitate in gratiarum actionem lacrymari, quò indies benedictæ passionis tuæ beneficia in me renouem. Amen.

PARS QUARTA.

ET tu conuersus ad illas dixisti: Filie Ierusalem, nolite flere super me, tamquam procul à Deo, & ex necessitate patientem, aut à sanctorum societate segregatum, cum ego spontaneè ex Patris mei cælestis obedientia & libente admodum hæc patior tamquam transitoria, quæ citò finem habebunt. Nolite ergo flere super me, sed super vos ipsas flete, & super filios vestros. Flete (dico) quòd tales filios genueritis, qui peruersi hac temporali afflictione inafficiant, pro qua ipsi æternaliter puniendi erunt. Quoniam ecce dies veniunt, in quibus dicent: Beatæ steriles!

& ventres qui non genuerunt, & vbera quæ non lactauerunt. Dies, inquam, venient, videlicet deuastationis Ierosolymitanæ, & nouissimi iudicij; in quibus dicent: Beatæ steriles; eò quòd nos natæ filiæ perditionis, filios iniquitatum procreauerimus, cum quibus temporaliter afflictæ in obsidione ciuitatis Ierosolymitanæ, nunc etiam æternaliter puniendæ erimus. Tunc dicent montibus, Cadite super nos; & collibus, Cooperite nos, ne vultum Dei omnipotētis iratum videamus. Quia si in viridi ligno hæc faciunt, in arido quid fiet? hoc est, Exercent in me hanc tyrannidē, qui illis nihil mali feci, sed salutis tantum admonui; quid in arido fiet, hoc est pessimis hominibus; qui nihil boni facientes, facti sunt sicut pix & sulphur fomites inferni? Quoniam si iusto in terris hæc mala inferuntur, impius ubi manebit; quando ratio exigetur tam exacta, vt nihil inultum māserit? His verbis vsus es ad inutiles lacrymas prohibendas: lacrymæ enim, quæ non ex vera fide & sincera charitate proueniunt, coram te sunt odiosæ, & commodi nihil

H adfe-

adferunt, nisi afflictionem carnis, & sanguinis consumptionem. Sed si lacrymemur ex vera fide, ex cordis contritione, & charitate sincera, auro & argento præponderabunt, & maioris fient apud te, quàm margaritæ, aut quidquid in terris æstimari possit. O igitur omnipotens & misericors Deus, qui me tanto persecutus es amore, vt propter me hanc diram viam ingressus sis, aperi mihi intellectum, & da sapientiam, vt caueam mihi à lacrymis infrugiferis, quas oculi mei indies eiiciunt, & nescio quorsum, nisi vt me ipsum affligam, cum nulla subsit causa, nisi mea ipsius impatientia & magna superbia, quod videlicet vel paruifiam, vel meam voluntatē obstinatam perficere nequeam. Ab his quæso tu, ô sponse sanguinum me libera, & quando cor meum tanto pere grauatur aliquibus extraneis & intraneis rebus tibi ingratis, da vt me ipsum relinquam, & ad te me conuertam; ac difficultatem, quam interdum naturaliter experior, in te traham, & hanc tuam diram passionē amplectar, meam multam ingratitudinem considerem

atque

arque ita defleam mea peccata innumera, & ex animi gratitudine effundam lacrymas pro incredibili amore tuo erga me miserrimum peccatorem, vt sic fructum lacrymarum percipiam, & tuo exemplo humilior arque magis patiens efficiar, accipiens cuncta (vndecumque etiam, foris an intrus mihi perueniāt) de manu tua, quò semper in meipso tranquillus inueniar, & te Saluatorem meum sine intermissione laudem arque glorificem, nunc & in perpetuum. Amen.

*Quinta MEDITATIO, de ascensu
DOMINI in montem Caluaria.*

PARS PRIMA.

DVcebantur & alij duo nequam tecum, vt interficerentur. O amantissime Domine, vbi honor, vbi virtus tua, quando tamquam impius & peccator cum malefactoribus ducereris? Merito cogitem & dicam te meam assumpsisse personam, alioquin impossibile fuisset te tanto decore affici. Ego enim, ego ipse sum, qui hac contumelia dignus eram. Pec-

cata namq; mea promeruerant in conspectu Patris cælestis. Nec solùm cum malignis hominibus terræ, sed & cum tartareis spiritibus numerandus eram. Verùm tu Filius Dei viui ipsa iustitia & virtus, in cuius ore dolus inuentus nō est, in te sumpstisti omnium nostrum iniquitates. Vt igitur me eriperes de consortio malignorum spirituum, tu ipsa iustitia inter malefactores terræ numerari voluisti. Hæc in animo meo versentur, Domine, quoties parui fio in terris, & præter meritum maledicor & contemnor. Non enim aliter cum sponsa quàm cum sponso agendum erit. Si te tanta contumelia affecerunt, non mihi parcent. Et parum est si vnà tecum hoc modo patiar, cùm tu innocens tantum pro me passus es. Verùm ego si propter te contemnar, hoc vel duplo premerui. O igitur misericordissime Domine, da tuo exemplo omnia perferam, non æstimem me ipsum, qui sum ad instar vermiculi super terram reptantis, qui tam facile à te consumi possum, atque ille pedibus conculcatur. Da mihi veram humilitatē ad cognoscendum

dum meipsum, quò inter homines tamquam minimum me reputem. Amen.

PARS SECVNDA.

ET perduxerunt te in Golgatha locum, quod est interpretatum Caluariæ locus; vbi omnes malefici, latrones, homicidæ, & malignantes, pro quantitate criminis, morte plectebantur. Non erat satis Iudæis malignis, quòd te in via inter latrones numerassent, quin etiam locum passionis cum illis communem habere deberes, ne quidquam eorum quæ peccata nostra promeruerant, in te negligeretur. Et hæc omnia tibi Pater cælestis imposuit, vt quàm perfectissimè pro peccatis nostris satisfaceres; & nos criminum gravitatem, pro qua te vnicum suum Filium adeò percussit, intelligentes, semper nos ipsos gratos pro tanta charitate, per te nobis præstita, exhiberemus; & à peccato deinceps abstinentes, libenter ex charitate pro te vicissim pateremur. Propterea, charissime Domine, Saluator meus, da gratiam, quòd in omnibus actionibus meis prudens, à peccato mihi caueam, assiduè paratus ad perferen-

H 3 dum

dum pro tuo sanctissimo nomine, quicquid etiam mihi eueniat, vt sic charitatem pro charitate, secundum fragilitatem meam, rependam. Fac insuper prudens sim, ad discernendum inter tentationem & peccatum, ne per ignorantiam contrister, quando in spiritu mihi gaudendum fuerit. Verum doleam ex toto corde, si quandoque in tentationem inductus, peccato assensum (quod tu auertas) præbuero. Gaudium autem mihi sit, cum iam tentatio, cui occasionem non dedi, transierit, certus, quod illa in coronæ ornatum maiorem mihi fuerit. Huius indigeo, Domine mi, tu scis. Da igitur gratiam, ne pusillo corde existens, virtutibus aut bonis operibus obstaculum ponam.

PARS TERTIA.

Verum, ô sponse, quàm asperam viam aggressus es, cum montem Caluarię altum ac prominentem ascenderes! Hactenus quidem subsidium tale quale habuisti à Simone, qui parum te subleuabat à tergo: verum nunc grauissimo crucis onere suscepto, solum montem ascendisti, vt teipsum eorum

om

omnium, quæ iam perpeſſus fueras, & etiamnum perferenda erant, admoneres. O quàm fuit hic miſerabilis & ſanguineus inceſſus! Mōs erat pronus & altus, crux erat ponderoſa & magna, & tu coronâ ſpineâ grauatus, totus defatigatus & exhaustus, vt vix pedē mouere liberet; & his non obſtantibus, pro me hanc diram & inexplicabilem viam, nonaginta cruenta veſtigia faciens, ingreſſus es. O quantus dolor tibi fuit, dum tuum ipſius pretioſum ſanguinem pedibus calcareſ! Certè non minùs hoc te afflixit, quàm ſi proprium cor pedibus contriuiſſes. Super omnia autem exagitauit te, quòd pretioſus ſanguis ab indignis Iudæis ſit conculcatus, qui meritò illum recollegiſſent, ne vel vna gutta interiſſet, ſed in balneum pro ablutione criminum ſibi aſſeruaiſſent. Et quare, mi ſponſe, hanc viam tot doloribus plenam aggreſſus es? Vt nobis in omnibus neceſſitatibus aſſiſteres, ſolacium & auxilium præſtares, quòd faciliùs omnem tribulationem & dolorem vinceremus. Propterea, ô Deus, firmamentum meum & refugium, virtus & for-

tudo, adesto mihi in omni tentatione & angustia, in omni miseria & tristitia, præcipuè in hora mortis meæ, quando hic mons Caluarię mihi scandendus fuerit, quando ex anxietate & dolore oculi mei caligine obducentur, os meum loquela destituetur, sensus mei defecerint, & omnis vis à me recesserit, venę & arterię tabescere cœperint, & cor meum intra me rumpendum fuerit: tunc dignare me consolari, & confortare in vera fide, spe firma, & charitate perfecta: quibus ita stabiliar, ne vlla tentatione, si quæ superuenerit, vincar; sed in omni patientia & longanimitate, denarium à te nobis promissum, hoc est vitam æternam, expectem. Hoc operare in me, Domine, ne tua sacrosancta & amara passio in me, aut yllo homine, fructu suo destituatur: sed omnes, quod in monte Caluarię nobis promeruisti, hoc est regnum cælorum, consequamur. Amen.

PARS QUARTA.

CUM iam tu Dominus meus & Deus meus maximo labore crucis pondus in supremitatem mōtis deportasses, in tantum es defatigatus, vt sub
crucis

crucis onere in terram sis prostratus. Quod mirum non erat. Quare timen-
tes, ne sub crucis onere animam effla-
res, totis viribus occurrerunt, ut te ex
illo periculo eriperent: non ex commi-
serationis affectu, sed ex mera malitia,
ut videlicet propositum ad te crucifi-
gendum, adimplerent. Cum autem ad
hoc venisses, Pater te ad extremam pas-
sionem perferendam confortauit, &
conseruauit. Nam multa potest homo
pati, dum tibi ita placuerit. Ex hoc si-
quidem virtus tua diuina sapè innot-
scit, & in multis manifestata est Sãctis,
qui tantas & tam multas tribulationes
perpessi, ut humana natura iis ferendis
par esse minimè potuisset. Sed gratia
tua super omnia confortat. Quare, be-
nignissime Domine, conforta me in
omni afflictione, quam ab æterno super
me inducere decreuisti, ne vmquam
despondeam animum, sed in omni tri-
bulatione mea ad hosce tuos dolores
respiciam immanissimos, quos confor-
tatus, ex charitate tam libenter pro me
perpessus es. Imò cum iam naturalibus
exhaustus viribus sub crucis onere pro-

H 5 stra-

stratus iaceres, cum magna tyrannide te parum eleuatum à terra ad lapidem eminentiorem, vestibus exuerunt. Verum, ô quanta cum afflictione hoc peregerunt! Vestimenta tuis infinitis vulneribus adhæserant, quæ iam renouata nouum tibi dolorem per vulnerum ruptionem attulerunt; vt hæc tua denudatio, omnium præcedentium dolorum fuerit innouatio. Et hæc omnia summa cum patientia tolerasti propter me; vt etiam ad nostra peccata respiciens, de nullo dolore conquereris. Sit igitur hæc vestimentorum detractio, & dolorum tuorum omnium renouatio, mihi in interiori homine admonitio, vt veteri homine deposito, induam nouum qui secundum te creatus est, in iustitia & sanctitate veritatis. Non enim potero vmquam virtutibus exornari, nisi primum vitiis renuntiauero. Quando igitur mihi molestum fuerit vincere meipsum, humilitati studere cum superbus sim, obedientiam præstare cum arbitrium meum sequi malim, patientiam habere cum vindictam appetam, mansuetudini locum dare cum austeritate

tate

tate quadam loqui desiderem, tunc fac me reminisci huius tuæ tam inauditæ passionis, quam pertulisti, dum vestes tibi tam sanguinolenter detraherentur, vt hac consideratione, auxilium & solatium ad meipsum vincendum, impetrem. Non enim habeo hostem maiorem quàm meipsum, vt si quando meipsum vicerò, reliquos facile superaue- rim. Eia ergo Domine, adesto mihi, cōsolare, & conforta me, vt in omni mea miseria tecum sim, quò hîc viuens in gratia, postea tecum sine fine viuam in gloria. Amen.

FERIA SEXTA.

*Prima MEDITATIO, quomodo
vinum cum felle mixtum, DO-
MINVS noster gustauerit.*

PARS PRIMA.



Bi iam misericordissime Do- mine cum tanto dolore ve- stibus te exuissent, nudum, corona spinea grauatum, per totum benedictū corpus dilaniatum, ac vulneribus plenum, lapidi insidere fe-

H 6 cerunt;

cerunt; vbi tremens & pauens, vento ac frigoribus te penetrantibus, quieuiſti, vſq. dum ipſi crucem paratam haberēt. O Dñe, quid malitia hominum non excogitauit? quam afflictionem ante mortem non es expertus? Imò ne vlla anima periret, diutiùs & ampliora perferre paratus eras. Sed hæc omnia perpeſſus es ex immenſa erga me charitate, vt meritò confundar in meipſo, ſi quando de miſeria mea conquerar. Quid enim ego, reſpectu tuæ diuinæ bonitatis? vermiculus terræ, Deo omnipotenti comparatus? puluis & cinis, diuinę Maieſtati? peccator, ipſi Iuſtitię? Prætereà, dum ego patior, pro peccatis meis propriis patior; tu verò nihil mali feceras, & paſſus es pro me, vt à perpetuo exitio, quod delictis promerueram, me eriperes. Eia Domine, largire, vt in ſpīritu quotidie, lapidi frigidiffimo nudum cum tremore & pauore te inſidentem intuear, ac ita tibi compatiens à perpetuo tremore ac dentium ſtridore præſeruer. Porrò Domine, dignare me conſolari in omni anguſtia & afflictione ſpīritus, quæ interiùs exteriùsve in terris
me

me inuenire possit, quò in omni infirmitate, miseria & tristitia per hùc tuum tremorem & pauorem solatium percipere merear. Præcipuè autem cùm intrinsecus desolatus à maligno spiritu premor & angor, quasi non esset mihi in te Deo meo salus, & in tantas angustias redigor, ac si uiuus ad inferos pertraherer; tunc mihi in mentem veniat hic tuus timor & tremor, quò me ipsum & omnes inimicos meos vincam, ac tecum in omnibus tribulationibus meis perseuerem, sicuti tu in omnibus angustis tuis mecum permansisti. Amen.

P A R S S E C V N D A.

CUm autem sederes in hac miseria, dederunt tibi bibere acetum, seu vinum myrrhatum cum felle mixtum. O quàm durus fuit tibi populus tuus! Tradiderant obliuioni verba Salomonis, dicentis (*Proverb. 31.*) Date siceram mœrentibus, & vinum his qui amaro sunt animo. Vbi iam illorum naturalis sensus & affectio humana, cùm tibi Domino Deo meo, in tanta miseria cōstituto, tam acerbo poculo obuiarent? Profectò peccata mea hunc populum

indurauerant, vt tibi fuerint tam amari: peccata namque sunt ad instar aceti & fellis ori tuo benedicto: alioquin fuisset impossibile, quòd tibi Domino cæli & terræ tam duri, acerbi, & immanes fuissent. Numquid aliàs poculum aque frigidæ, quod bestiis terræ non denegatur, dedissent? Imò sanè. Hinc cognoscimus, quòd nos propter peccata magis odibiles corā oculis Patris cælestis fuerimus, quàm pecora campi. Verùm cum nos diligeret, te vnicum Filium suum pro peccatis nostris tam dirè percussit, vt nos iterum in gratiam reciperet. Eia igitur Dominus meus & Deus meus, da naturalem affectum & intellectum rationabilem, ne amplius tibi propinem acetum felle mixtum, sed potum purum & putum, tibi semper gratum; ne propter me toties contristatus, iam propter peccata & cōtumelias meas amplius affligaris, sed potius cordis mei sinceritate ac puritate, quantum in me est, exhilareris. Da etiam horum reminiscar, quoties ex voluptate appetitus cibi aut potus præter necessitatem obrepat, ac tunc omni sensualitati ac voluptati

luptati planè moriar. Præcipuè verò, vbi à te visitatus in morbum incidero, & gustus cum appetitu transierit, & omnia mihi cibaria amara visa fuerint, tunc consolare me per hoc vinum myrrhatum aceto mixtum, quod tibi in maxima afflictione propinatum accepisti; quò tibi gratias agam, quòd me dignū duxeris, vt tecum in tribulatione inueniar. Da insuper, ne vllò cibo aut potu meipsum oblectare studeam, sed cogitem mihi satis esse, si corpus hoc fœtidum, ad gratum tibi obsequium præstandum, sustentetur.

PARS TERTIA.

ET cùm gustasses vinum myrrhatum, noluisti bibere. O benignissime Domine, absque dubio ita eras exhaustus, vt cor tuum infirmatum bene confortasses, cùm vix guttam sanguinis reliquam tibi fecisses! Verùm peccatis nostris diuinę iustitię reluctātibz, voluisti tantum gustare acetum felle mixtum, & non bibere, licet sitim facillè sedasset. Non enim quærebas solatium in passione, sed opus perfectum vigore diuinę iustitię, cui per omnia satisfieri

opor-

oportebat. Cum ergo amantissime Domine ego in profundum tentationis descendero, memento huius extremæ iustitiæ in te peractæ, ut parumper mihi miserrimo peccatori condescendas, & in mea maxima fragilitate æstum tentationis nonnihil diminuas, & dulcedine diuinæ gratiæ mitiges, ne totus derelictus in foueam tentationis incidam, aut à te fonte misericordiarum recedam, & peream.

P A R S Q U A R T A.

POSTEAQUAM poculum aceto & felle mixtum gustasti, noluisti bibere. Non enim tibi placet opus nisi ex charitatis dulcedine promanet. Offero tibi opus peractum solo naturæ ductu, mixtum prauo affectu, irâ aut odio? gustas; id est, respicis quidem à longè, sed non imbibis, hoc est non acceptas, quia non delectat te, sed est ori tuo sicut vinum myrrhatum, aut acetum felle mixtum. O igitur omnipotens sempiterne Deus, da mihi cor purum & sincerum, quod aqua diuinæ charitatis impletum, tibi sit acceptum. Longè sit ab eo omnis impatientia & amaritudo, omnis ira & odium,

odium, omnis sensualitas & appetitus prauus, vt cor adimpletum optimo perfecte charitatis vino, tibi semper ex pura intétione placeat; quò in omnibus & singulis aliud non quæram nisi gloriam sanctissimi nominis tui, proximi felicem successum, & animæ meæ salutem. Sed si tunc mihi vnà tecum acetum felle mixtum proponitur per afflictionem & miseriam, quæ me fortè inueniat; tūc etiam vnà tecum, hoc de manu Patris cælestis accipiam. Et si illud gustauero, ne quæso imbibam, sed à me repellam, ne nimium contrister, sed cor meum equè tranquillum, in tua benedicta passione solatium reperiens, seruem. Sit mihi satis gustasse, hoc est animaduertere dolores mihi esse paratos, & statim eos à me vel silendo, vel cedendo, vel bona verba dando repellam, ne corde imbibam, quod postea mihi cum maiori afflictione eructet. Præterea Domine clemens & pie adiuua me, da intellectum & prudentiam, hæc tam fideliter exequendi, vt tecum sim, & maneam, hîc in gratia, & postea in gloria. Amen.

Secun-

Secunda MEDITATIO, quomodo voluntariè DOMINVS ad crucē subeundam sese resignarit.

PARS PRIMA.

CRuce iam parata, cum impetu in team te coniecerunt, vt omnia ossa tua commouerentur. O vere Isaac fili promissionis, in quo vniuersæ gentium benedicendæ sunt familiæ, quomodo Patri obtemperando, humiliter te substruem componis lignorum, teque in holocaustum præbens, ad mortem sufferendam subternis? Non auditur clamor, non contradictionis vox, neq. excusationis indicium, sed Prophetæ vaticinium impletur (*Isa. 53.*) Tamquam ouis ad occisionem ducetur, & tamquam agnus coram tondente se obmutescet, non aperiens os suum. O Domine, quis est homo, qui pro sibi amicissimo ad tam diram passionem, & mortem probrosam sese tradiderit? Et tu hoc fecisti non pro amicis, sed inimicis. Si hæc beneficia mihi inimico præstitisti, quid mihi iam amico denegabis?

his? Cùm me tamquam sponsam, spon-
 sus in balneo pretiosi sanguinis tui la-
 ueris; quomodo me peccatorem maxi-
 mum illa capiet dementia, vt de tua in-
 explicabili bonitate diffidam, aut me
 abs te derelictum mihi persuadeam?
 Qui sollicitus pro me fuisti cùm non-
 dum essem, & cùm perditus essem, pro
 me in mortem te dedisti, derelinques
 me nunc tot molestiis ac laboribus in-
 uentum, & pretioso tuo sanguine re-
 demptum? Eia Domine, da vt corde
 hæc quotidie expendam, ac in natura
 mea ita sentiam, ne vmquam despon-
 deam animum, quantocumque etiam
 mœrore affligar. Sed miseriam meam
 cum tua amara passione misceam: &
 sicut simplex potio, accedente nectare
 & ambrosia fit nobilis & præclara; ita
 tua benedicta passio meam multiplicem
 miseriam vincat, suauem & facilem
 reddat, ac patientia meritoriam; vt cùm
 libenter patior, in gratiarum actionem
 pro tua amara passione, in omni mea af-
 flictione solatiũ inueniam, ac impe-
 trem hîc gratiam, & postea gloriã sem-
 piternam, quam tua acerbissima passio-
 ne

ne & morte nobis promeruisti. Tu namque in omnibus nos tibi assimilari voluisti. Volumus ergo post hanc vitam tecum glorificari? necessarium est, ut in presenti vita tecum patiamur. Hoc quæso Dñe tu ipse operare, & supple per te, quod desideratur in me. Amen.

PARS SECUNDA.

NUNC autem super crucis patibulum proiectus, ut veluti intrepidus propugnator voluntarium tuum esse sacrificium demonstrares, dextrarum ministris iniquitatis exhibuisti brachium; quod illi sine cunctatione apprehendentes, toto conamine dilaniata potius quàm perforata manu, clauo preserunt in ligno. O quanta cum afflictione & dolore hoc peractum est! Clauus erat magnus & stupidus, ac benedictæ venæ & nerui erant teneri & viscosi, ut clauus benedictam manum tuam penetrare non valeret: quocircà benedictam pellem & cutem tuam, sanctissimos nervos & venas, secum traxit in crucis foramē: O quis satis superque hos tuos inexplicabiles dolores expendet! In hoc tuo benedicto vulnere bone

Iesu

Iesu recipe abscondendas, & in nihilum redigendas omnes meas ignorantias, ex magna imprudentia prouenientes, dum cogitationibus, verbis & factis meis non intendo, & ex nimia imprudentia in cogitatu meo inquietor; & neglectis piis ac salutaribus, accepto multas sæpè inutiles cogitationes, quæ commodi nihil mihi adferunt: quando deinceps ex magna inconsideratione sæpè loquor non interrogatus, & respondens ad ea quæ video & audio, meipsum in intellectu sæpè turbo, & multis quandoque molestus sum, præbens eis occasionem impatientiæ & contentionis, ac meipsum implico multis difficultatibus, ut sæpè pusillanimis & inquietus efficiar: quando denique improuidus sum in meis operibus, & in præmeditatè ago, quorum postea vehementer pœnitet, ac ita affligor, ut vix boni aliquid facere queam: hæc inquam omnes meas improuidentias repono Domine in sanctissimo vulnere benedictæ manus dexteræ, & peto adornari rationali quadam ac diuina prudentia, quæ in omnibus meis cogitationibus,

nibus, dictis & factis prouidus sim, nec
 umquam attentem, loquar, aut propo-
 nam nisi ex bono consilio, & animo
 præmeditato, ut totum quod assumpse-
 ro tibi sit gratum, & mihi meritorium:
 atque ita in vera tecum vnione tran-
 quillus permaneam, quò semper ido-
 neus inueniar ad benedicendum & lau-
 dandum te in omnibus, quæ mihi acci-
 dant: & tibi sint deliciae in me secun-
 dum diuinum beneplacitum, in sola-
 tium & salutem animæ meæ, quæ sæpè
 supra modum tristatur, ut etiam mœ-
 rorem mœrori coniungat; sed per hunc
 tuum intolerabilem mœrorem, pro-
 prium obliuioni tradam. Amen.

PARS TERTIA.

DEinde ad benedictam manum
 tuam sinistram, crucifigendam se-
 se accinxerunt. Verùm cùm foramina
 inconsideratè citra mensuram benedi-
 cti corporis tui facta essent, & tam re-
 mota, ut nullo modo extendens reip-
 sum ad illa pertingere posses, restibus
 & aliis instrumentis benedictos hume-
 ros tuos extraxerunt, donec ad illa per-
 uenirèt. O quid benedicta manus dex-

tera

tera tua tunc pati habuit, quomodo sacrosancta caro tua & pellis, venæ ac nervi distenti sunt, cum iam tenerrima membra è suis iuncturis deicerentur, ac nervi & venæ rumperentur? Sed cum iam tanta crudelitate benedictam manum sinistram extendissent, eam clauo duro ac crasso cruci confixerunt, Cum verò clavis manum penetrare non posset, benedictas venas & nervos, sanctam cutem & pellem in crucis foramen secum traxit, Et quantum hinc in benedictis brachiis, cruribus & capite dolorem senseris, nec lingua eloqui, nec mens humana cogitare potest, Tu utraque manu clavis iam confixus, supra crucem iacuisti tamquam arcus resticula constrictus. In hoc vulnere benedictę manus tuę sinistrę sana quæso Domine vulnus malitię meę, per quam ab ordine rationis deflexi, ut nec tibi nec proximo, nec mihi ipsi tribuerim quod iustitia postulabat. Hinc sæpius pusillanimis fio, non cōfidens tuę infinitę bonitati: hinc facile excandesco proximo, cui charitatem debeo: imò hinc contristo sæpius meipsum, & ob-

stacu-

staculum pono virtutibus ac bonis operibus, ad quæ meipsum inflammare debebam. Sana igitur Domine per hoc sanctum vulnus sinistræ manus tuæ, vulnus malitiæ meæ, & conforta me secundum voluntatem in vera virtute iustitiæ, qua vnicuique suum tribuam, tibi Domine Deo meo honorem & timorem, superioribus obediētiam, proximo meo charitatem, & mihi ipsi correctionem & disciplinam; quò voluntas mea per peccatū infirmata, per tuam diuinam misericordiam & gratiam in integrum restituatur. Amen.

P A R S Q U A R T A.

Benedictis manibus tuis Domine ita in cruce expansis, receperunt sese ad benedictos pedes longè remotos à foramine in inferiori crucis parte facto. Quare iterum in longitudinē crucis cum magno labore benedicta membra tua distraxerunt, donec sacri pedes ad foramen pertingerent, atq. ita summis doloribus eò pertractos cruci confixerunt, alterum alteri supponentes. vbi crassus & deformis clauus benedictas venas & nervos, se mutuo pene-

tran-

trantes, sacrosanctam pellem & cutem
 secum in foramen crucis protraxit, vt
 ex aspectu natura nostra facile obstu-
 puisset. O si hoc tam feruenter expen-
 derem, ac si præsens oculis vidissem,
 certè in corde meo sentirem, quid tu
 spòsus sanguinum mihi factus, pro me
 pertuleris. Eia Dominus meus & Deus
 meus, per hoc vulnus dextri pedis tui,
 sana vulnus infirmitatis meæ, & poten-
 tiæ meæ irascibili virtutem fortitudinis
 restitue. Nam vulnus infirmitatis meæ,
 quo in ira vulneratus sum, multùm me
 affligit, & me ad omne malum propen-
 sum facit, vt vnico verbo vel minima
 iniuria prosternar, & omnis peccati &
 malitiæ species sese in me aperiat, quò
 sæpissimè à virtute & bonis operibus
 natura mea abhorret, vt minùs mentem
 meam, ad influxum tuæ diuinæ gratiæ
 recipiendum, in te eleuare queam. Sana,
 rogo, hoc vulnus in me, & restitue mihi
 virtutem ac donum fortitudinis, quò
 ira rectè utar: & resistam omnibus fra-
 gilitatibus, ne vmquam ab ea vincar;
 sed omnia benigno intuitu transiens,
 iniuriam mihi illatam patienter feram,

& cunctis diligentia quadam occurrā, sine turbatione meipſius, ad caſtigandā omnem iniuſtitiam, & verā iuſtitiam promouendam.

Da etiam animi modeſtiam, qua omnem tentationem, melancholiam, ac puſillanimitatem miſſam faciam, & in omnibus bonis operibus intrepidus progrediar; vt quotidie meipſum exercendo, felicem ſucceſſum habeam in virtutibus, ad maiorem fructum perfectionis indies faciendum.

Verū per ſacrum vulnus ſiniſtri pedis ſanare quæſo dignare vulnus prauæ concupiſcentiæ, qua citra meſuram ſolicitus ſum de neceſſariis tam in cibo & potu quā veſtimentis, quæ tandem plus incommodi quā commodi adferunt, quando influxum tuæ diuinæ gratiæ in me impediunt. Nam ad corpus ſolummodo conſeruandum, cibum, potum, & veſtimenta appetere debebam, quò animæ prouideretur ad benedicendum & laudandum nomen ſanctum tuum die ac nocte, manè & veſperi. Iam verò ſæpiſſimè obueniunt mihi obſtacula tanta, vt me in tui obli-

uio-

uionem sæpè deducant. Da igitur mihi virtutem temperantiæ in omnibus appetendis, quò necessitati seruiens ad tuum semper obsequium sim paratus. Verùm Domine, sicut dexter pes super sinistrum cruci confixus est: ita largire vt potissimùm animæ prospiciam, ac postea corpori; vt anima primatum tenens secundùm intellectum, sensualitatem sibi subiiciat, & spiritus carnem: quò semper magis anima quàm corpore tibi placere studeam, & corpus imperio animæ obediat, quò tua bonitas vtroque perfruatur sine fine, hîc & in perpetuum. Amen.

Tertia MEDITATIO, de Exaltatione DOMINI in cruce.

PARS PRIMA.

Hic iam, amantissime Domine, iacuisti super lignum crucis tamquã arcus intensus, atque ita membris distractus, vt ne vnum quidem suum obtineret locum, & à capite vsque ad calcem non esset in te sanitas, vt mirum foret vitam tibi adhuc

superesse. Sed diuinitas tua ad maiora
perferenda tormenta, quoad placebat,
te confortauit. Et præter infinita vulne-
ra, quæ in capite ac toto corpore cir-
cumferebas, quatuor adhuc per gran-
des istos clauos tibi infllicta sunt, quæ
ex diametro per totū benedictum cor-
pus omnes neruos & venas penetra-
bant, & cū à corde sese diffunderent,
ad capitis, manuum, ac pedum vsq, ex-
tremitates ex aduerso tamquam acus
circa cor conueniebant, vt ei mortem
inferrent. Verū, ô Domine, quā
longa & tarda, dirā ac dolorosa fuit hæc
mors, cū hæc vulnera acceperis, in il-
lis locis, vbi nerui & venæ abundant,
& tactus maximè viget. Cū autem
super omnes homines, tenerrimos ner-
uos & venas haberes, & sensum subti-
lissimum, etiam super omnes homines
tormenta sensisti grauissima. Per hos
igitur intolerabiles dolores tuos, da vt
oderim omnes huius sæculi delicias &
voluptates. Per vulnus sacri pedis tui
sinistri, sana quæso vulnus concupi-
scentiæ meæ: da mihi ad eam refrenan-
dam, virtutem temperantiæ, ne quid-
quam

quam carni gratum appetam, nisi ratione suadente. In Baptismo quidem hæc vulnera in me sanasti, in quantum primum peccatum ea mihi infllexerat: sed ex quo cicatrices in me reliquerunt, sæpius adhuc excitant nouum motum; qui, si ratio non vigilauerit, indies vehementior efficitur, vt facile peccatum adducat. Rogo ergo qua possum humilitate maxima, vt per hæc tua benedicta vulnera me præserues, ne vlli peccato assentiar; ne per minutissima quæq. peccata, hæc vulnera in me reuiuiscant; & quod tua diuina pietas mihi reliquit in exercitium, ego nõ in mortem rapiam: aliàs in multis meis negotiis sæpè ratio negligeretur circa id quod verum est, volũtas mea in malo obduraretur contra bonum, & concupiscentia circa delectabile magis ac magis exardesceret. Ab his, ô Pater misericordiarum, per tua sanctissima vulnera me præserua, & da intellectui meo prudentiam, voluntati iustitiam, fortitudinem competentem iræ, & temperantiam concupiscentiæ, vt tecum sim & maneam in perpetuum. Amen.

PARS SECVNDA.

IAm autem te mundi auctore confixo in stipite, milites aliquantis per quieverūt, quatenus resumptis viribus crucis vexillum erigerent, & tu mediator omnium vniuerso populo visibilis appareres. O Domine, quàm miserè hinc super crucem tribus clavis confixus iacuiſti, per totum benedictum corpus dilaniatus, vt ne membrum quidem suum locum occuparet. Hæc ita pati voluisti pro me, qui in omnibus membris meis peccaueram, vt perfectè solueres quæ ego debebam. Da igitur gratiam, vt ad terram respiciens, memor sim tuæ diræ passionis; quia tu cruci confixus iacuiſti in terra, quæ maledicta propter peccata, nunc per diram passionem tuam benedictionem recipit. Verùm sicuti in principio voluptate eam contaminaueramus: ita nunc tuo exemplo per patientiam & longanimitatem vicissim benedici eandem oportebat, vt sic nos in terris pœnitentiam agamus, quò post huius sæculi ærumnas, per tuam benedictam passionem terram viuientium impetremus.

Ad

Ad hoc nos adiuua, ad hoc nos conforta bone Deus, in omni labore & miseria nostra, ne meritum amaræ passionis tuæ in nobis suum vigorem perdat. Amē.

P A R S T E R T I A.

Milites iam resumptis viribus crucis vexillum in aëra leuarunt, tamquam signum victoriæ nostræ, omnibus terræ incolis manifestandum. Ex quo assidue considerandum, quam pretioso thesauro, videlicet, non corruptibilibus auro aut argento, sed pretioso sanguine tuo, qui es Agnus immaculatus, redempti simus. Sed quanto dolore hoc peractum est! Foueam fecerant in terra, & in eam summa vi crucē erectam coniciebant constabiles eam, ut per erectionem illam crucis, totū benedictum corpus tuum tribus clavis firmatum graui motu ac tremore concuteretur, & omnia benedicta vulnera manuum ac pedum renouarentur, ac cuncti nervi & venæ rumperentur, & pretiosus sanguis tuus intra pellem & cutem sacrum manuum & pedum hærens erumperet, & tamquam fons scaturiens in terram proflueret, & caput tuum bene-

dictum corona spinea coronatum, à tergo ad crucem elideretur, adeò, vt sine diuinitatis confortatione in viuis manere non potuisses. Quis, ô Domine, hanc tuam benedictam passionem satis superque potest expendere? Mille modis hominum mentem superat, silco quòd quis eandem sustineret. Si non est mihi possibile te in passione tanta imitari, da saltè corde quotidie in meis miseriis eiusdem memor sim, vt sic quodammodò gratus, meiipsius doloris obliuiscar. Nullus enim dolor respectu doloris tui estimandus. Da ergo Domine gratiam, vt tota anima mea & corpus, omnes vires cum sensibus interioribus & exterioribus sentiant & considerent tuam diram passionem, vt sic postponam omnem superbiam, & propriam complacentiam, quòd sim quasi viuens mortuus, & nec aduersitatem nec dolorem mihi illatum sentiam.

Eleuatus iam in cruce, suspensus es medius inter duos latrones. Nam iuxta mensuram peccatorum nostrorum passio tibi parata fuit. Nos grauissimè peccaueramus, & tu ipsa Iustitia in nostra

per-

persona tamquam latronum dux haberis. Quomodo in corde meo locum superbiae dare possum, cum per ipsam me tam ignobilem reddiderim, & tu Dominus meus & Deus meus hinc pro me inter latrones numereris. Ne queso Domine, mihi umquam dominetur superbia, qua mihi persuadeam, quod hoc aut illud malum ab illo aut isto mihi inferri non deberet, cum tu creator omnium tantam contumeliam pro me pertuleris. Tu haec innocens passus es, & tantum pro me; at ego si quid patiar, summo iure patior. Da ergo humilitatem & patientiam, ut per tuam benedictam passionem omnes meas afflictiones vincam. Amen.

PARS QUARTA.

Hic iam, amantissime Iesu, in stipite eleuatus, pependisti in aëre, ut ubique locorum, etiam in aëre propugnator noster esses, ut aërem sanctificando munites contra venenum saranae, qui circumuolitat in eo, ut nos suo veneno inficiat. Da igitur, quotidie per veram fidem & perfectam conuersationem ad te respiciam, qui propter me

I 5 in

in aëra eleuatus in crucis patibulo pependisti, vt per hoc præseruer ab omni infectione diaboli; quĩ die ac nocte tãquam leo rugiens circuit, quærēs quem deuoret, hunc per superbiam, illum per desperationem, & alium per alias inordinatas ac tetricas vexationes, quas humana mens vix eloqui potest. Ab his inquam me libera, vt imperterritus, ac impolluto calle hoc mūdi pelagus trāseam, quò tibi placeam in perpetuum.

Pependisti etiam expansis manibus vt nos omnes attraheres, dicens: Venite ad me omnes qui laboratis & onerati estis, & ego reficiam vos: quasi paratus ad nos inter benedicta brachia tua amplexandos, & cordi tuo paterno imprimendos. Experiar hoc quæso Domine, & recipe me, quando magnis laboribus & tentationibus obrutus sum, quasi tu manum diuini auxilij subtraxisses, & pro filio non agnosceres; tunc quæso inter sanctissima brachia tua recipe me, & cordi tuo paterno imprime, vt fide, spe, & charitate firmatus, verum filialem affectum præ me feram. Si quando sarcina peccatorum oneratus fuero, per
veram

veram pœnitentiam inter benedicta brachia tua me amplectere, & sicut filium prodigum paterno amore suscipe, ne præ multitudinem peccatorum meorum in foueam desperationis incidam: sed animum mihi augeat tua amara passio, quã pro nobis miseris peccatoribus tam piè pertulisti; eaquẽ corroboratus confidam, quòd tu me paternè recipies, ac benedicto cordi tuo includes, vbi nec mors, nec diabolus me inueniat. Hoc modo pie Dñe in omni miseria & tristitia me consolare, ad me reficiendum & confirmandum in perpetuum. Amen.

Quarta MEDITATIO, de tituli inscriptione, & vestimentorum diuisione.

PARS PRIMA.

O Fortitudo Dei abscondita, hominẽ in cruce pendentem, eternam suspendere mortem genus humanum prementem! hominem ligno confixum, diffigere mundum perpetuæ morti affixum! O celata potestas, hominem damnatum cum latro-

nibus, homines soluere damnatos cum
dæmonibus! hominem in patibulo ex-
tensum, omnia trahentem ad seipsum!
O virtus occulta, vnam animam emis-
sam in tormento, innumerabiles extra-
here de inferno! hominem mortē cor-
poris suscipere, & animarum mortem
perimere! Hæc tu Domine Deus diui-
na omnipotentia operatus es, & inimi-
ci tui non intellexerunt. Ipsi hostili
animo te morti tradiderunt, qui illis
charitatis dona infinita exhibuisti, vt
meritò dicas: Popule meus quid feci
tibi? aut in quo contristauit te? responde
mihi. Quia eduxi te de terra Ægypti,
paraſti crucē Saluatori tuo? Quia eduxi
te per desertum quadraginta annis, &
manna cibauit te, & introduxi te in ter-
ram satis bonam, paraſti crucē Saluatori
tuo? Quid vltra debui facere tibi, &
non feci? Ego quidē plantaui te vineam
meam speciosam, & tu facta es mihi ni-
mis amara; aceto namq. sitim meam se-
daſti, & lancea perforaſti latus Saluatori
tuo. Si hæc mala tibi ô Dñe illata à po-
pulo tuo electo; quid ego conqueror, ſi
ab amicis meis iniuriam patiar? Si pro-
pter

pter me, & salutem meam, hæc perpessus es; quid indignum ducere volo, si ab amico meo quid patiar propter te? Eia Domine, da vt tuo exemplo in omni afflictione mea ad Patrem tuum caelestem, qui omnia de me ita ordinauit, respiciam, & nō ad hominem quantumcumque etiam propinquum. Quod enim à magis propinquis patiar, cō magis laudandus ero. Nam tunc certus sum quod à te mihi proueniat, quando à meis pro dilectione odium sentio. Da igitur Domine, vt tecum vnū sim; & nulla me anget miseria, sed tecum contentus ero, hic & in perpetuum. Amen.

P A R S S E C V N D A.

Scripsit autem Pilatus titulum, seu superscriptionem tamquam causam mortis tuæ, & posuit super crucem ad caput. Erat autem scriptum: IESVS NAZARENVS REX IVDÆORVM. Hunc titulum ex Spiritus sancti inspiratione scripsit Pilatus, & simul tuam Maiestatem, & nostram salutem comprehendit. Nominat enim te proprio nomine, quod habuisti ab æterno, & per sanctum Angelum nobis innotuit,

cùm diceret ad Mariam & Ioseph: Vocabis nomen eius Iesum. Ipse enim saluum faciet populum suum à peccatis eorum. Verè Saluator, qui pro populo tuo hanc turpissimam mortem pati dignatus es, qua, peccato sublato, diabolus prostrauisti, & limbum Patrum destruxisti. Nominat etiam te Nazarenum: nam verè Nazarenus eras, hoc est totus virens & florens, & semper fructum proferens & numquam arefcens; quem videlicet, nullus dolor, nulla contumelia, nulla tormenta opprimere potuerunt: quod ipsum etiam operaris in omnibus electis, vt videlicet semper floreat & virescant: & licet interdum premantur, tamen resumunt vires recreati suauissimo odore tuo, qui es flos super omnia florens, ac renouans totum quod est in celo & in terra, & subtus terram. Quare (*Cant. 2.*) ipsemet dicis: Ego flos campi, & lilium conuallium, prodiens nō ex terra quam pedibus conculcamus, sed ex nobilissimo corpore virgineo; ex illa videlicet terra, de qua suauissimè Propheta Dauid loquitur, dicēs: Dñs dabit benignitatem,

tatem, & terra nostra dabit fructū suum. De quo & aliàs locutus est : Et erit fructus terre sublimis. Meritò dicitur sublimis. Nam tu es magnus & excelsus super omnes. Tu enim dominaris à mari vsque ad mare, & à flumine vsque ad terminos orbis terrarum. Hinc rectè nominat te Regem Pilatus. Tu siquidem es Rex inuictissimus, & potens super omnia. Nam quos diuina potentia condidisti, æterna sapientia gubernas. Tu nullum post te successorem expauescis. In sublimibus cælorum sedes, vbi tuum viget regnum, & multa potiris pace. Habes planè cælestem Ierusalem, quæ viuīs quotidie ædificatur lapidibus, vt ciuitas cuius participatio in idipsum. Nam illuc ascenderunt tribus, tribus tuæ ad testimonium spiritualis Israel, ad confitendum nomini tuo. Super Israel quippe, & super populum regnas Iudæorum : non autem Iudæorum secundum carnem, sed secundum spiritum. Nam carnis circumcisio, & corporalium sola depositio sordium nihil prodest, vt in tuum admittamur regnum. Porro qui in manifesto

Iudæus

Iudæus est, minimè ad te pertinet, sed qui in spiritu Iudæus est, & confitetur, quòd tu in cruce pendens es Iesus, Deus & Dominus omnium. Confessio verò hæc non est labiorum tantum, sed cordis. Corde enim creditur ad iustitiam, ore autem confessio fit ad salutem. Proinde non es Iudæorum tantum Rex, verum etiam gentium, earum videlicet, qui in spiritu & fidei confessione ambulant. Nulla igitur distinctio est Iudæis & Græcis, aut cuiusvis nationis. Nam tu es idem Dominus omnium, diues in omnes qui inuocant te. Omnis qui inuocat te, saluus erit, si tamen te inuocauerit in veritate. Quotquot autem te inuocant in veritate, in sinceritate fidei, in cordis innocentia, in sanctimonia vitæ, in charitate non ficta, in fraternitatis amore, ad tuum spectant regnum: hi nempe Israëlita sunt, & spiritualis populus Iudæorum, in quibus tu, ô Iesu Nazarene, pro nobis crucifixus, regnas. Regnum hoc Spiritus sanctus in titulo, quem Pilatus super crucem figi mandauit, voluit designare. Hunc titulum, benignissime Domine,

mine,

mine, digito tuæ diuinæ gratiæ scribere dignare in corde meo, vt semper memor regni tui cogitem quid sum, & quò spectem; quò assidue firma fide, fortis ac imperterritus respiciam, quocumq. hostis, miseria aut tristitia me agitaue- rit. Nam sicuti tu Rex per patientiam & obediētiam de hostibus tuis triumphasti; ita & ego vera fide per charitatē operante, omnes hostes mihi subiicere possum. Hæc ô Patris æterna sapiētia in me perfice, vt te semper laudem atque glorificem, hîc & in per petuum. Amen.

PARS TERTIA.

Millites ergo cū te crucifixissent, acceperunt vestimenta tua (& fecerunt quatuor partes, vnicuique militi partem) & tunicam. Erat autem tunica inconsutilis desuper cōtexta per totum. Dicebant ergo ad inuicem: Non scindamus eam, sed sortiamur de illa cuius sit, vt Scriptura impleretur, dicens: Partiti sunt vestimenta mea sibi, & super vestem meam miserunt sortem. O Domine, quomodo resignasti te in omnibus? Sed parum est, quòd vestimenta tua neglectui habueris in hac tanta miseria,

feria, cùm etiam teipsum propter nos obliuioni tradideris. Verùm citra magnam afflictionem hoc non contigit, cùm Regius Propheta Dauid tam diu antè de eo vaticinatus fuerit. Per hoc enim nobis manifestasti conditionem Ecclesiæ tuæ in terris, quæ in quatuor mundi partes diuisa, totum mundum complectitur. Sed quot sunt, qui diuidentes sibi vestimenta tua, partem sibi usurpant, & magis seipsum quàm gloriam & honorem nominis tui, aut Ecclesiæ doctrinam quærunt? Occurre illis, ô Domine, gratia tua diuina, vt cognoscant quo loco tu illos habeas, & quid officij ratio ab illis requirat ad verum sensum in fide Catholica percipiendum, & ad omnem hæresim tam vitæ quàm doctrinæ detestandam. Sunt infelices hoc æuo homines, qui naturæ & ingenij dotibus pollentes hæresim ac seditionem excitant, & populum Christianum miserè seducunt. Diuidunt sibi vestimenta tua, vt quisquis rapiat sibi, quando per hypocrisin captant beneuolentiam, ad doctrinam suam falsam comprobendam. Omnes iudicant, pri-

mi

mi esse cupiunt in Ecclesia, & sub prætextu sanctitatis & veritatis omnibus persuasum volunt, se solos inter se Catholicam concordiam fouere. Tu quidem percutis eos cæcitate, vt ostium veritatis inuenire nequeant, sicuti Angelus Sodomitæ: sed obdurati remanēt in malo, donec plaga sine gratia, hoc est extremū exitium, eos inuadat. Eia Domine humilia eos, vt ad sui ipsorum cognitionem veniant, imple facies eorū ignominia, vt quærant nomen tuum Dñe, vt ad veram Catholicæ religionis redeant veritatem, & in sancta Ecclesia permaneant, & sint viua membra corporis, cuius tu ipsemet caput es. Amen.

PARS QUARTA.

IAm, amantissime Domine, adiuua sponsam tuam Ecclesiam, quæ contristata supra modum, passim multum affligitur. Quot sunt, qui seipsos ab ea segregantes, quantum in illis est, sibi diuidunt tua vestimenta? Hos nos pati oportet, quamdiu tibi placuerit. Verum, ô Pater misericordiarum, integra maneat benedicta tunica tua inconsutilis, quò vnitas Ecclesiæ inuiolabiliter serue-

seruetur, ne charitas vera, qua tu & Ecclesia uti sponsus & sponsa vnum estis, vniquam labefactetur. Stet semper in conspectu tuo, ut non tradatur obliuioni. Ambulet coram te, ad tuam sanctissimam voluntatem semper adimplendam. Admitte illam quotidie in thalamum tuum, ad perfectam ibidem semper hauriendam doctrinam, qua proles suas indies instruat. Largire & mihi gratiam, ut tamquam filius obedientiae, ei, tamquam verae matri, me semper subiiciam, & non aliud optem, cogitem, cupiam, loquar, aut agam, quam ipsa à te sponso suo edocta mihi imparet aut maderet; ut in omnibus tuo exemplo cum ipsa patiar & pugnem, & cum ipsa post hanc vitam per te in perpetuum exultem & læter. Nam si hic cum ipsa non inueniar in gratia, non potero cum illa in futuro partem habere in gloria. Eia igitur Domine, agnosce me prolem tuam; quam tu cum matre nostra Ecclesia magna patientia peperisti, & etiamnum parturis in magna patientia, quam hactenus mecum habuisti, & etiamnum habere vis ad finem vitae; ut vita

mea

mea in miseria transacta, in perpetuum salua maneat. Amen.

Quinta MEDITATIO, de contumelia Saluatoris nostri in cruce pendenti illata.

PARS PRIMA.

OMnipotens sempiterne Deus, hîc iam in cruce pependisti tâquam signum ad sagittam, vt contradictionis & irrisionis verba in te susciperes. Hinc cruci affixus, nudus & apertus, ab impio filio tuo Cham, id est Iudæorum genere, derisus es. Patiebaris supra modum in toto benedicto corpore, vt à planta pedum, vsque ad verticem capitis, non esset in te sanitas; & visus ac auditus facilè in te defecissent, nisi à diuina natura confortatus fuisses. Verùm his non obstantibus, auditu torqueri debebas, dum audires vituperationem multorum commorantium in circuitu. Meritò dicebas: O vos omnes, qui transitis per viam, attendite & videte, si est dolor similis sicut dolor meus. Nos persuasum habemus, quòd

magno

magno dolore grauemur, dum intrinsecus quasi desolati, solatium nullum sentimus corpore integro existentes; aut dum quis nobis loquitur verbum asperum, quod patientiam nostram exercet; & non expendimus quòd hosce dolores non solùm interiùs, sed etiam exteriùs, toto benedicto corpore tuo, omnibus mèbris & sensibus perpeffus sis. Tu fuisti desolatus intus & foris, dum foris in corpore immanissima tormenta perferres, & intus nullum solatium haberes. Vnde & clamabas: Deus meus, Deus meus, vt quid dereliquisti me? Imò foris nullus inueniebatur, qui signum misericordiæ tibi exhiberet. Per hanc tuam desolationem, Domine, dignare me consolari in omni tribulatione & dolore. Quando verò me ita desolatum inuenio, vt nec intus nec foris solatiũ sentiam, imò mihi persuadeam quòd cælum & terra me angant, tunc quæso suppone mihi manum, ne planè prosternar. Nosti enim Domine, quàm periculosum mihi esset, si in tanta desolatione ruerem. Verùm de tua bonitate confido, quòd in maxima miseria mihi

sis

lis proximus, & quò maiori desperationis tentatione affligar, eò vberioremihi gratiam tribuas, vt etià cum Abraham cōtra spem in spem credam. Hoc, ô misericordissime Domine, largire mihi per tuam diram passionem, & desolationē in maximam, ne vinqum, quomodocumque etiam mecum agarur, me à te separari contingat.

PARS SECVNDA.

STabat populus expectans finem, partim ex curiositate, vt viderent quem finem habiturus esses, qui dum viueres tam mirabilis fueras verbo & opere; partim verò ex compassione, quòd tu, cum summa vi & iniuria, morte tam turpi afficereris. Expectabant autem adiutorium, quòd à miseria liberareris, sicuti & nos per tuam amaram passionem ab omni tentatione & miseria liberandos speramus: partim etiam ex destinata malitia tuum finem expectabant, cū iam cruci confixus omnium scommata & contumelias in circuitu audires. Prætereuntes enim blasphemabant te, mouentes capita sua, & dicentes: Vah qui destruis templum

Dei,

Dei, & in triduo illud reedificas; salua temetipsum: si filius Dei es, descende de cruce. Similiter & Principes sacerdotum illudentes ad alterutrum cum scribis & senioribus dicebāt: Alios saluos fecit, seipsum non potest saluum facere. Si est Christus Rex Israel electus Dei, se saluum faciat. Descendat nunc de cruce, vt videamus & credamus ei. cōfidit in Domino, liberet eum nūc si vult. Dixit enim, quia Filius Dei sum. Idipsum autem & latrones, qui tecum crucifixi erant, inproperabant tibi, & blasphemabant. ~~Indebant~~ Indebant autem tibi & milites, ac acetum offerentes dicebant: Si tu es Rex Iudæorum, saluum te fac. O Domine, est ne hæc intolerabilis contumelia, qua præter externos & internos dolores adhuc verbis ita irritaris & subsannaris? Quod quæso hominum genus in terris, te his sagittis malitiæ non inuasit? Omnes insurgunt aduersum te Iudæi & Gentes, Pharisei & Scribæ, docti & indocti, iuuenes & senes, ciues & milites, imò latrones tecum in tormentis positi: adeò, vt nullus qui tibi cōdoleret, inueniretur. Sed hæc

omnia

omnia patientia superasti. Obmutuisti ad contumelias, & non aperuisti os tuum, factus quasi vas perditum, & non audiens vituperationem multorum commorantium in circuitu. Ad suasiones autem non præbuiisti aures, fraudem eorum intelligens. Patienter sustinens omnia, perseverasti in cruce, donec spiritum exhalares. Non enim volebas per impatientiam de cruce descendere, sed pro voluntate Patris cælestis de sepulchro resurgere. Atque ita in omnibus demonstraisti nobis patientiæ exemplum, ne umquam crucem abiiciamus, sed hilari spiritu semper in tribulatione, vnde cumque etiam proveniat, perseveremus, siue iuste siue iniuste patiamur. Nam si iuste patiamur, præstat hinc quàm in futuro pati. Sed si iniuste, æquo animo tolerabimus, in gratiarum actionem, quòd tu innocens & iustus tanta pro nobis pati dignatus es. Eia igitur Domine, da patientiam in tribulatione qualibet. Non respiciam ad hominem qui mihi iniuriam infert, cum non sim te melior. Nam si tu habuisti patientiam in omnibus quæ pro me

K

pec-

peccatorum maximo perpeſſus es, quid ego volo perturbari, conqueri, & dolere, ſi à ſimplici homine contriſter? Sit itaque mihi tam grata iniuria à minimo illata, quàm quæ à maximo proueniat. Quòd ſi etiam quippiam mundo ingratum per tuam diuinam inſpirationem acceptauero, hoc me non affligat neque contriſtet, ſed pro hoc te collaudem atque glorificem, gratias agendo quòd tecum pati dignus ſim. Imò gaudcam quòd non ſim de mundo, & tu me elegeris de mundo, & propterea mundus me odio habeat. Conforta ergo me, vt contumelias & deriſiones mundi paruifaciens, cogitem omnes mundi huius miſerias & opprobria eſſe oleum in lampade, quo amplius lumen miniſtrante, commodiùs hinc ad vitam æternam tranſeam. Amen.

PARS TERTIA.

TAndem, piſſime Domine, diabolus qui aduerſum te has acies ordinauerat, quiq̃ue in omnibus certabat, & certatim paratas in pharetra ſagittas in te ſignum contradictionis emiſerat, & in cunctis ſe ſuperatum eru-

be-

bescens, vnam adhuc, qui in iniquitatis
 eius pharetra remanserat, sagittam ex-
 torquere non desit. si fortè qui in ma-
 ximis viriliter dimicaueras, improuidè
 vincereris in minimo. Quamobrem la-
 tronem qui à sinistris tibi pende-
 bat, inflammauit vehementer, adeò vt & ipse
 blasphemix proferret obloquia. vnde
 aiebat: Si tu es Christus, saluum fac te-
 metipsum & nos. Sed nihil aduersum
 te potuit. Cùm enim omnes alios pa-
 rientia vicisses, etiam hunc pessimum
 tolerare non recusasti. Malus enim erat,
 & benè loqui non poterat. Iam illum
 diabolus viuum absorbuerat, ac ideò,
 nihil nisi quod ille volebat, agere pote-
 rat. Figuram namque gerebat, nec non
 de eorum numero erat, qui à sinistris
 tuis, cū iudicare veneris viuos & mor-
 tuos, in die iudicij audient: Ite maledi-
 cti in ignem æternum. Ad hunc mo-
 dum sæpiùs agitur nobiscum, benignis-
 sime Domine, vt dum singulos patien-
 ter rulerimus, tandem ab vno abiectissi-
 mo impugnemur. Et hoc quandoque
 nos tam malè habet, vt per hominem
 simplicissimum diabolus nos ad impa-

cientiam reducat, quod per alios prudentia & ingenio longè maiores efficere nequiuit. Et in hoc nos peccatores sumus tam stupidi, ut ad dolos malos diaboli vix artēdamus. Da igitur mihi Domine, ut tuo exemplo ab omnibus libēter patiar, ne ullus mortalium, quantumvis abiectus & vilis, me ad iracundiam prouocet, aut impatientia vincat; sed ponam meipsum sub te, contra omnes me persequentes, ad crucem in omni perfectione tecum portandam; ne peream miser, aut tristis incedam, sed perfectior in charitate reddar, ad tibi in humilitate & patientia feruenter seruiendum, & amandum super omnia; quò tu mihi sis omnia in omnibus, & ego te quotidie in omnibus & super omnia quæram & diligam. Amen.

P A R S Q V A R T A.

VBi iam Domine in cruce pendens morti appropinquare, Iudæi traditi in reprobum sensum, in cōtrarium rapuerunt, quidquid ex dolore & miseria diceres, & hoc fecerunt ex destinata malitia, dum cuncta carnaliter acciperent, quæ sancta mater Ecclesia spiritaliter tua-

tualiter intellecta assumit. Tu clama-
bas in cruce: Eli, Eli lamma sabacthá-
ni, hoc est, Deus meus, Deus meus, vt
quid dereliquisti me? & ex mera pro-
teruita, vidētes te in articulo mortis, di-
cebant: Eliam vocat iste. Et cū dice-
res, Sitio; continuò currens vnus ex eis,
acceptam spongiam impleuit aceto &
hyssopo, & imponens arundini, obtulit
ori tuo vt biberes, dicens cum ceteris:
Sine, videamus an veniat Elias liberans
eum. Hæc doloribus plenus adhuc au-
dire debuisti. Quid ergo contristor in
tribulationibus meis, querens solatiū in
creaturis, cū præter iniuriam quæ mi-
hi inferri possit, magis iram tuam, &
omnium creaturarum persecutionem,
quàm solatium promeruerim? Si ergo
Domine dolor super dolorem me inua-
dit, & alius alio magis mihi aduersatur,
non ex hoc tantopere affligar, sed com-
plicatis manibus tibi gratias agā, quòd
me in tribulationibus meis crucis tuæ
participem facere digneris. Verū non
solū verbis te afflixerunt, quin & ope-
re ipso in extremis dolorem tibi super
dolorem addiderint, cū sitientem fel-

le & hyssopo te refecerunt. Sed hæc facientes, Scripturæ sacræ compleuerunt eloquia, & fidei nostrę instituerunt mysteria. Perfecerunt opere, quod longè antè fuerat vaticinatum. Sic enim in persona tua Propheta prædixerat (*Psalmo* 38.) Et dederūt in escam meam fel, & in siti mea potauerūt me aceto. Cruelitatem quippe Iudæorum expressit, sed non cōticuit malitiam peccatorum. Quotquot enim sumus dediti voluptatibus, quotquot superbix spiritu inflati sumus, quotquot liuoris, odij, aut nocendi veneno infecti sumus, in arundine & spongia fel tibi sitienti porrigimus. De huiusmodi ait Propheta Moyses (*Dent.* 32.) Fel draconum vinum eorum, & venenum aspidum insanabile. Quemadmodum Iudæorum, ita & horum potum tu æterna Patris sapientia abhorres. Non enim placent tibi peccatorum sacrificia. Illa respuis, illa parui pendis & damnas. Sitim quam de nobis te habere asseris, non auferunt cogitationes malæ, neque desideria terrena, sed cælestia, sed spiritualia, sed ignita, quæ de sanctificato prodeunt

cor-

corde. Aberant hæc à Iudæis, qui nocendi tibi animositate ardebant. Intus etenim malitia pleni, sicuti peccatores ceteri, spirituale aceti & fellis poculum tibi tradiderunt. Foris autem eas iniurias intulerunt, quas nullum alium pertulisse compertum est. A sæculo non est auditum, vt homini sitienti, lasso, vulnerato, ac morienti pro sitis refrigeratione, acetum hyssopo & felle daretur mixtum. Excedit totius humanitatis limites ista crudelitas. Ingrati, scelesti, sine pietate, absque misericordia, quod brutis impenditur, tibi Dei Filio sitienti denegarunt. O Dominus meus & Deus meus, vtinam hæc tamquam speculum semper ob oculos haberem, & tibi assiduè suauem & amicabilem haustum cor meum & sensus præbere affectarem, quò talis indies coram te apparerem, vt tibi deliciæ forent esse mecum, ne vmquam tamquam tepidum euomeres ex ore tuo: sed semper in mea maxima tribulatione paratus starem ad maiorem miseriam cum patientia expectandam, quam ita de manu tua acciperem vt cōpaterer mihi iniuriam facien-

tibus, & pro iis qui me oderūt & persequuntur, orarem. Hæc ô Domine per te ipsum operare in me. Tu enim es, qui ex charitate tribulationem & dolorem nobis immittis; tu ipse in nobis, & per nos sustines, & in regno claritatis tuæ pro his nobis remuneras. Amen.

DIE SABBATI.

MEDITATIO prima, de morte
DOMINI Saluatoris nostri.

PARS PRIMA.



QUISERICORS sempiternus Deus, qui propter me te ipsum in tantum humiliasti, ut factus sis Patri obediens usque ad mortem, mortem autem crucis. Quid retribuam tibi pro omnibus quæ tribuisti mihi? Calicem salutaris accipiam, ut magis abundem diuitiis tuæ diuinæ gratiæ ad tuam incomprehensibilem misericordiam & bonitatem perfectiùs prædicandam & laudandam. Tu enim in cruce pependisti, quamdiu voluisti, & quantum placuit locutus es, & mortuus es quando

voluisti

voluisti. Vnde ultimo verbo pronuntiato, quo dicebas; Pater in manus tuas commendo spiritum meum; inclinato capite, emisisti spiritum. O nunc anima mea, vide, quam fortis sit dilectio, ut mors videlicet, imò fortior morte, quia mortem mori fecit in morte amantissimi Redēptoris tui. Eia Domine Deus, da mihi in carne tuam amaram mortem sentire, quò spiritu perfectiùs uiuam. Operetur mors tua in me, & mortificet in me quidquid oculis tuis diuinis in me displicuerit, & sim homo secundum cor tuum. Da ut ex corde tibi cōpariar, sicuti sponsam morti sui sponsi compati decet; ut mortem tuam tamquam propriam assumam, cum tu mortuus sis pro me, qui millies potius mori debuissem, quam permissem ut vel vna gutta pretiosi sanguinis tui effusa fuisset. Verum enimuero ex ordinatione paterna erat mors tua mihi necessaria, si à morte aeterna liberandus essem. Nihil igitur toto vitæ meæ tēpore aliud cogitem, loquar, aut in usu habeam, quam passionem & mortem tuam; ut tua passio & mors in hac mea vita, quæ

nil nisi mors est, in me vitam sempiternam operentur. Amen.

P A R S S E C V N D A.

O Mors sanctissima, quæ vitam inuenit, mors inquam horrenda & terribilis ingratis atque damnatis, sed salutaris electis. Quàm suauiter Domine Iesu cum hominibus cōuersatus es! quàm abundanter multa & magna bona largitus es! quàm fortiter tam indigna, tam aspera, & tam dura pro hominibus passus es, dura verba, duriora verbera, durissima mortis supplicia! O duri & obdurati filij Adam, quos non emollit tanta benignitas, tanta flamma, tam ingens ardor amoris, tam vehemens amator, qui pro vilibus sarcinulis tam pretiosas margaritas expendit. O bone Iesu, quid tibi & morti? nos debebamus, & tu soluis; nos peccaueramus, & tollis. Opus sine exemplo, cuius simile numquam visum aut auditum fuit, nec videbitur vel audietur vñquam. Gratia sine merito, quia gehennæ destinati eramus, & eripuisti nos; filij mortis eramus, & moreris pro nobis. Charitas sine modo: cùm enim ad saluandum,

nos

nos dilexisses, noluisti moderari, quod patereris pro nobis, sed ad mortem vsq. pati dignatus es. O Deus Dei fili, sapiētia Patris, Rex cēli & terrę, corona Sanctorum, gloriā Angelorum, salus hominum, quātum nos dilexisti! Nemo amatorum carnalium, etsi in hoc supra modum infaniat, sic ardescere potest amore dilectæ suæ, sicuti tu Deus noster effunderis in amore animarum nostrarum; quo scilicet amore deuictus, quas fœdas inuenisti, balneo proprij sanguinis emundasti. O clemētissime Domine, cōmoue obduratum cor meum, & fac viuum & sensile, cū mortuum sit & sine sensu; mortifica in quantum viuit secundū sæculum & carnem, vt perfectiūs tua benedicta passione & amara morte occupatum inueniatur. Da mihi vt omnibus modis in spiritu tibi seruiam, tecum ambulem, patiar, ac moriar, sicuti tu etiam corporaliter ex abundantia diuinæ gratiæ in terris nobiscum conuersatus es, & pro nobis patiens crucis supplicium subire dignatus es; quod ego tecum sim quotidie, sicut tu nobiscum fuisti in terris, & tādē post

hanc vitam tecum sim in sempiternum. Cogitem assiduè quàm indecens fuerit, quòd tu patiendo mortem subires, atq. ob id animo magis grato accipiam omnem tribulationem, quæ me inueniat, paratus semper pro te mori in omnibus, pro tua sanctissima voluntate, ne quidquam in me viuat præter te, qui pro me mori dignatus es, confidens planè in te, quòd numquam auxilium gratiæ mihi subtraxeris. Nam si hæc omnia passus es pro me, cùm adhuc inimicus tuus essem; quanto magis iam gratiam tuam mihi cōmunicaueris, cùm amicus tuus factus sim, & tanti me emeris, vt maioris tibi constare nequeam; & tantam mihi impenderis dilectionem, quæ supra modum magna est, nec estimari potest, cuius etiam exemplū reperire non est, neque in cælis, neque in terra. Hanc charitatem fortiter mihi imprime, vt sit media inter te & me, & me tecum nunc deinceps vnum efficiat; vt quotidie participatione veri corporis tui, non aliud in me sentiam, quàm in te sit, quòd tu in me, & ego in te sim, & maneam in perpetuum. Amen.

P A R S

P A R S T E R T I A.

O Benignissime Domine & Pater, sis benedictus & glorificatus in sæcula, pro omnibus beneficiis mihi miserrimo peccatori exhibitis. Nam innocens expandisti in cruce immaculatæ manus tuas, pro manibus meis incontinenter extensis: & pro suavi cibo ligni vetiti, accepisti escam fellis & aceti, quæ non rapuisti exoluens; & mortem in te suscipiens, nostram mortalitatem abstulisti. Quid commisisti dulcissime Iesu? quæ tua noxa? quæ causa damnationis tuæ? Ego sum certè causa doloris tui. Quæ perpetravit iniquus seruus, soluit pius Dominus. Ad illicita me concupiscentia traxit, ad crucem te sancta charitas pro me deduxit: ego peccati dulcedinem, tu gustas pro me fellis amaritudinem. O dulcissime Iesu, quò descendit tua humilitas, qui pro me factus es obediens usque ad mortem, mortem autem crucis? O quis det mihi, ut tecum totus, carne pariter & spiritu, gladio compassionis transfigar, crucisque patibulo cum dilecto configar, nec aliud sentiam nisi te Dominum

K 7 meum

meum Iesum, & te crucifixum. O quis mihi det Deus meus, vt moriar amore tui, qui tam libenter mori dignatus es amore mei! Interim sit mihi dulcis lectus, lignum sanctum crucis tuæ, in quo dulciter requiescam: sit mihi corona tua spinea dulce cervical, vt caput meum in ea suauiter reclinem. Quia si compatiar, & conregnabo tibi in perpetuum. Amen.

PARS QUARTA.

O Pater misericordiarum & Deus totius consolationis, trahe iam me in te, & fac ex te & me vnum; vt sicuti ego tui desidero esse particeps in venerabili Sacramento, ita tu me totum deglutias, & solus in me viuas; quò non aliud in me sentiam, quàm in te est, secundùm humilitatem, patientiam, obedientiam & charitatem, ad mortificandum meipsum tuo exemplo, ne quid præterte & virtutes tuas sanctas in me viuat. Da mihi perpetuam mortem mori, vt sim quasi mortuus secundùm sensualitatem, vt nec dolorem nec miseriam sentiam, nec laudem aut honorem affectem, nec contemptum meipsum

ani-

animaduertam; sed in omnibus quomodocumque mecum agatur contentus sim, cogitans ita debere esse pro tua sanctissima voluntate. Verum si non possim ita mori manens in hoc mundo, quin carnis tribulationes & tentationes in me sentiam, fiat voluntas tua; hoc saltem obtento, ut tua gratia carnis motus ita compescam, & omnes passiones ita temperem, ne mihi salutis nocumētum adferāt, sed sint in exercitium virtutum, & meritorum augmentum, ut talem in tribulatione me præbeam, ac si dolorem non sentirem. Ita ô Domine operetur in me mors tua amara, ut non tantum semel, sed indies, imò quoad vixero, cunctis sensualitatibus moriar propter te, qui ex tanta charitate mortuus es pro me. Fac me mortificari intus & foris. Moriar visui & auditui, ne videam vel audiam quæ mihi nocumento sint, & sim quasi non viderem vel audirem. Moriar odoratui & gustui, ne quid præter necessitatem naturalem appetam, ad gratum tibi semper obsequium seruitutis præstandum. Moriar tactui, ut iram & concupiscen-

tiam

tiam (si quando me inuadant) ita compescam, ne vel minimum opere exteriori declarem, sed transire sinam omnia propter te, qui tam turpi & contumeliosa morte pro me mori voluisti. In omnibus autem hîc fac me tibi similem, per virtutem venerabilis Sacramenti; vt in cunctis tecum patiando, in omnibus tecum moriar. Intendam tibi tam fortiter, ne in abstinendo & sustinendo difficultatem sentiam, sed per contemplationem & imitationem passionis & mortis tuæ omne meum pari & mori vincam. Hæc omnia tu amantissime Domine Iesu operare in me, vt viuēs ac moriens tibi vitam & moriar, & apud te locum habeam in tempore & æternitate. Amen.

Secunda MEDITATIO, de miraculis quæ tempore mortis DOMINI contigerunt.

PARS PRIMA.

O Amantissime Domine Deus, cuius iam tam ferreum pectus, tam adamantina inens, vt hu-
iuf-

iusmodi narratione non repleantur cō-
 punctione viscera , cor amaritudine ,
 oculi lacrymis, ora singultibus, linguaq.
 clamoribus? Quis non doleat de morte
 tua, in cuius transitu sol obscuratus, ve-
 lum templi scissum , petræ disruptæ , &
 aperta monumenta? Poterit ne humana
 mens saxo esse durior, & inanimatis in-
 sensibilior? Plangat, quæ non dolet ani-
 ma , super iis quæ hîc dicuntur, quo-
 niam meritò plangēda est. Aliena quip-
 pe videtur esse à corpore , cū non tri-
 statur capitis passione. Timeat verò præ-
 scindi tamquam putridum membrum.
 Eia igitur , clementissime Pater , trahe
 me in te , vt omnino quod in te est , in
 me sentiam , ac tantopere tibi condo-
 leam, quantopere tu ex charitate pro me
 pati ac mori dignatus es . Totum quod
 in te fuit in me experiar , vt per hoc à
 peccatis præseruatus , in omnibus pie-
 tatis officiis, quæ in tua passione & mor-
 te aperiuntur, me exerceam . Assumam
 mihi passionem & mortem tuam tam
 fortiter, ac si præsens oculis eam intue-
 rer. Ego enim illam promerueram , &
 tu pro me pati dignatus es. O si ex cha-
 ritate

ritate hæc omnia in me traherem, sicuti tu pro me pertulisti; profectò in summam admirationis altitudinem caderet, si cor meum intra me ex charitate non rumperetur. Eia Domine, per hanc tuam inexplicabilem charitatem fac me talem, qualem me ab æterno præordinasti, & præpara me per gratiam, vt gloriæ fiam particeps in æternum. Amen.

P A R S S E C U N D A.

O Misericordissime Deus, velum tēpli pendens ante sanctum Sanctorum, in quod summus Sacerdos semel in anno intrabat, scissum est; quò omnia sub legis velamine tecta, iam per mortem tuam manifestata sunt. Hoc operata est mors tua sanctissima, vt nūc per fidem & spem nuda & aperta sint, quæ præteritis generationibus inuoluta fuerunt, & nos iam per Spiritum sanctum illuminari speremus, quod nec oculus vidit, nec auris audiuit, nec in cor hominis ascendit. Hoc enim præparasti in te sperantibus ac diligētibus te.

Velum scissum est à summo vsque deorsum. Nam grātia tua abundè satis est nobis ministrata & communicata,

vt

vt ab intellectu iam ad sensualitatem descenderit, & à spiritu in carnem; quò caro & sensualitas sæpè refrigerium in tentatione, tribulatione & dolore sentiant. Eia igitur Domine, qui iam crucifixus ipsemet in venerabili Sacramento ad nos descendis, aufer velum quod est intra intellectum & sensualitatem; vt quod per intellectus illuminationem mihi indies ad meditandum ac ruminandum instillas, transeat ad sensus & aures meas, ac oculos ita adimpleat, vt omnia extranea quæ in me influentiam tuę diuinę gratię impediunt, retrocedant; quò per gr̃atiam quam me aliquando experiri facis ad contemplationem gloriæ supernæ, ascendam, & ibi oculos mentis fixos habeam, vbi tecum esse desidero in perpetuum. Amē.

PARS TERTIA.

Terra mota est, & petraë scissæ sunt, & monumenta aperta sunt. O rem omnium maximè admirandam! muta elementa ferre non potuerunt, quòd tu Deus & Dominus eorum crucifigeris. Hoc, ô Pater, in me perficiatur. Moueatur in me omnis terrenus appetitus,

ad

ad amorem cælestium gaudiorum; quò nunc deinceps mihi sit conuersatio in sublimibus cælorum regnis, ad cuncta inferiora obliuioni tradenda. Moueatur ita in me terra, vt quidquid terrenum fuerit mihi decidat, & spiritus meus cum tuo sancto spiritu vniatur.

Petræ scissæ sunt. Eia nunc per mortem tuam amaram cor meum lapideum ad veram pietatem emolliatur, vt nunc non lapideum sed carnale sit cor, ad te in ter sancta Eucharistia recipiendum, quò te timeat, te diligat, te sequatur, & tu in eo pro tuo beneplacito teipso fruaris, ad temet in me prædicandum, laudandum, atque benedicendum sine fine.

Monumenta etiam aperta sunt, & multa corpora sanctorum qui dormierant, virtute mortis tuæ surrexerunt, tamquam testes resurrectionis tuæ. Quare non statim surrexerunt, sed post resurrectionem tuam exierunt de sepulchris, & ingredientiæ sanctam ciuitatem apparuerunt multis, qui postea in corpore & anima simul tecum ad cælos ascenderunt. Ad hunc modum, Deus Domine, operare in me per virtutem venera-

bilis

bilis Sacramenti , vt de resurrectione sancta in nouissimo die certior fiam. Ad veram aurem spem de his concipendam, fac me vigilantem spiritu, quò me tam seriò præparem ad tuum aduentum in venerabili Sacramento, ac si iam hora mortis meæ instaret. Da gratiam, vt exurgam de somno malitiæ, quæ me pusillanimum facit , ac si omnia mea opera bona essent frustranea, & per gratiam tuam operari non possem, quod esset gratum in oculis tuis . Resuscita me Domine ad verum omnium virtutum bonorumque operum exercitium, quò mihi hoc tempore ita cum formica prouideam, vt in futuro securus & nullius indigens inueniar. Eia Domine, intra ad me per venerabile Sacramentum, & per te ipsum hæc in me operare, quò virtus mortis tuæ sanctissimæ præueniat me , & passio tua in me gaudium spiritus , & mors tua vitam æternam operetur. Amen.

PARS QUARTA.

CEnturio autem , & qui ex aduerso stabat cum eo custodientes te, vbi viderent , quòd sic clamans expirasses,

visio

viso iam terræmotu, & his quę fiebant, timuerunt valdè, & glorificauerunt Deum, dicentes: Verè homo iustus & Filius Dei erat iste. & omnis turba eorum qui aderant ad spectaculum, audientes & videntes quę fiebant, percutientes pectora sua reuertebātur. O benignissime Deus, quàm cirò virtus tui pretiosi sanguinis apparuit, quem obtulisti Deo Patri precibus ignitis, quibus etiam pro crucifigentibus te orasti! Nam hæc quę per terræmotum & alia signa præfigurata sunt, etiam per corda hominum adimplentur, cum iam timore Dei, qui est initium sapientiæ, mouerentur. Da igitur & mihi Domine, quotiescumque hæc mediter, timore tuo ad vitæ emendationem pertrahi, vt per meritum pretiosi sanguinis tui fides in me adaugeatur, quò de die in diem fortiùs te in me sentiam per efficacem à peccato auersionem, & perfectam ad te conuersionem, vt ita fructus tuæ benedictæ passionis & mortis applicentur mihi, quò ex admiratione percutiam pectus meum, agnoscens quòd peccatis meis hæc omnia promeruerim, quę tu

ex

ex immensa charitate pro me pati dignatus es. Da etiam, ut cū Maria Magdalena, & Maria Iacobi minoris & Ioseph matre, & Salome matre filiorum Zebedæi, à longè stem, & te in cruce pendentem videam. Ingrediar cum his per cicatricum rimas in cordis tui pentalia, ibique tecum pariter inhabitem; ne tui corporis miserabilis, sanguine pretioso tinctæ pellis & carnis, profundorum ac latorum vulnerum, passionisquæ tuæ multiplicis obliuione vquam capiar; sed tibi semper præsens, omnes hostium tétationes propulsem, ac in omni patientia & humilitate tibi semper adsim. Ad hoc me adiuua amantissime Domine, & sanguinum sponse, ut per aspectum sanguinis tui sanctissimi omnes tribulationes vincā, & tibi in perpetuum placeam. Amen.

*Tertia MEDITATIO, quòd vnus
Militum lancea latus DOMINI
aperuerit.*

PARS PRIMA.

O Clementissime Pater, vbi impij sacerdotes, & scelerati Iudæi hæc faci-

facinora perpetrassent, & te Filium Dei viui Dominum ac Saluatorem meum in cruce turpissima morte affecissent, timebant ne publici latrocinij tamquam homicidæ arguerentur: cùm omnes pij tibi ex signis testimonium ferrent, quòd Filius Dei esses, ipsi ad alia se conuerterunt, &, vt intolerabilem nequitiam suam absconderent, rogauerunt Pilatum vt in cruce pendentium frangerentur crura, & tollerentur, ne remanerent in cruce corpora sabbato (erat enim magnus dies ille sabbati.) Confundebantur planè in seipsis, & redargutionem publicam verebantur. Quamobrem sub legalis obseruantia zelo postulabant hæc instanter, cùm Deut. 21 haberetur: Non permanebit cadauer eius in ligno. Multi vtique poscebant bonum, legisque custodiam præuaricatores ipsi quærere simulabant: minimè tamen valebant recto corde decreta legis obseruare, qui latoré legis occidere curauerunt. Hic, ô Domine, est cursus huius sæculi. Verùm enimuero egerunt tam simulate sub specie iustitiæ tecum, vt coram

mun-

mundo rectè agere viderentur : quorsum ergo ego me affligo, dum homines mihi obloquuntur, & contemptui habēt, in omnibus quę pro gloria tua egerim ? Da igitur patienter feram omnem iniuriam ab amicis mihi sub specie pietatis illatam, & perseuerem in bono proposito à te mihi inspirato, ne mundi lenociniis aut dolo malo deceptum me inueniam. Si dent bona verba, & dirigant sermonem cum fauore, captantes beneuolētiam qua mundo studeant me tradere, non acquiescam eis ; sim quasi mortuus, non habens in ore meo redargutiones, vt ita in omnibus circa me tua diuina voluntas fiat, sicuti in te per malignos Iudæos Patris tui cęlestis voluntas est adimplenda, cū omnia mala, quę aduersum te impij sunt machinati, Pater tuus in bonum conuerterit.

P A R S S E C V N D A.

ERat interim, ô sponse sanguinum, inconueniens, quòd in solemni die Sabbati cadauera super terram manerent. Erat enim magnus dies ille sabbati. Verè magnus & singularis erat dies, in quo tu hominum Redēptor re-

L quie-

quieuiſti in tumulto. Sanè requietionis huius myſterium venerandum , diuina prænuntiauerẽ eloquia. Perfectis quippe cælis, elementis, animãtibus, & vniuerſis quæ ſunt , ipſoque plasmato homine, ſic legimus: Compleuit Deus die ſeptimo opus ſuum quod fecerat, & requieuit die ſeptimo ab vniuerſo opere quod patrarat. Quod in veritate fuit figura huius quietis tuæ , qua poſt mortem , peracto myſterio redẽptionis humanæ , in ſepulchro requieuiſti . Alioquin operaris adhuc, ſicuti & Pater (ſecundũ verbum tuum) videlicet gubernationem & regimen totius vniuerſi. Quapropter nihil boni à me, aut vllò homine proficiſci poteſt , niſi tu opereris. Rectè igitur ad declarandum talem diem Sabbati, qui ratione myſterij iam completi, præ aliis diebus eminebat, dictus fuit magnus dies Sabbati. Magnus dico , quia Sacramentorum multitudine ſolemnis. Dies namq. illa ſignificauit quietem, qua humanitas tua requieuit poſt crucem & mortem : denotabat etiam ſpiritualem quietem, qua corpus tuum myſticum , hoc eſt electi tui re-

quie-

quiescent à peccato & scandalo : imò demonstrabat quietem sempiternam, quam vnà tecum habebunt in vita cælesti. Eia Domine, qui hæc in veritate compleuisti, da vt hanc triplicem quietem in me sentiam, quò æternæ requiei spem concipiam. Numquam fugiat à me quies, quam propter me post passionem & mortem suscepisti, quò & ego tuo exemplo confidam me habiturum requiem post ærumnas & misérias huius vitæ. Singulariter da mihi requiem à peccatis omnibus, ne vmquam quid committam, quò te ad iracundiam prouocem. Si nòdum possum habere quietem intus aut foris à tentatione & pugna, si ab inclinatione & sensu maligno liber esse nequeam, da saltem requiem à consensu, ne vmquam inclinationi prauæ aut motui assensum præbeam, & multò magis caueam ne opere compleam. Super omnia da mihi requiem sempiternam, quæ est finis omnium; vt à laboribus tandem, pugna & tentationibus liber, tecum in æterna gloria requiescam. Amen.

P A R S T E R T I A.

Venerunt ergo milites , & primi fregerūt crura, & alterius qui crucifixus erat cum eo, Ad te autē cūm venerunt, non fregerūt tua crura, sed vnus militum lancea latus tuum aperuit , & cōtinuò exiuit sanguis & aqua. O quā mirabilia fuerunt omnia in tua benedicta passione ! Milites , vt placerent Iudæis, adhuc post mortem contumelia te affecerunt, sed hæc contumelia in magnum Sacramentum commutata est, Grande quippe inauditumque prodigium, vt de exanimato corpore sanguis exiret & aqua, Verumtamen maximum in re hac gesta nobis voluisti commendare Sacramentum, tui videlicet & Ecclesiæ vnitatem. Huius etenim spiritualis copulæ figura præcessit, quando de latere Adæ dormientis , vna ex costis ipsius subtrahēta narratur, de qua Eua cunctorum parens formata est, quæ Ecclesiæ typum gerebat, Hinc vigilāti verbo Euangelista vsus est, vt non diceret, Latus eius percussit, aut vulnerauit, sed aperuit, vt illic quodāmodò vitæ ostium aperiretur , vnde Sacramēta Ecclesiæ

mana-

manauerunt, sine quibus ad vitam, quæ verè vita est, non intratur. Hoc prænuntiabat, quòd Noë in latere Arcæ ostium facere iussus esset, quòd intrarent animalia, quæ non erāt diluuiο peritura, sicuti adhuc Ecclesia suscipit & custodit animas, ne diluuiο infidelitatis absorbeantur. Propter hoc enim prima mulier facta est de latere dormientis, vt inde reformaretur tibi coniunx, per id quod de latere tuo, dum dormires in cruce, effluxit. O mitissime Domine & Pater, da mihi iam liberum accessum ad hoc benedictū latus tuum, vt ibidem quasi à te absorptus, sentiam charitatem illam tuam ineffabilem erga me ostēsam, quòd ego eadem charitate accensus, te super omnia redamem. Singulariter fac mihi copiam ingrediendi hoc tuum latus benedictum, quoties miser & afflictus variis tētationibus obruor, vel etiam quid grauius pati cogor; vt huc me conuertendo, & tribulationis obliuiscar, & manus hostium euadam. In hoc etiam tuo benedicto latere recipe me in hora mortis, quando hostes simul omnes aduersum me insurgent, & terribilis de

me miserrimo peccatore proferetur sententia : tunc quæso hîc me absconde, donec transeat furor cum tua seuera sententia , quæ in die vindictæ nemini parceret. Descendat etiam, ô Domine, super me tuus qui de latere profluxit pretiosus sanguis & aqua , vt aqua illa benedicta me emundet ab omni inquinamento carnis & spiritus, ab omni mala inclinatione & carnis petulantia ; quò sincerus & cādīdus quotidie appaream in conspectu tuo. Descendat etiam qui de latere tuo effluxit pretiosus sanguis super me , & calefaciat tepidum cor meum, vt verè ardens & pius in omnibus virtutibus ac bonis operibus semper inueniar. Amen.

P A R S Q V A R T A.

HOc miraculum, piissime Domine, quo sanguis & aqua de benedicto latere tuo profluxit, vbique in orbe terrarum sancta confitetur Ecclesia , hoc multiplicibus Scripturarum diuinarum testimoniis roboratur. Insuper & qui vidit de te aquam emanare & sanguinem, testimonium perhibuit , & verum est testimonium eius. Nempe iste est

Ioan-

Ioannes Apostolus & Euangelista, qui præcipuo à te amore dilectus est, horum quæ memorata sunt fidelissimus extitit prædicator & scriptor. Profectò hæc facta sunt, vt Scriptura impleretur, quæ ait: Os non comminueris ex eo (*Exod. 12. Num. 9.*) Ad hoc quippe Moyfi fuerat imperatum, ne in sacrificij phasæ celebratione immaculati agni vllum comminueretur os. In te autem agno innocentissimo, Domine Iesu, figuræ veritas est completa. Non enim crura tua sunt fracta, quemadmodum duorum nequam tecum pendentium in cruce, sed tantùm latus tuum apertum, quatenus alia Scriptura perficeretur quæ dicit: Videbunt in quem transfixerunt. Et hæc omnia facta sunt propter nos, vt corpus tuum mysticum (videlicet electi, quorum caput es) integrum maneret, & nemo ex illo periret. Eia, benignissime Dñe, da vt ex illis vnus sim, & semper, quomodocumq. mecum agatur, apud te locum habeam, & maneam tecum hîc & in perpetuum. Verùm vulnerum cicatrices in tuo voluisti corpore retinere, vt sicut electis in-

centiuum dilectionis, ita reprobis irrefragabile fiant testimonium dampnationis. Ista omnia consummata in te, diu antè Prophetarum oraculis promulgata fuère, quatenus Catholica fides tam pro se quàm aduersus hereticorum muniretur errores. Da igitur mihi Domine eò respicere, vbi post hãc vitam plenum gaudium expecto, & sit cor meum semper cum tuo transfixo corde vnitum. Da vt per venerabile Sacramentum ita ad tuum aduentum preparer, vt duo saltem in me sentiam. Primum, vt firmam habeam spem inter electos tuos numerari, ne diabolus, aut infernus, aut mors, aut tentatio, aut pugna, aut dolor, aut paupertas, aut diuitiæ, aut fortuna, aut infortuniũ me à te separet: sed perseuerem tecum cõstans in omnibus, sicuti tu integer permansisti, vt ne os sit in te cõminutum. Alterũ, vt virtute Sacramenti venerandi me tuo diuino ac paterno cordi includas; ac tibi semper præsens sim, ne vnquam aliud in me sentiam, quàm in te sit. Hæc, ô sponse Dñe, per te ipsum operare in me, vt tu solus in me viuas, hîc in gratia, & postea in gloria.

Quarta

Quarta MEDITATIO, de depositione DOMINI Saluatoris de cruce.

PARS PRIMA.

CUm iam serò esset factum Domine (quia erat parasceue, quod est ante Sabbatum) venit Ioseph ab Arimathæa ciuitate Iudææ, homo diues, nobilis, decurio, bonus & iustus; hic non cōsenferat consiliis & actibus eorum; qui expectabat & ipse regnum Dei, & discipulus erat tuus. O Deus bone, da vt in spiritu hunc virum repræsentem, qui ab augmento nomen habet, vt & ego quoad vixero in virtutibus progressum faciam. Attēdam manē & vesperi sine intermissione ad passionem tuam, quò semper tuæ benedictæ passionis memoriam agam, ac insuper iustus coram te & omnibus hominibus inueniar, vt cor meum tecum cōcordet, & conuersatio mea sit pia & sine querela inter homines, & sic merebor tuus esse discipulus. Non sit autem mihi satis, si tuus discipulus sim, sed

magis cum Ioseph ab Arimathæa appropinquem ; vt tamquam sponsa te meum sponsum concupiscam , & corpus meum per venerabile Sacramentum cum tuo sanctissimo corpore vnietur , quò spem cōcipiam locum habendi inter decuriones Ierusalem cælestis. Nemo enim ibi inter decuriones recenseri potest, nisi hūc quā diligentissimè in obseruatione Decalogi sese exercuerit . Hæc est vera præparatio ad diem Dominicum, quo tu post quietem in sepulchro à mortuis resurrexisti. Fac ergo me idoneum , vt desiderio benedicti corporis tui, in venerabili Sacramento, ardeam , ac per hoc tibi vnietur , & te in anima & corde ita recipiam, vt ego ipse à te recipi merear. Si ad hoc cum Iosepho ab Arimathæa præparer , benè mihi erit . Præmitte igitur Domine Spiritum sanctum , qui hanc præparationem in me operetur , & infundat mihi charitatem , quæ nos tamquam vinculo perfectionis colliget, ne quidquam in me reperiatur , siue prosperum siue aduersum , quod nos separet ; sed ego in vera obedientia , sicut sponsa

ad

ad sponſum, me ad te ſemper conuer-
tam. Amen.

P A R S S E C V N D A.

IOſeph, Domine, non cōſenſerat con-
ſiliis & actibus eorum, quia per te
regnum Dei expectabat, & audacter in-
troiuit ad Pilatum, & petiit corpus tuū.
Audacem illū & intrepidum fecit amor
tui, & debitæ humanitatis officium.
Minimè expauit Phariſæorū atq. Pon-
tificum rabiem, non eſt veritus Præſi-
dis crudelitatem, nec humile ſplendidi
corporis tui opus erubuit. Propterea ne
ſacratiffimū corpus tuum indignè tra-
ctaretur, ab inuidis illud ſibi donari po-
poſcit, ſperans per locupletem merito-
rum cumulum ſe in ſublimibus cælo-
rum mansionibus poſſe morari. Eia igitur
Domine Deus, vt dignus inueniar
deſiderare corpus tuum in venerabili
Sacramento, da gratiam ſeparandi me
ab omnibus mūdānis & carnalibus re-
bus, ne hominum malignātium factio-
nibus me immiſceam. Expectem re-
gnum tuum, & quotidie ad perfectio-
nem cæleſtis patriæ anhelem. Nihil in
me reperiatur quod tuum diuinum ho-

norem obscurer. Ita transeam omnes homines, ne quempiam respiciam, quin semper tuam diuinam inspirationem sequar. Da per veram fidē semper cum Ecclesia vniri, & pretiosi corporis & sanguinis tui participem fieri, quoties hoc mihi expedire noueris. Non me in hoc impediat vlla creatura, nec diabolus, nec mors, nec infernus, sed per medium illorum omnium transeam, & te solum quāram pignus æternæ salutis, quo benè sit animæ meæ hîc & in perpetuum. Amen.

P A R S T E R T I A.

Pilatus autem miratus est, si iam obiisses. Meritò mirabatur. Quia in summam admirationis altitudinem cadit, quòd non citiùs mortuus esses, qui eò vitam protraxeras, vt iam in cruce pendens, quasi myrrhæ fasciculus factus esses, cùm ne guttam quidem sanguinis tibi reliquam fecisses, quin totum pro nobis effuderis. Pilatus itaque, accersito Centurione, interrogauit si mortuus esses. quod impiorum Iudæorum causa factum est, ne haberent occasionem calumniandi tuam sanctam

sanctam resurrectionem. Certus autem iam factus Pilatus de morte tua per Centurionem, donauit corpus tuum Ioseph. Quale munus hoc, & quàm præcipuum! Vtique super aurum, & super omnem lapidem pretiosum, electum. Thesauri vniuersi, & cuncta sæculi huius substantia, in comparatione ipsius, arena vilissima æstimanda sunt. Gaude igitur ô Ioseph, & tanto lætare munere: magnipende illud, & quasi oculi pupillam custodi: caue ne illud longè à te pariaris abesse: esto vbi illud, siue in domo, siue in tumulto: line oculos tuos sanguine illius, suoque liuore tuis medere vulneribus. O si hodie hæc gratia mihi eueniat! Oro quidem indies pro hoc beneficio: sed quando ô Domine experiar, vt vel semel ex toto corde gaudeam & exultem, de vero corpore tuo, quod in venerabili Sacramento recipio? Eia accipiam hoc semel cum vera cordis contritione, quò sensus mei cum tuis sanctissimis vulneribus vniantur, & ego tam pretiosum pignus quàm diligentissimè custodiam, vt per hoc solatium in omnibus tribu-

lationibus meis inueniam, in pusillanimitate conforter, & in cunctis virtutibus ac bonis operibus promouear. Nihil huic tuo sanctissimo corpori præferam, sed vniuersa quæ sunt, abnegem & relinquam, vt huic soli intendam. Si gaudeam de tuo benedicto corpore, te habeo, Ecclesiam sanctam, atque me ipsum. Tu enim es caput corporis, cuius ego me membrum esse spero, & desidero. Sis ergo ô Domine mecum, vt ego sim tecum; atque ita simul viuamus, hic in gratia, & postea in gloria. Amen.

P A R S Q V A R T A.

QVando iam, ô misericordissime sempiternæ Deus, de cruce deponeris, non longè aberat benedicta virgo Maria mater tua, quæ procul dubio præsens te in manibus suis assumpsit. O quantum lamentum, dum tuum miserabile corpus, tam dirè dilaniatum, percussum, & humiliatum, atque ita distractum, vt ne membrum quidem suum locum occuparet, totum flexibile tamquam lintheum quod digitis aduoluitur, corona spinea coronatum, clavis solutis, de cruce deponitur! Benedicta

dicta mater tua tristis fuit supra modum, videns te ita miserabilem & abiectum tamquam vermem qui pedibus conculcatur: imò contristata fuit vsque ad mortem, dum extrinsecus appareres, ac si numquam viuus vel mortuus eius oculis subiiciendus fuisses. Verùm cum iam de cruce deponeretur, summo gaudio perfusa est, quòd digna esset te in sinu suo materno recipere, licet mortuum, sanguine tinctum, & miserabiliter vulneratum. Quare oppidò gauisa te recuperatum ambabus vlnis amplexata est, cordi ac pectori suo apposuit, ore suo virgineo oscula incessanter tibi impressit, & omnia obsequia humanitatis exhibuit. Verùm hoc ingens gaudium summum mœrorem coniunctum habebat, dum cōsideraret primùm quis esses, videlicet Filius Dei viuentis, sapientia Patris, gloria cælorum, & corona Sanctorum omnium. Deinde quid perpeßus esses, qui factus fueras tamquam vermis, & nō homo, opprobrium hominum, & abiectio plebis. Denique pro quibus passus esses, nempe pro nobis miseris & fœtidissimis peccatoribus,

bus, hominibus ingratis, qui tuam diram passionem tam paruifacimus, qui sub tãto beneficio in salutem assumendo perimus, qui tua dira passione, vulneribus sacris, & morte amarissima tam impiè abutimur, ridentes ea & substantantes tamquam res lusorias; cùm tamen sine intermissione, sustinendo, abstinendo, & operando, gratiæ nobis pro iis agendæ essent. His consideratis, benedicta virgo Maria mater tua lætitiâ cum tristitia coniunctam habēs, te cum summa reuerentia in suum sinum virgineum atque maternum recepit. Hoc modo, clementissime Pater ac Domine, da vt & ego miserrimus peccator dignus efficiar te recipere in venerabili Sacramento. Assumam te tanto cū gaudio, quanto te de cruce depositum benedicta Virgo & mater recepit. Tu enim es Dominus meus, & Deus meus, qui vniuersa, quæ sunt in cælo, & in terra, exhilaras; tu es vita animæ meæ, per quam habeo omnia; tu es mihi auxilium in tribulatione, fortitudo in infirmitate, virtus mea vnica, perfectio omnium bonorum operum. Tu es solus, in

quo

quo cōquiescam, qui cor & sensus meos
 satiare potes : lætabor ne igitur in ad-
 uentu tuo, cū mihi appropinquas per
 venerabile Sacramentum? Meritò sanè
 lætor ex integro: nam quando tu ad me
 venis, habeo quasi cælum in terris; vt in
 omni tribulatione & dolore, in omni
 tristitia & afflictione sim quasi tecum
 in cælo. Nam tu mederis omnibus vul-
 neribus, tu consolaris omnes afflictos,
 tu confortas pusillanimes, tu in nobis
 tentationes vincis. Meritò igitur exulto
 in tuo aduentu per venerabile Sacra-
 mentum. nam tecum pariter ad me in-
 trat omne bonum, siue hoc intelligam,
 siue non intelligam. Verū hęc lætitia
 iustè mœrorem admixtū habebit. Nam
 dum animaduerto quid tu sis, & quid
 ego, quanta beneficia mihi exhibueris,
 & quā ingratus sim pro his, quanta
 passus sis pro me, & quā parum hęc
 recogito, meritò mœrore tabesco. Quid
 enim sum ego miser vermiculus terræ,
 spurcissimus peccator, fœtidissimum
 lutum, vt mihi aliquid assumam, qui
 dum me benè considero, nihilo minus
 sum? Quid igitur sum, vt tu Dominus
 meus

meus & Deus meus, creator cæli & terræ, magister omnium, lumen cæli, gloria Angelorum, & honor Sanctorum omnium, ad me terræ vermiculum (si adhuc nomen vermiculi merear) intres ? Multa & maxima mihi præstitisti beneficia, qui propter me homo factus, hanc mortem turpissimam assumpsisti: quod ego tam parum expêdo. Imò cum gratus esse deberam, sæpius proprium sequor cerebrum, & reddo pro patientia impatientiam, pro humilitate superbiam, & pro tua obedientia propriam voluntatem. Numquid igitur meritò cōtrister? Imò quod amplius est, tu ipsa veritatis sanctitas intras ad me foetidissimū, Deus ad hominem, iustitia ad publicanum, perfectio ad cor maximè instabile. Eia Dñe, da mihi hæc cū magno cordis singultu & oculorū lacrymis expendere, vt omnem virtutem & gratiam per tuum salutarem aduentum in anima experiar, & tu ita à me accepteris, vt solus omne dominiū in me habeas, & regas me secundum propositum tuæ sanctissime voluntatis, tã in corpore, quàm in anima, hîc, & in perpetuum. Amen.

Quinta

Quinta MEDITATIO, de Sepultura Saluatoris nostri.

P A R S P R I M A.

O Benignissime Deus , Ioseph mercatus est sindonem; & huic benedictum corpus tuum in-
noluit. Venit autem & Nicodemus, qui tibi appropinquare solebat nocte, ferens mixturam myrrhæ & aloës quasi libras centum. Hi venerunt ad benedictum corpus tuum honestè sepeliendum iuxta illud Isaia (cap. 11.) Et erit sepulchrum eius gloriosum. quod iam in veritate completum , vbi primates ciuitatis Ierusalem , videlicet Ioseph ab Arimathæa , nobilis decurio, & Nicodemus doctor legis & Princeps Phariseorum , ad sanctum corpus tuum terræ mandandum parati fuerunt. Non sunt ad hoc ministerium vsi famulis aut famulabus , sed ipsi per se hoc effectum curarunt ; sicuti primaria opera homines per se libenter expedire solent , & si quid minùs dignum , hoc per ministros curant.

Melius

Melius autem opus, quod hominem in anima promoueat, exerceri nequit, quàm hîc nobis exhibetur. Tu igitur, ô anima mea, in spiritu festina te iungere illis, vt sis tertius comes, quatenus sponso tuo hîc vltimum valeas humanitatis impendere obsequium: vide tamen ne tu vacua eas: secum (vt cernis) Ioseph sindonem defert, vt in ea ea sacrata Christi caro voluatur: Nicodemus autē, vt inungatur corpus, optimum myrrhæ thymiama confecit. Tu verò si sapiens fueris, ex oculorum fontibus imbrem lacrymarū educes, atque ex ipsis ad lauandum corpus plenum vasculum comportabis. hac aqua, manuum, pedum, ac lateris vulnera tui abluēs Redemptoris, necnon & reliquum corpus cruentatum, liuidum, dirisque sulcatum vulneribus. Omnem hunc congregabis liquorem, vt ne guttam quidem minimam perire permittas. Ex ipso autem saluificum tibi conficies balneum, ad tuorum detergenda vulnera delictorum, & ad vitiorum abolenda contagia. Sed ô amantissime Domine, & sponse sanguinum, à te mihi proue-

nire

nire debet, vt cum his duobus viris magnificis hoc ministerium ad salutem animæ tibi præstare possim. Da igitur mihi, cum summa cordis contritione tuæ amaræ passionis memoriam agere, vt virtus tui pretiosi sanguinis per tua sanctissima Sacramenta ad veram pœnitentiam mihi communicata, me non solum à reatu peccatorū, verum etiam ab omni mala inclinatione, & voluptate peccati, quæ multum mihi mœrorem adferunt, liberent; vt quod in te viuo & mortuo fuit, in me experiar. Amen.

PARS SECUNDA.

ERat autē in loco, vbi crucifixus es, hortus, & in horto monumentum nouum, in quo nondum quisquam positus fuerat, quod Ioseph ex integro lapide excidi curauerat. Ibi ergo propter parasceuen Iudæorum (quia iuxta erat monumentum) posuerūt te Dominum meum Iesum. Quis, ô Domine, satis mirari poterit opera tua magnifica? quæ ita sunt temperata, vt nihil omnino sit neglectum, siue tuam humanam humilitatem, siue diuinam Maiestatem consideremus; quæ hîc ita simul concurrunt,

runt, vt ne alteri parti quidquam desit. Profunda tua humilitas aperit sese in magna illa paupertate, quam Dominus omnium voluntariè assumpsisti. Et sicut in vita non habuisti, vbi caput tuum reclinares, ita & modò in alieno sepulchro reponi placuit, cùm nihil proprium habueris in terris. O si hanc in me experirer gratiam, qua nihil optarem in hoc sæculo, quod me deserat, sed omnem spem repositam haberem in futura vita quam apud te desidero in perpetuum! Da igitur Domine omnia temporalia despiciam propter te, quò tua præsentia contentus, in omnibus huius sæculi negotiis proximos mihi præferam. Non contristet me iactura bonorum fortunæ, quæ sunt diuitiæ, honores, & similia, sed gaudeam, si quando spiritualis, cælestis, atque æterni boni lucrum faciam. Et quare affectem temporalium rerum proprietatem, quæ nil nisi sollicitudinem generat? Præstat ne circa vnum, quod tu ipse es, versari ad inueniendam requiem animæ, quàm occupari circa multa, quæ distractiones varias adferunt? Eia spes mea, refugium meum

meum & virtus, da tecum pauper sim in terris, vt tecum in æternitate diuitias veras possideam. Amen.

PARS TERTIA.

Posuerunt te Dominum meum sindoni inuolutum ac aromatibus cōditum, in sepulchro nouo ex integro lapide exciso, sicuti tuam diuinam Maiestatem decebat. Quemadmodum enim à præclaris & magnificis viris es sepultura traditus: ita etiam in egregio & insigni sepulchro sepeliri debuisti; atque hoc, modo optimo. Verum ô Domine, quis potest mente assequi, quātum mysterium, quātave vtilitas in hac tua gloriosa sepultura lateat? Beatus, qui in spiritu experitur, quod Ioseph hic corporaliter peregit. Eia Domine, fac nos dignos, vt cum Ioseph ab Arimathæa te semper recipiamus in venerabili Sacramento; & vbi iam per fidem iustificati sumus in Baptismo, fac nos etiam esse iustos in cogitationibus, verbis & factis; finis diuites in operibus bonis, vt dignè regnū tuum expectemus. O Pater misericordiarum, ego venio cum fiducia ad thronum diuinę Maiestatis ad

te vniuersorum Regem, petens humiliter, vt tuum mihi digneris retribuere filium, quem propter peccata mea tam dirè percussisti; vt illum præsentem intuendo, sine intermissione perpendam quanto pretio me redemeris, quò me ipsum tãti faciam, quanti tu me fecisti, ne tam leuiter peccato aut creaturis tradam, quem tu pretioso sanguine Vnigeniti tui Filij acquisuisti. O nunc anima mea, labora diligenter, curre instanter, nec te tædeat laboris, patienter sustine quasuis tribulationes & dolores, quamdiu Altissimo placuerit; exerce te in ieiunio & oratione, & alijs quibusuis misericordiæ operibus; clama post Deum Patrem omnipotentem, vsque dum ad Vnigenitum eius Filium tractus fueris. Vbi verò eum obtinueris, velut pupillam oculi custodi, in te reconde, & charitatis brachijs amplexare. Vt autem hunc thesaurum, ô Deus totius consolationis, diligenter custodiam, da gratiam, vt, abdicatis priùs voluptatibus, emam mundissimam sindonem, hoc est puram conscientiam ab omni peccati voluntarij labe deterfam, vt ei Domi-

num

num meum inuoluam. Da quoque præparem aromata, hoc est diuersarum odoramenta virtutum, quibus condiam corpus Domini mei; si non verum, saltem mysticū corpus Christi inungam, hoc est multos instruam, atque ad exercitium bonorum operum prouocem, quò cum Apostolo tuo Christi bonus odor sim in omni loco. Amen.

PARS QUARTA.

PORRò, benignissime Deus, largire vt diligenter meditando in petra, quæ tu ipse es, orandoque deuotè, nouum tibi faciam sepulchrum. Da in operibus humanitatis tuæ cōtemplari Diuinitatem, atque in suscepti hominis infirmitate confiteri tuam Maiestatem, & tunc soliditatem petræ viriliter penetrabo, atque in huiusmodi spiritualibus exercitiis factus assiduus, quietis & pacis tumultum fabricabo; in quo, fide simplici, & ignita charitate cooperante, te sponsum meum inseparabiliter collocem. Tu enim familiariter requiesces in nobis, si ab humanis segregati aspectibus, in gratiæ tuæ tumultum ingressi fuerimus, vbi nullus terrorem in-

M cutiat,

tutiat, nec per aduersa nec prospera, nec
per impatientiam nec superbiam. Sed
tunc delectabimur in multitudine pa-
cis, corpusque nostrum tuo Dominico
corpori sociabitur, imò obliti omnium
quæ foris sunt, feliciter admodum in hoc
piritali tumulto tecum requiescemus,
In hoc Domine omnes meæ deliciæ; hoc
obtento, habebomnia, Hinc deside-
rio venerabilis Sacramenti venio ad te,
vt tu in me sepultus, omnem quietem
& pacem, quantum possibile, compor-
tes. Verum ne quidquam incommodi
patiar, propter obstrepentes exteriores
tumultus, ingens saxum ad tui sepul-
chri ostium mihi aduoluendum est. Da
igitur ô Deus diligentem ac perseue-
rantem adiiciam menti meæ custodiam
contra fallacias dæmonum, mundi illece-
bras, & carnis lenocinia, quæ ex corru-
pta natura & sensuum abusu proueniunt;
quò securus te animæ meæ thesaurum
possideam, expectans fructus mysterio-
rum resurrectionis & ascensionis tuæ,
atque sancti Spiritus consolationis. In-
terim verò Domine, cum resurrectio-
nis adueniat hora, parem compunctio-
nis

nis

nis & deuotionis aromata, atque ea pile
 pectoris tundam, conficiens inde vn-
 guentum optimum ad reficienda corda
 infirmorum; & vngam proximū meum
 vnguento patientiæ & humilitatis, vt
 ego ipsemet ex eo pacem & quietem
 inueniam. Nam si ego ita proximos
 meos inungam, odor istius spiritualis
 vnguenti reflectetur ad me, vt ex eo gau-
 dium & exultationem sentiam. O Pa-
 ter misericordiarum, dignare hoc in
 me operari, vt tanto tranquillior sim, ad
 vnionem tecum ineundam, dum in ve-
 nerabili Sacramento te accepero; &
 pacatis sensibus per intellectum expen-
 dam, quid pro me miserrimo peccato-
 re tuleris & feceris, quod tu mecum, &
 ego tecum sim hîc in gratia, & postea
 in gloria. Amen.



MEDITATIONES IN RESVRRECTIONEM IESV CHRISTI.

DIE DOMINICA. MEDITATIONIS PRIMÆ PARS PRIMA.



DEVS Pater omnipotens, benedictio & claritas, gratiarum actio, virtus & honor tibi sit in sæcula sæculorum, qui hunc diem gloriosum fecisti resurrectione Filij tui Domini nostri Iesu Christi, qui benè admodum commendavit spiritum suum in manus tuas paternas, dum in cruce moriens debuerunt humani generis solueret; rectè admodum (inquàm) spiritum suum tibi commédavit. Nam qui in te sperat, non confunderetur. Quare curam illius habuisti, non tantùm secundùm spiritum, verùm etiam secundùm carnem; quæ non magis est putrefacta in sepulchro, quàm

quàm anima sit derelicta in inferno. Nam spiritu in sua passione dicebat illud Prophetæ (*Psal. 15.*) Prouidebam Dñm in conspectu meo semper, quoniam à dextris est mihi ne commouear. Propter hoc lætatum est cor meum, & exultauit lingua mea, insuper & caro mea requiescet in spe. Quoniam nō derelinques animā meam in inferno, nec dabis sanctū tuum videre corruptionē. O Pater de cēlis Deus, sicuti hæc omnia in humana Christi filij tui natura sunt peracta, ita da & mihi hæc in natura mea experiri; vt si quādo per passionem & mortem Filij tui benedicti contrister, per eiusdem resurrectionē renouari merear. Tibi resigno, quidquid in me est secundū spiritum, animam & corpus: tu totum hoc, sicut Vnigenitum tuum Filium custodi, vt in ipso, per ipsum, & cum ipso tibi semper repræsentet. Si enim cum ipso fuero in labore, gratam etiam cum ipso expectabo requiem. Quidquid in terris mihi eueniat, accipio in spe; vti benedictus Filius tuus spe resurrectionis omnē contumeliam, passionem, & mortem sustinuit. Nam om-

nia nostra in spe fundata sunt. Qui arat, in spe arat seminandi & metédi granum suum; qui in stadio currit, fortiter currit propter brauium: qui spe lucri nauigat, immittit se mari: nemo quidquam arripit, nisi lucri causa. Hinc Propheta Regius: Inclinaui cor meum ad faciendas iustificationes tuas in æternum propter retributionem. Sicuti igitur vnigenito Filio tuo compēsasti passionem & mortem, resuscitans illum: ita & mihi ô Pater æterne compensa omnem tristitiam & dolorem meum, & huius cōpensationis spem in me adauge, vt afflictiones & iniurias paruifaciā; & de spe certior factus, ita me a te cōuertam, vt in persecutione & miseria suminū gaudium inueniam, cogitās iam rerum vicissitudinem instare, vt pro mœrore gaudium expectem, vbi, si in lætitia essem, luctus me maneret. O amantissime Pater, vni me ita cum benedicto Filio tuo, vt in lætitia & tristitia hoc semper in me sentiam, quod & in ipso; atq. ita tamquam sponsa sponso coniuncta, assiduè cum illo te laudans atque glorificans, tibi semper præsens inueniri merear. Amen.

P A R S

P A R S S E C V N D A.

O Iesu Christe, Deus Domine, hactenus in tristitia & dolore fui, memoriam agens benedictæ passionis & amaræ mortis tuæ : sed iam supra modum lætor & exulto iuxta verbum Prophetæ David, dicentis : Ad vesperum demorabitur fletus, & ad matutinum lætitia. Nam in die Paschæ cùm à morte resurrexisses, omnem dolorem & cruciatum obliuioni tradidisti, & lætus ac hilaris in alia vita apparuisti. Mors in te locum habere nequiuit, qui per temporalem mortem, æternam destruxisti. Sed iustum est, quòd gloriam resurrectionis inueneris. Nam hoc tibi debebatur via diuinæ iustitiæ, quæ deponit potentes de sede, & exaltat humiles. Posteaquam ergo ex charitate & obedientia Dei, te humiliasti vsque ad mortem, mortem autem crucis; erat planè necessarium, vt rursus ad gloriam resurrectionis exaltareris. Quare dicebas ad Patrem (*Psal.* 138.) Domine probasti me, & cognouisti me : tu cognouisti sessionem meam & resurrectionem meam. Sessionem tuam cog-

nouit, id est abiectionem, patientiam, & tormenta tua. Sed cognouit resurrectionem, hoc est gloriam nouæ atque æternæ vitæ. Possum ergo nunc esse in mœrore, cùm tu qui vulneratus fueras, es sanatus; & mortuus, iam reuixisti? Possum iam cogitare, te mei obliuione teneri, qui in afflictione & passione maxima, mei es recordatus? Eia Domine, conuertantur quæso nunc cor & anima ex toto ad te, & uiue ac operare in me pro tuo beneplacito, vt sentiam in omni miseria, tentatione & pugna, quòd tu à mortuis surrexeris, & viuas in æternum; ne hostis aduersum me insurgat, ac si tu iam mortuus obliuioni me tradidisses. Da vt spiritus & anima in te uiuant, sicut tu uiuis in ipsis; ac de manu tua accipiant, quidquid etiam aduersi senserint, parati quotidie tecum pati, vt & tecum glorificentur. Et quando in corpore affligor, & in anima tristior, da vt spiritus in te ac tecum renouatus, afflictionem corporis, & animæ tristitiam indies patienter ferat, vt tandem simul tecum benè sese habeant, & uiuant in perpetuum. Singulariter autem,

tem,

tem, qui nunc ad me venire dignatus es per venerabile Sacramentum, operare nunc in me, vt ego ex toto corde hilaris semel in me sentiam, quantum gaudiū tua sanctissima resurrectio mihi & toti mundo attulerit; ac eo ita afficiar, vt numquam huius sæculi voluptati locum dem, nec vlla aduersitate contrister, sed in spiritu ita recreer, vt in corpore & anima eius particeps inno-uationem sensuum experiar; quod abstractus ab omnibus imperfectionibus ad virtutum perfectiones, in te pariter quotidie viam, & vitam meliorem expectem. Amen.

P A R S T E R T I A.

Verū sponse mellitissime, cū resurrectio tua necessaria esset humanæ tuæ naturæ renouandæ, & omnium nostrū cordibus exhilarandis; non diu illam distulisti, sed resurrexisti quā citissimè, vt in fide diuinitatis nos omnes confirmares & confortares. Verū vt corroboraremur in fide humanitatis & mortis tuæ, voluisti tempus interponi inter mortem & resurrectionem. Nam si non sepultus rediisses

M 5 ad

ad vitam, non fuisset mors tua visa vera mors, & per consequens nec resurrectio vera. Sed ad mortis veritatem comprobendam, satis fuit, ut ad tertium diem resurrectionem tuam distuleris. Non enim fieri poterat, quin tanto temporis spacio aliquod vitæ signum manifestaretur in eo qui mortuus præsumeretur. Ad hunc modum, ô Domine, si unquam vitia parua aut magna incurro, ne finas me iis inhærere, sed citò resurgam, & redeam ad te, ne anima mea obdormiat in morte. Verùm tertia die resurrexisti in honorem numeri ternarij, qui perfectus est, & sanctificatur trinitate personarum in Diuinitate, & in cunctis à te creatis reperitur. Quidquid enim creatum est, habet tria; videlicet principium, medium, & finem. Nunc ergo, ô Domine Deus, tu es principium meum. Nam tu me creasti cum non essem, tu me redemisti cum perditus essem, tu me lauisti & sanctificasti in tuo pretioso sanguine, tu ad me venisti in venerabili Sacramento, ut ista omnia in me renouares. Prætereà es finis meus. Tu namque es, & debes esse, quidquid

cogi-

cogito, loquor, aut ago; non debeo aliud intendere quàm te: quando tuo honori seruiui, quando te finem meum & conclusionem obtinui, habeo omnia. Verùm vt in me sentiam te principium meum & finem, sis etiam medium; vt viuas, cogites, loquaris, & opereris per me. Ego totum me commendo tuæ diuinæ prouidentie, vt sicuti tu ad me venire dignatus es per venerabile Sacramentum: ita mihi sis totus in toto, & vendices tibi imperium in me, ne vel caro vel sensus, ira vel concupiscentia, velle aut desiderare, ratio vel intellectus sibi quidquam assumat; sed tu solus mihi toti domineris pro tuo beneplacito, ne vnquam principio aut fine destituar. Si hæc in me sensero, verè mysterium resurrectionis tuæ sanctæ in me experiar. Præter hæc, mi Sponse, resurrexisti tertia die ad insinuandum, quòd per mortem tuam vnicam corporalem, nostram duplicem, videlicet animæ & corporis, mortem destruxeris. Nam mors tua vnica, fuit lumen iustitiæ, quod operatus es pro nobis innocenter moriendo: sed mors nostra, tam

corporis quàm animæ , est tenebrosa propter peccatum . Ad hunc modum, mi Domine , destruat hodie lux tuæ iustitiæ tenebras iniquitatis meæ, vt in tuę gloriosæ resurrectionis lumine sit quidquid in me est . Hinc etenim vnā totā diem, & duas integras noctes in sepulchro fuisti. Insuper indicasti per hanc tuam resurrectionem tempus tertium; quod iam per te die tertia resuscitatum, principium habuit. Nam fuerat tempus ante legem scriptam , quo omnes ductu naturę viuebant : & erat tempus sub lege Moyfis , quā nullus mortalium seruare poterat : sed iam tecum, & per te exordium habuit tempus gratiæ, quo à te solatium & auxilium habemus, ad operandum bonum, & malum declinandum, virtute Spiritus sancti, & ad vincendos omnes inimicos. Non igitur iam sequar motus naturales , aut prauos appetitus, nec operer bonum ex necessitate, aut timore seruili; sed omnia ex charitate faciam, & sequar te in cunctis vt filius patrem , respondendo diei gratiæ, & tēpori salutis, quam per tuam resurrectionem nobis attulisti. Deniq.

demon-

demonstrasti nobis tertiū statum, Sancto-
 rum videlicet, qui te resurgente ini-
 tium habuerunt. Fuerunt enim Sancti
 sub figura veteris legis, in quibus tibi
 complacuisti; sunt adhuc Sancti sub
 veritate fidei, qui ambulantes in fide ti-
 bi quoque placent: sed tertius & perfe-
 ctus status Sāctorum est propriè in glo-
 ria æterna, quam tua sanctissima resur-
 rectione inchoasti. Eia Domine, pla-
 cuerunt tibi homines sub figura legis:
 da vt & ego tibi placeam in veritate fi-
 dei; & te per vnicam fidē in corde meo
 ita acceptem, vt coram te in me sen-
 tiam, quid tu vñquam pro me feceris,
 atque huic ita intendam, vt certitudine
 spei expectem consortium Sanctorum
 tertij status, videlicet eorum qui modò
 sunt in gloria, quam tu hodie tertia die
 resuscitatus inchoasti. Ad hoc succurre
 mihi & fer suppetiās ō Pater misericor-
 diarum, & largitor gratiæ, vt sic per
 tuam resurrectionem gaudium habeam
 in perpetuum. Amen.

P A R S Q V A R T A.

POrro Domine Deus, post mediam
 noctem resurrexisti, cū nocte iam

M 7. trans-

transeunte dies appropinquaret. Nam sicuti vesperi dum tenebresceret, mortuus es, ad demonstrandum quòd morte tua tenebras peccati & pœnarũ dissipares: ita post mediam noctem, dum in proximo esset dies, resurrexisti, ad designandum quòd per sanctam resurrectionem nos educeres ad lucem gloriæ. Hinc primo die hebdomadæ, qui & primus fuit in creatione, resurrexisti. Sed primus creationis dies transiit ad tenebras, cùm peccatum præuaricationis secutum est, sicut & nox. Verùm dies resurrectionis, qui est dies gratiæ, à tenebris, nèpe à matutinis incepit. Tu enim es qui ex tenebris facis clarescere lumen, vt per gratiam noui Testamēti, & communicationem tuæ resurrectionis sanctissimè audiremus illud Pauli (*ad Eph. 5.*) Eratis aliquādo tenebræ; hoc est in peccatis viuentes; nunc autem lux in Domino, & hoc per nouam vitam, quæ est vita virtutum. Hoc ô Domine hodie in me operare per tuam sanctam resurrectionem; vt nocte peccati iam præterita, ego in die virtutum ambulem, intendens diligenter diei gratiæ, quæ hodie

die mihi per tuam gloriosam resurrectionem est orta, ne in vlllo negotio excedam, nec vsquam offendam, sed ambulem in die gratiæ, donec ad diem gloriæ perueniam. Verùm vt de his certior fiam, da virtute diuini Sacramenti in me experiar fructus & vtilitates tuæ sanctæ resurrectionis, ac sentiam quod in me tu etiam resurrexeris, quò tu in me viuas non mortalis, hoc est secundùm carnem aut sensualitatem, sed immortalis, hoc est secundùm spiritum & intellectum. Nam si tu mortalis in me viuas secundùm carnem & sensus, facile te per pusillanimitatem, impatentiam, superbiam, luxuriam, inobedientiam, & id genus alia vitia perdidero, vt resurrectio tua mihi nõ profuerit. Quare necessarium est, vt nunc deinceps à mortuis resuscitatus in me secundùm spiritum & intellectum viuas, ne dolor aut tristitia, tentatio aut tribulatio, diabolus aut mors à te me separet; sed in omnibus, si quæ secundùm carnem aut sensus mihi eueniant, ad spiritum & intellectum me conuertam, atque ibidem te immortalem inueniendo, benè animatus

matus tecum viuam , expectans consolationem exterioris hominis , quò hîc tandem spiritus ab omni miseria liberatus in libertate uiuat & exultet . Hoc ô Domine Deus est desiderium meum, quò per tuum salutarem ad me accessum in sacrosancta Eucharistia, gratiam tuam in me experiar , & sentiam quòd tu hodie in teipso operatus sis omnium nostrum iustificationem ; & hæc ipsa iustificatio in anima mea operetur , vt peccato iam in me per mortem tuam mortificato, vita virtutum cum tua sancta resurrectione in me inchoetur ; & iam superbia deuicta , humilitas in me uiuat ; iracundia & impatientia declinatis , mansuetudo & patientia in me locum habeant ; murmure & inuidia superatis , sola charitas mihi dominetur : porro sensualitate & obstinatione profligatis , obedientia in me vigeat & florescat . Propterea enim à mortuis resurrexisti , vt ego peccato mortuus , virtuti tecum viuerem . Hinc etiam ad me venisti per venerabile Sacramentum , vt peccato in nihilum redacto , tu me in vita virtutum confirmares . Eia igitur

Do-

Domine , sis in me & mecum , viuas in me & mecum , vt & ego tecum sim, & viuam in perpetuum. Amen.

Secunda MEDITATIO, de qualitate CHRISTI resurgentis.

PARS PRIMA.

TE nunc decet hymnus Deus in Sion ex parte resurrectionis tuæ , per quam nostram naturam tantopere nobilitasti , spem resurrectionis animæ & corporis nobis conferens. Tu enim resumpsisti idem corpus, quod in cruce pro nobis datum, sepulturæ traditum fuit, tuum (inquam) verum corpus, eiusdem substantiæ, sed alterius gloriæ. Quare quibus manifestatus es , manifestasti te ipsum secundum propriam voluntatem, alijs in forma hortulani , alijs in forma peregrini, & alijs alio modo. Eia igitur Dñe, qui ad me venisti in venerabili Sacramento, ostende quòd idem sis, qui pro me in cruce mortuus, & sepulture traditus es: consolare me, & gaudio magno me suffunde , sicuti in illo tempore discipulos

tuos

tuos exhilarasti, & consolatus es. Deglutiat corpus tuum corpus meum, cui per venerabile Sacramentum associatum est; auferat à me omnes passionēs & morositates, omnem impatientiam & superbiam, vt simplex, fortis, & imperterritus cuncta mihi euenientia excipiam, vndecumque etiam proueniant; vt per te semper vnus & idem permaneam, in patientia, humilitate, & obedientia, ne vñquam aut anxietate, aut pauore, aut tristitia, aut dolore perturbaber, sed cuncta transeam, ac si me non concernerent, & carni mortuus spiritui tantummodò viuerem; sicuti erit post rerum omnium innouationem, quam nobis tua gloriosa resurrectione attulisti. Hoc nunc amantiſſime Domine in me operare, vt caro spiritui, ac sensus intellectui post tuam resurrectionem subiiciantur; & ego in me sentiam quòd tu es, & manes in perpetuum, vt & ego in te, & per te innouatus, in virtute perseuerem in æternum. Amen.

P A R S S E C V N D A.

Integer Domine, plenus atque perfectus resurrexisti à mortuis, vt benedicto

dicto corpori tuo nihil deesset. Nobis etenim promisisti, ne pilum capitis nostri perituum, cum omnes capilli capitis nostri numerati sint. Tu ergo non potuisti deficere in eo de quo nos securos reddidisti, quin ossa, caro, sanguis, & quaecumque perfectionis humanae sunt, perfecta in te fuerint. Cum igitur & ego modò talem te in venerabili Sacramento acceperim, operare quæso per tuam humanam atque diuinam presentiam; ut quidquid in me infirmum & fragile, per te firmum & stabile fiat. Secundùm animam conforta in me tres facultates, memoriam videlicet, intellectum & voluntatem. Memoriam confirma, ut mecum expendam opera tua mirabilia, quò cunctas vanitates obliuioni tradam. Intellectum meum illumina, quò tecum vnitus, perfectè contempletur, ac in se sentiat, quod in te est, ut tecum quasi vnum factus prælibationem experiatur eorum, quæ nec oculus vidit, nec auris audiuit, nec in cor hominis ascenderunt, & post hanc vitam nobis perfectè aperientur. Voluntatem meam planè conforma tuae

diui

diuinæ volūtatī, ne vlla re ad gaudium aut tristitiam plus mouear, quàm placitum fuerit ante te, sed cū tuis sanctissimis mandatis semper conueniam. Inferiores etiam animę vires in me adimple, videlicet, rationem, iram, & concupiscentiam, quò ratio mea lumine rationis tuę illuminata numquam aliud quàm iudiciū tuū intēdat. Ira mea, tua diuina iustitia temperetur, ne vquam citra rationem irascat. Concupiscentiam etiam intra limites contine, ne præter necessitatem quid appetat, sed magis cælestibus quàm terrestribus inhiet; vt quò hīc plura relinquit, eò potiora & ampliora posthac inueniat. Sed in corpore meo innoua carnem, ossa & sanguinem, & cuncta huc spectantia, quò omnia & singula temperentur ad gloriam nominis tui summam, animæ meę salutem, & proximorum meorum vtilitatem, ne in vllō cuiquam placere studeam nisi tibi, qui hæc omnia nobis donasti. Atque ita in me sentiam tuę sanctę resurrectionis fructum; vt sicuti tu perfectè surrexisti à mortuis, sic & ego perfectus in te permaneam, quò

omnia

omnia quæ intra me sunt te expectent, ac seruiant in gratia, vt tecum participant, ac laudem tuam annuntient in gloria. Amen.

P A R S T E R T I A.

Benedictio & gratiarum actio tibi sit Domine. Tu enim gloriosa tua resurrectione, causa es nostræ futuræ resurrectionis, non propriè causa meritoria (nam hoc nobis dira passione, & amara morte promeruisti) sed effectiua & exemplaris, quæ propriè tamquam instrumentum Diuinitatis operabitur nostram resurrectionem in nouissimo die. Te namque decet mortuos viuificare. Nam virtus tua vbique præsens attingit omnia loca & tempora, & talis contactus virtualis sufficit ad rationem huius efficientiæ. Tuba enim canente nouissima, omnes resument corpora, sicuti mane è somno expergefactus induit homo vestimentum suum. Et quia prima causa resurrectionis humanæ est diuina iustitia, ex qua habes potestatem iudicium exercendi, in quantum Filius hominis es; virtus effectiua resurrectionis tuæ se extendet non solùm ad

bonos,

bonos, sed etiam ad malos, qui sunt tuo iudicio subiecti. Verum ut inter bonos & pios computari merear, libenter tecum ago atque unionem in eo per venerabile Sacramentum, ut per hanc societatem, tuam gratiam consequar, & beneuolentiam in terris captem, quæ in perpetuum mihi continuanda sit in cælis. Trahe itaque me in te Domine, sim tecum vnū in gratia, ut inter omnes pios experiar tuam resurrectionem esse etiam causam exemplarem nostræ resurrectionis, qua videlicet sum ad formam tuam resuscitandus. Nam sicut resurrectio corporis tui, ex eo quod personaliter corpus tuum Verbo unitum, est prima tempore, ita etiam est prima dignitate & perfectione; ad quam nemo peruenire potest, sed quilibet eam pro sua conditione & vocatione imitabitur, prout Pater cælestis ei concesserit. Non quod Pater cælestis hoc exemplari indigeat, sed nos indigebamus te exemplari causa, quos oportet tuæ resurrectioni conformari, tam in corporis quam animæ resurrectione, secundum illud Pauli (*ad Philip. 3.*)

Refor-

Reformabit corpus humilitatis nostræ configuratum corpori claritatis suæ. Eia igitur Domine, fac ex tuo & meo corpore vnum virtute diuini Sacramenti, per quod ad me venire dignatus es, vt resurrectionis ad iustificationem nostram, me certiolem faceres. Verum si hoc experiri debeam, necessariò te in me operari ante omnia oportet resurrectionem animæ, vt hæc tibi in resurrectione conformetur. Eia itaque sponse mellissime, trahè me tamquam sponsam post te, & secundum exteriorem hominem cõforma me diuine mortis tuæ, vt ego peccatis, vitiis & infirmitatibus cunctis mortuus, nunc tuæ sanctissimæ resurrectioni, secundum gratiam iustificationis, quam hodie operatus es, conformer; vt sicut tu resurrexisti à mortuis per gloriam Patris, ita & ego in nouitate vitæ ambulem: & sicut tu resurgens ex mortuis, non moreris amplius; ita & ego me existimem peccato mortuum, vt tibi viuam. Hoc ô Domine operare in me, vt in animâ quotidie de tua resurrectione gaudeam, & hoc cum spe, vt par-

tem

rem habeam in resurrectione iustorum, quò tamquam filius tuus ex hac miseria migrem ad gloriam, & ex tribulatione ad gaudium, vt tecum in anima & corpore participem. Amen.

P A R S Q V A R T A.

IAm autem, ô Saluator piissime, resurrexisti cū cicatricibus vulnerum, in manibus, pedibus & latere benedicto asseruatis, non ex infirmitate aut impotentia, sed ex magna erga nos dilectione, & ad gloriam singularem. Vnde dicebas Thomæ, vt inferret digitum in loca clauorum, & manum mitteret in latus tuum. Has cicatrices in perpetuum circumferes ad sempiternum victoriæ triumphum, quem in cruce, per humilitatem, patientiam, & obedientiam obtinuisti. Reseruasti eas (inquam) non tamquam infirmitatem aut imperfectionem, sed tãquam gloriam magnam, cū ex locis illis clauorum, singularis claritas & maiestas patebit, tamquam signa virtutum, quæ summū nobis gaudium adferent. Da mihi Domine commorari in hisce tuis vulneribus, atque ita amarę passionis memoriam agere, vt
tandem

tandem in gloria & gaudio, tecum participem. Verum ex ingenti amore has cicatrices retinuisti; idq. multis de causis: quarum prima est, ut Patrem orares pro nobis, easque sine intermissione illi exhiberes, ad demonstrandum quo mortis genere pro nobis miseris peccatoribus mori dignatus sis, atque ita ipsum ad misericordiam nobis præstandam prouocares. Sentiam quæso Domine indies, quod loca clauorum retinueris, ne obliuiscaris mei, pro quo tantopere laborasti, ne tua benedicta passio & amara mors suo fructu priuetur. Nam si tu per hasce cicatrices vulnerum mei recordatus fueris, non obliuiscetur mei Pater tuus cælestis. Ipse enim honorat, adiuuat & consolatur, quotquot in te inuenerit. Secundò hæc loca clauorum retinuisti, ut omnibus tua morte redemptis ostenderes, quàm misericorditer eos redemeris. Ne igitur hæc cicatrices umquam eruantur ex corde meo, sed semper, quotiescumque manducauero vel bibero, quamuis partem & bolum in hisce cicatricibus intingam, ad gustandum hîc semel amorem, cuius ple-

N

nitu-

nitudine post hanc vitam satiandi erimus. Tertiò tandem has cicatrices retinuisti, vt in nouissimo die omnibus impiis demonstrares quàm iustè damnentur. Quare S. Augustinus (*lib. 2. de Symb. cap. 8.*) dicit te benè sciuisse quare cicatrices illas seruaueris. Nam sicuti Thomæ credere nolenti nisi tangeret & videret, ea exhibuisti, ita & inimicis tuis aperies, dicens in illo die; Ecce hominem quem crucifixistis, videtis vulnera quæ inflixistis, agnoscitis latus quod pupugistis, quoniam per vos, & propter vos apertum est, nec tamen intrare voluisti. O Domine, custodi me à generatione hac. Fac me patientem, pium, atque benignum, vt te in patientia expectem, Hinc ad te accessi, & accepi te in venerabili Sacramento, vt à te scilicet recipiar in tuis sanctissimis vulneribus, quò ibi sentiens amorem tuum inexplicabilem erga me, igne tui diuini amoris inflammor, atque ita pro mea humana fragilitate te diligam, sicuti tu amore perfecto me es prosecutus. Recipe igitur me in hisce vulnerum tuorum cicatricibus,

vt

vt in die iudicij intra illas abscondar,
donec furor tuus transierit, & iustitiæ
sententia pronuntiata fuerit, quo in ve-
ra ac sincera charitate tecum sum, &
permaneam in perpetuum. Amen.

*Tertia MEDITATIO, de mani-
festatione DOMINI post re-
surrectionem.*

PARS PRIMA.

QVandoquidem benignissime
Deus & Domine possibile non
esset, vt homo mortalis videret te resurgentem à mortuis; necessarium erat, vt in tuæ resurrectionis notitiam deueniremus, primùm per Angelos, ac deinde per tuam ipsius manifestationem, qua te ipsum iam resuscitatum notum fecisti. Hoc enim tuæ diuinitatis ordo postulat, vt rerum quæ supra nos sunt, per Angelos certiores redamur. Cùm igitur iam à mortuis resuscitatus non redieris ad vitam communem, quæ mortalis est; sed ad vitam immortalem, qua Deo conformis viuis; non debebas videri ab hominibus in

ipsa resurrectione, sed per Angelos resuscitatus annuntiari. Vnde mulieribus dicebant: Iesum quæritis Nazarenum crucifixum; surrexit., non est hîc. ecce locus vbi posuerunt eum. O Domine Dominus noster, quàm admirabile est nomen tuum in vniuersa terra, quòd tu Deus omnium, nos filios hominum tanti feceris, vt Angelorum visione dignos duxeris, ad dirigendum & erudiendum nos per eos, in omnibus quibus Ecclesia tua indigebat. Eia igitur Domine da gratiam, vt hoc tempore cum Angelis conuersationem habeam, & homines obliuioni tradam: atque ita me præparem ad perfectionis intelligenda mysteria, quæ Ecclesiæ inspirata nobis per cæremonias, quasi in tenebris aperiuntur. Hinc fiet, vt tu iam à mortuis resuscitatus, perfectiùs opereris in anima mea, ad declarandum mihi indies spiritualiter tuam sanctam resurrectionem; quòd ego singulis horis, imò quouis momento, spiritu innouatus, mundo & carni mortuus, tibi soli viuam. Verùm iam ad vitam reuersus, non manifestasti te nec per Angelos nec

per

per teipsum omnibus hominibus, sed
 testibus à Deo Patre præordinatis, ut
 per eos ceteris omnibus annuntiareris,
 iis videlicet qui ad vitam prædestinati
 erant. Atque ita innotuisti sponsæ tuæ
 matri nostræ Ecclesiæ, quæ in fide con-
 fortata exultat & lætatur in resurrectione
 tua, & studet quotidie tibi confor-
 mari magis, usque dum, hoc mortalita-
 tis pelago enauigato, in corpore & ani-
 ma simul tibi cōformis reddatur. Quod
 & ego tamquam filius matris Ecclesiæ
 spero. Quare indies me huc conuerto
 per usum sanctorum Sacramentorum,
 ut tamquā filius obediens tibi placeam,
 hīc in gratia, & postea in gloria. Adiuua
 igitur me Domine, & custodi in me
 gratiam tuam, qua hæc omnia in anima
 primū diligenter exerceam, & postea
 in corpore etiam de tua resurrectione
 gaudeam in perpetuum. Amen.

P A R S S E C U N D A.

Posteāquam, Domine, iam resurre-
 xisses à mortuis, non fuit tibi con-
 uersatio assidua cum discipulis, ut eos
 in fide resurrectionis tuæ sanctæ con-
 fortares. Nam si continuò cum illis

conuersatus fuisses, arbitrati essent te ad vitam mortalem rediisse, sicuti & nos præsentem vitam discernere à futura decet. Non enim hîc tanta perfectio esse potest, quanta ibi, quando toti ad te conuersi, sine fine tecum erimus. Hîc accedis, & recedis; accedendo exhilaras nos cum discipulis, & recedendo contristas (quod nos imperfecti maxime experimur.) Non enim hîc semper in eodem statu permanemus, sed rerum vicissitudinem esse oportet pro huius vitæ conditione. O Domine, da mihi horum intellectum, vt sic vitam ineam discipulis tuis conformem. Et si quandoque recedas gaudium nobis auferendo, mane tamen secundum gratiam; & ad tristitiam cordis mitigandam redi interdum. Ita enim cum charissimis discipulis egisti. Tu aliquando ad eos venisti; & vt à principio eos in fide resurrectionis confortares, vel quinquies ipso die Paschæ te ipsum eis manifestasti. Nam præter hoc quod benedictam Matrem tuam ante omnes proculdubio consolatus es, manifestasti te ipsum primò Mariæ Magdalenæ in forma hortu-

lani

lani (*Ioan. 20.*) Nos enim peccatores quotidie habemus rigare hortū nostrū, & ex eo tribulos & spinas eiicere; hoc est peccata nostra; ex quibus faciemus aggerem vel sepem, ut huc respicientes, spiritum superbiæ à cordis nostri horto excludamus. Beatæ autem Mariæ Magdalene primū ante omnes ad solatium omnium peccatorum pœnitentia ductorum apparuisti. Eia igitur Domine, noli obliuisci mei miserissimi peccatoris, sed aperi teipsum mihi per diuinam gratiam, ut cum Maria Magdalena memor sim hortum meum expurgare ab omni concupiscentia, murmure, prauis cogitationibus, porrò ab omnibus vitiis, & peccatis, quæ in cumulum cōgregem, & cor quasi vallo & propugnaculo muniam, ut ad infirmitates & mala respiciens, numquam meipsum exaltem, sed meritò confusus omnes homines mihi præferam, & abstineam à peccatis, quæ toties in me dominium habuerunt. Secundò apparuisti mulieribus redeūtib; à sepulchro (*Matthæi 28.*) & per Angelos de tua resurrectione iam admonitis, inter quas etiam

erat Maria Magdalena, vt te peccatores
pœnitentes non respuere declarares.
Cùm ergo obuiss mulieribus diceres,
Aucte;accesserunt illæ & tenuerunt pe-
des tuos,& adorauerunt te. Atque tunc
dicebas illis : Nolite timere (nam cum
timore exierant de monumêto)ite nun-
tiate fratribus meis,vt eant in Galileam,
ibi me videbunt. Eia Domine, sicuti
has mulieres dignas duxisti prima ma-
nifestatione,ita & mihi creaturæ miser-
rimæ scintillam gratiæ impartiri digna-
re,quò in anima,beneficia hisce mulie-
ribus præstita,sentiam.Saluta me ad ha-
rum exemplum in spiritu, vt p̃r tuam
piam salutationem,quam in sumptione
venerabilis Sacramenti experiar, ad te
veniam, ac teneam pedibus, hoc est
charitatem tuam erga minimos quosq.
declarem, in quibus te assiduè hono-
rem,atque ita sine tædio adorem.Si hæc
agam, consolaberis me in omni tribu-
latione mea,& confortabis,vt intrepidè
quotidie tuum ministeriũ adimpleam.
Tertiò visus es Petro, pro quo Angelus
quoque sollicitus mādabat mulieribus,
vt ei tuam resurrectionem nuntiarent.

Tu

Tu enim es amicus peccatorum pœnitentiam agentium, qui non vis mortem peccatoris, sed magis vt conuertatur & viuat. Quod me etiam multum conso-
latur, qui toties & tam faciliè labor, & cogitatione citius indignationem tuam incurro. Sed, ô Domine, noli hoc peccatum mihi imputare, sed respice me cum Petro, & remitte mihi omnia peccata mea. Manifesta teipsum mihi toties, quoties ad me per venerabile Sacramentum diuerti dignaris: adiutua infirmitatem meam, & consolare me in miseria mea cum Petro, nè in malitia perseuerem, aut per inordinatam tristitiam in desperationis foueam incidam. Quartò apparuisti ipso die Pasche euntibus in Emmaus, qui multum imperfecti desponderat animum post passionem & mortem, cum diceret; Nos sperabamus quod ipse esset redempturus Israël; cum quibus tamquam peregrinus & planè ignotus ambulabas, vsque dum ex fractione panis te cognosceret. Verum multas & bonas cōditiones habebant, quod videlicet loquerentur de te, & tibi licet ignoto compaterentur.

N 5

Vnde

Vnde tu appropinquans ibas cum illis, talis exteriùs, qualis intus eras in cordibus ipsorum; vt intus cor illuminando, foris te ipsum tandē manifestares. Oculi eorum tenebantur, ne te agnoscerent; sed corda eorum magis ac magis charitate accendebantur; donec te cogentes secum tāquam hospitem ad hospitium ducerent, vbi mensæ accumbentes ex fractione panis te cognouerunt. Quo facto, euauisti ex oculis eorum, vt ipsi ad se reuersi, dicerent: Nōne cor nostrum ardens erat in nobis, dum loqueretur nobis in via, & aperiret Scripturas? Et surgentes eadem hora regressi sunt in Ierusalem, & inuenerunt congregatos vndecim, & eos qui cum illis erant, dicentes quòd verè surrexisses, & apparuisses Simoni. Et ipsi narrabant quæ gesta erant in via, & quomodo cognouerunt te in fractione panis. Eia Domine, da vt cū hisce discipulis ambulem, quò in omni tristitia & miseria cor ad te conuersum habeam; loquar de te, & compatiar tibi, qui maxima tristitia & doloribus plenus fuisti, quò & ego in omnibus operibus meis ex toto corde

tecum

tecum sim. Nam si tu mecum fueris, & ego hoc ipsum ignorem, tandem te ipsum aperies, vt te esse cognoscam. Et si toto die oculi mei teneantur, ne te agnoscam, non veniam ad vesperum, nisi prius te cognouero. Aperiantur mihi oculi, quotiescumque te in venerabili Sacramento recepero, vt vel tunc saltem imperfectiones & infirmitates meas animaduertam, quò profundius me semper humiliem, & perfectius te cognoscam. Quintò aperuisti te eodem vespere vndecim congregatis, & sedentibus ianuis clausis, quando Thomas non erat cum eis. Tunc intraisti ad eos confirmans dicta, quæ discipuli ex Emmaus venientes nuntiauerant, & stans in medio eorum dixisti: Pax vobis: & ostendisti eis manus & latus, & confortans consolatus es eos, & in commodum proximorū largiens Spiritum sanctum, aperuisti illis sensum, vt intelligerent Scripturas, & dedisti eis potestatem remittendi peccata, atque hæc omnia ex mera charitate egisti: tu namque promiseras illis, dum adhuc viueres nobiscum, quòd te in Galilæa videret: verum

amor inexplicabilis erga tuos præuenit illud tempus, vt antequam domo exirent, atq. clausis ianuis adhuc sederent, eos inuiferis. Quis, ô Domine, potest cōqueri de tua bonitate, quòd promissis non steteris; qui adimplendæ promissionis tempus benignè præueniens, discipulos tuos consolatus es? Ita etiam (spero) nobiscum ages. Promisisti nobis perfectam in vita futura consolationem; verumtamen confido de bonitate tua, quòd præuenies promissionem tuam, & aliquid solarij nobis imparties in vita præsentis, quòd miseras & dolores huius sæculi faciliùs perferamus, & in bonum finem deducamus. Sed quantum gaudium illis fuit, vbi iam cum læritia tua sanctissima vulnera intuerentur, quæ tanto cum dolore perpeßus fueras? Hoc pacto nobis miseris peccatoribus, & maximè mihi miserrimæ creature te manifesta. Reminiscere Domine, ac si hodie esset dies ille Paschæ, quo à mortuis resurrexisti; & exhibe mihi peccatori grauissimo tuā diuinam præsentiam per venerabile Sacramentū, sicuti discipulis tuis charissi-

mis

mis te visibilem præbuiſti. In medio mei, hoc eſt in corde meo, fac pacem habeant omnia quæ intra me ſunt, vt ſenſus & caro obediant intellectui ac ſpiritui. Si quandoque hoſtis interior, caro videlicet, me contriſtet aut grauet; oſtende mihi vulnera tua benediſta, & ad ea reſpiciens, tentationū obliuiſcar. Conſolare etiam me virtute diuini verbi, & gratia, quam hodie in remiſſionem peccatorum nobis contuliſti. Verum ſicuti in ipſo die Paſchæ quinquies te maniſeſtaſti diſcipulis, ita me hodie vel quinquies conſolari dignare per tuam præſentiam in venerabili Sacramento; vt gratiam quam operaris in anima, etiam in vſu quinque ſenſuum experiar, quò vtar illis in omni ſanctitate per abnegationem mei ipſius. Ita Domine maniſeſta te ipſum mihi, vt tibi ſoli nunc deinceps viuam. Amen.

P A R S T E R T I A.

POſt hæc, ô Domine, vbi iam in fide reſurrectionis diſcipulos confirmaſſes, non eis toties, quoties antè, viſus es: & quamuis frequens eſſet tibi cum illis conuerſatio, quò eis ad ſola-

tium pias admonitiones dares ; quater tamen , quantum ex Euangelio patet , post diem Paschæ teipsum aperuisti. idque ad cōmunem omnium nostrū vtilitatem , ne videlicet pusillanimes reddamur , aut despondeamus animum , si quando perfectam consolationem in nobis non sentiamus . Hinc vel octo dies transierunt post diem Paschæ , antequam ad discipulos redires , quod singulariter propter Thomam factū cognoscimus , qui nolebat credere , nisi tangeret & videret. Vt igitur ille magno tui videndi desiderio teneretur , ad octauum diem reditum tuum distulisti , & ad hunc solum recuperandum rediisti , qui aliàs perditæ salutis fuisset. Venisti ergo ianuis clausis , & stetisti in medio eorum , & dixisti : Pax vobis. Deinde dixisti Thomæ : Infer digitum tuum huc , & vide manus meas , & adfer manum tuam , & mitte in latus meum. Est ne hoc signum maximæ misericordiæ , quod iam immortalis factus , præbes benedicta vulnera tua contrectanda ? Omnino sanè : sed hoc fecisti in solatium omnium nostrū , & in corroborationem

fidei

fidei resurrectionis tuæ, vt Thomas tangendo hæc sanctissima vulnera carnis tuæ, vulnera nostræ infidelitatis sanaret. Imò hoc permisisti, vt nobis omnibus liberiores ingressum in tua sanctissima vulnera faceres, tamquam ad thronum gratiæ, ad illa indies attactu cordis contingenda, vt deuotionem & feruorem nouum charitatis acquiramus, quotiescumque tecum vniri vulerimus. Septimò visus es discipulis ad mare Tiberiadis piscantibus, vbi tota nocte laborantes nihil ceperât. Tunc mane facto stetisti in littore, & dicebas: Mittite in dexteram nauigij rete, & inuenietis. Miserunt ergo, & non valebant illud trahere præ multitudine piscium. Et vbi descenderunt in terrâ, viderunt prunas positas, & piscem superpositum & panem. Ac dicebas eis: Afferte de piscibus quos prendidistis nunc. Ascendit Simon Petrus & traxit rete in terram plenum magnis piscibus centum quinquaginta tribus; & cum tanti essent, non est scissum rete. Et dicebas eis: Venite, prandete. & accepisti panem, & dabas eis, & piscem similiter.

Sed

Sed debebant adferre de piscibus quos ceperant. Nam hac manifestatione designasti electos, ad æternam in cælis gloriam prædestinatos; vbi quilibet habebit gloriam, non tantum à te qui es primus & summus gloriæ auctor & causa, verum etiam ab omnibus aliis, quos tibi in gloriam adduxit. Quò igitur quis plures animas lucrificet, eò maiorem habebit gloriam. Rete autem non est scissum, quia nullus ibi peribit. Sentiam, ô Domine, hodie in anima mea talem manifestationem: & quando in tristitia & labore multas infrugiferas lacrymas emisi, tu te mihi manifesta, & da vtiliter & cum salute, mala mea defleam; quò meditatio sacrosanctæ vitæ ac passionis tuæ cum cōsideratione vitiorum & peccatorum meorum coniungatur, & simul fructum in me faciant, vt sic tecum semper prandeam, & vitam tuam immortalem in me experiar, & tu semper me viuas, quomodocumque etiam mecum agatur; atque ita locum in numero electorū tuorum habeam, ne quispiam me de manibus tuis eripiat. Verum vt

hoc

hoc fiat, videam quomodo hic piscis super carbones positus, & panis cum eo. Et quis est hic piscis assus? Tu sponsus meus, qui ad ignem charitatis assatus, in nobis, post hanc vitam, eam perficies. Et quis alius iste panis quam tu? qui es panis Angelorum, totum cæli exercitum confortans ac renouans, qui es panis viuus descendens de cælo, & das vitam mundo. Eia igitur sponse mellitissime, qui hic idem piscis assus, & panis, me hodie ex gratia corroborasti, fac me huius ignis participem, ut hic piscis & panis mihi sapiant, quòd hîc in gratia extremis labiis gustem dulcedinem, cuius abundantia in gloria post hanc vitam satiabimur: atque ita spem concipiam, quòd sicut tu nunc dicebas discipulis, Venite, prandete; ita & ego inter omnes electos audiam vocem illam amœnissimam, Venite benedicti Patris mei, possidete regnum, quod paratum est vobis ab origine mundi. Octauò aperuisti te in Galilæa in monte, quem constitueras illis. Promiseras enim ipsis, quòd hîc te, postquam resurrexisses, viderent. Verùm charitas tua

nimia

nimia omittere nequiuit, quin ante illud tempus tristes tuos discipulos consolatus fueris, seruata tamen promissione, quam hodie adimplesti. Quare & Angelus (*Mar. 16.*) dicebat mulieribus: Sed ite, dicite discipulis eius & Petro, quia præcedet vos in Galileam, ibi cū videbitis, sicut dixit vobis. Da mihi Domine, hoc exemplo edocto, fraternam colere charitatē. Si cui quid promiserō, reddam: & si ante constitutum tempus iuuare potuero, hoc facere non negligam, vt sic me filium tuum declarē. Nondū & vltimē te manifestasti, cū iam ascensurus ad cælos, eduxisti eos in Bethaniam, vbi post multos sermones de regno Dei, benedixisti eis, & nubes suscepit te ab oculis eorum. Atq; ita quadraginta diebus aliquando apparendo, consolatus es discipulos tuos. Et hoc non rariū, quia crebra erat tibi cum eis conuersatio. Vnde & Paulus (*1. Cor. 15.*) meminit aliarum apparitionum, quarum nulla sit memoria in Euangelio. Quia (inquit) visus est plus quā quingētis fratribus simul. Deinde visus est Iacobo, quod factū arbitra-

mur

mur ipso die Pasche. Sæpiùs ergo appa-
rens consolatus es eos, instruens illos de
omnibus. Verùm non fuit tibi conti-
nua conuersatio cum illis, sicut ante
mortem; & hoc ad insinuandam diffe-
rentiam vitæ præsentis & futuræ, & ad
stabiliendos nos in fide resurrectionis,
in qua tota Christiani hominis vita po-
sita est. Eia igitur Domine, hanc fidem
in me conforta, ne vnquam despon-
deam animum, ac si tu mortuus esses;
sed in omni tribulatione & desolatione
augeam mihi animum, cogitans te vi-
uere, & in auxilium mihi venturum,
quando tuæ sanctissimæ voluntati pla-
cuerit; qui etiam absque dubio succur-
res mihi, sicuti sæpiùs præter meritum
& sola misericordia tua adiuuisti me, &
consolatus es. Quemadmodum er-
go discipulos præcessisti in Galilæam
(quod significat transmigrationem &
reuelationem) ita & me præcedere di-
gnare in omnibus. Præcessisti eos in
transmigratione à Iudæis ad gentes,
& præparasti eis viam in gentium
corda, quò fructum ibidem facerent.
Præcedas quæso & me, quoties trans-

itum

itum facturum sum ex carne in spiritum, ex sensualitate in intellectum. Si enim hanc gratiam consequi debeam, necesse est, ut tu precedas me, & viam præpares. Quantum verò ad reuelationem, quam etiam Galilæa significat, præcessisti eundo ad Patrem, & non dereliquisti nos. Reuelasti enim sponsæ tuæ charissimæ de tua gloria & Maiestate, quantum illi necessarium duxisti; & iam præmissus, omnia posthac nobis instillabis, & aperies, quid quàm perfectissimè in gloria futuri simus, qui nobis ibidem præparasti, quæ nec oculus vidit, nec auris audiuit, nec in cor hominis ascenderunt. Ad hæc, ô sponse mitissime, anhelem quotidie; ut hæc cogitando, omnem vanitatem, morositatem & phantasmata extranea planè obliuioni tradam. Amen.

PARS QUARTA.

CUm iam quadraginta dies post mortem adhuc in terris mansisses, ad sanctum illum discipulorum cœtum, & nos cum ipsis in fide resurrectionis confortandos, vsus es adhuc testibus & signis sufficientibus. Vsus es testi-

testimonio duplici, sanctorum videlicet Angelorum, & Scripturæ sacræ, quam discipulis aperuisti, declarans quòd omnia essent implenda, quæ de te in lege Moyſis, Prophetis & Psalmis dicta fuerant, & quod ita oporteret te mori, & resurgere à mortuis tertia die, & prædicari in nomine tuo pœnitentiã & remissionem peccatorum in omnes gentes, incipiendo à Ierosolymis, vti mox factum est, Verùm quantum ad signa & argumenta, sufficienter probasti resurrectionem, tam secundum corpus quàm animam. Quantum ad corpus, tribus modis resurrectionem tuam cõfirmasti. Primùm ostendisti corpus tuum esse verum & firmum, ac non phantasticum, aut quod cedat citra sensum ad instar aëris. Quia præbuiſti corpus tuum palpabile, cum diceres: Palpate & videte, quia Spiritus carnem & ossa non habet, sicut me videtis habere (*Luc. 24.*) Secundò docuisti corpus tuum esse humanum, cùm veram hominis effigiem exhiberes, quam etiam oculis carnalibus intueri poterant. Tertiò demonstraſti idem esse

corpus

corpus quod in cruce pro nobis obtuleras, dum fixuras clauorum ostendendo diceres: Videte manus meas & pedes, quia ego ipse sum. O sponse mellitissime, da, vt ego hæc ipsa signa in me reperiam, ex quibus colligam me tecum secundum animam resurrexisse à mortuis. Da igitur mihi validum & firmum corpus, quod pro te pati non re fugiat, & fortiter repellat honori tuo diuino contraria. Verùm vt tu declarasti humanam formam, ita & ego sim in omnibus mihi agendis humanus, quò in omnibus operibus meis inueniar rationalis, & in animo humilis, agnoscens etiam meas ipsius infirmitates: vt sic per alterum à peccatis præseruatus, in virtutibus progressum faciam; & per alterum, in cunctis operibus bonis perseuerem. Sed quemadmodum tertio ostendisti tuam sanctam & veram resurrectionem, eò quòd haberes idem corpus in patibulo crucis suspensum; ita maneam semper idem in aduersa & prospera fortuna, in tristitia & gaudio, in vtendo & carèdo; nec vñquam mutationi locum dem, sed semper in eadem

eadē fidei, spei & charitatis perfectione permaneam. Si hæc in me comperiam, certus ero, quòd secundum animam tecum resurrexerim. Secundum animā verò docuisti resurrectionem tuam per triplicis vitæ opera, ac primum quidem per opera vitæ nutritiæ, eò quòd cū discipulis charissimis manducaſti & bibiſti. Vt autem ego animæ meæ resurrectionem sentiam, da mihi quotidie manducare cibum cæleſtem, quem mihi peccatori indigniſſimo præparaſti; vt in te ſaporem habens, totius mundi obliuiſcar. Secundò eam demonſtraſti per opera vitæ ſenſitiuæ, cū discipulis ad interrogata reſponderes, & ſalutares præſentes; in quibus oſtendebas te, & videre & audire. Ad hunc modum, ô Domine, vt oſtendam me in anima reſurrexiſſe tecum, da vt benè audiam & videam quæ ſpiritualia & diuina ſunt, atque ita rectè vtar quinq; ſenſibus meis, quò te clarificem, & honorem, & gloriā nominis tui ſemper & vbique promoueam. Nam ſentire meum nihil eſt, niſi in me ſentiam quod in te eſt.

Tertiò

Tertiò denique manifestasti resurrectionem tuam, per opera virę intellecti-
uæ, eò quòd loquebaris cum eis de fi-
guris & vaticiniis, quæ vel præfigura-
uerant, vel prænuntiauerant tuam san-
ctam resurrectionem. Hoc modo ô
Domine, vt certior fiam de resurrectio-
ne animæ meæ, da rectè secundum in-
tellectum viuam, ad cogitandum & lo-
quendum semper de tua diuina gratia
& misericordia infinita, quam nobis
peccatoribus in abundantia exhibuisti,
quò assiduè cogitem & loquar de iis,
quibus in æternum frui speramus. Si
hec in me comperiam, certus ero, quòd
tecum in anima à morte peccati resur-
rexerim. Eia Domine, dignare hæc om-
nia in me perficere, sicuti in teipso pro-
pter me hæc operatus es, & renoua me
in anima, sicut tu in anima & corpore
simul hodie renouatus es, vt tu te in
me, & ego me in te secundum veram
cōformitatem inueniā. Si enim in ani-
ma hæc fortiter obtinero, certus ero,
quòd & corporis reformatio in nouis-
simo die subsequutura sit. Ad hunc ita-
que modū, ô sponse mellissimæ, ope-

rectus

retur in me tua sanctissima resurrectio, ut eam hîc sentiam secundum animam in gratia, & post hanc vitam secundum animam & corpus simul in gloria. Amen.

Quarta MEDITATIO, de admirabili Ascensione Domini nostri IESU CHRISTI.

PARS PRIMA.

Benedictio, & claritas, & sapientia, & gratiarum actio, honor, & virtus, & fortitudo tibi sit, ô Domine Iesu Christe, ex admirabili tua ascensione. Nam quadragesimo die à resurrectione, ascendisti ad cælos, vadens ad eum qui te miserat. Sicut enim à Patre exieras, & veneras in hunc mundum: ita rursus te relinquere oportebat hunc mundum, & redire ad Patrem, non secundum Diuinitatem quæ nec Patrem nec cælos reliquerat, sed secundum humanitatem quæ à mortuis surrexerat. Dignum enim & iustum erat, quod iam factus impassibilis, subtilis, clarus, & agilis secundum

gloriam corporis, esses in loco eisdem
dotibus conueniente. Verum quanta
cum maiestate hunc triumphum egi-
sti! Certè similis numquam triumphus
visus vel auditus est. Præcesserat qui-
dē Enoch (*Gen. 5.*) qui solus in ista ge-
neratione iustus repertus, & Angelo-
rum fretus adminiculo de hoc sæculo
in deliciarū translatus est locum. Eliam
quoque (*4. Reg. 2.*) in curru igneo ab
aspectu hominum legimus sublatum.
Sed horum nemo per seipsum, sed per
Angelorum ministerium id egisse cog-
noscitur. Solus tu Mediator noster, ex
virtute verbi, aliene non indigens suf-
fragio, in beatorum mansiones glorio-
sus intraisti. Hoc diu antè Citharædus
sanctus contemplans, aiebat; (*Psal. 20.*)
Exaltare Domine in virtute tua, canta-
bimus & psallemus virtutes tuas. Vir-
tute igitur propria cernentibus Apo-
stolis, alijsque quampluribus, ferebaris
in cælum, manifestissimè & pediten-
tim, ita vt intuentibus nulla inesset de
ascensu tuo ambiguitas. Sursum autem
progrediente te, facta est in cælo lætitia
singularis. Conuenit simul vniuersus

Ange-

Angelorum exercitus, vt ascendenti tibi pariter obuiarent. Ecce (inquiunt) venit ad templum sanctum suum dominator Dominus, en gloriosissimus fidelium propugnator, prostratis aduersariis redit ad propria. Ipse vtique gloriose humanitatis amictus pallio, atque captiuorum ingenti multitudine circumseptus, laureatus incedit. Occurramus obuiam conditori nostro; nullus moretur, nullique liceat emanere; omnes vnanimiter, quantum valent, laudis exoluant debita; singuli latentur in Domino, quoniam perditorum ipse restaurabit ruinas sociorum, atque antiquæ ciuitatis nostræ mœnia reædificabit eximiè. Rumpamus igitur moras, ecce iam à terra eleuatus, iam panè ab intuentium oculis sublatus est. Tunc ingens oritur cum exultatione susurrus, fitque apparatus citharædorum cælestium, citharizantium in citharis suis. Adest Michaël legionū angelicarum Princeps gloriosissimus, singulorum distinguens ordines, mira que alacritate diuidens vniuersos: præcedunt inferiores, subsequuntur ceteri, iuxta

naturæ prærogatiuam, ac meritorum dignitates. Quale spectaculum, quàm læta congregatio, quantus exercitus, quæ laudum carmina occurrentium resonant Angelorum! Ista profectò non capit sensus, intelligentia non attingit, vñus nescit, ignorat sæculum, cæli mirantur, Eia Domine, à longè semel horum memoriam agam, vt in spiritu me his adiungam, si fortè semel gustare mihi licuerit dulcedinem & iucunditatem, qua Angeli vnà cum animabus sanctis hodie sunt recreati. Et hoc mihi facile concedetur, si in spiritu perfectè tibi vnitus tecum modò ascendam virtute venerabilis Sacramenti, qua hodie ad me venire dignatus es. O si corde tecum essem, ybi tu modò es in gloria. Eia Domine, trahè me in te, sicuti te cupio trahere in me, vt ego tecum sim, sicuti te mecum esse desidero. Amen.

PARS SECVNDA.

Descendentibus Angelis obuias tuam Domine cum ascendentibus tecum Patribus, & indissolubili alligamini compagine vnitatis. Iam enim

enim perlucida se opposuerat nubes, quæ te ab aspectibus admirantium & lætantium discipulorum subtraxerat. Efficitur cor vnum, eadem volûtas, par consensus, mutua exhortatio, æqualis operatio laudis hominum & Angelorum. Singuli absque vocis strepitu certatim singula promunt laudationis præconia; è mutuis aspectibus, de cōcupito consortio, pro ineffabili gloria, cæli ciues terræque lætantur. Vtrosque copulabas parietes tu lapis pretiosus, angularis, & summus. Tu verò hinc inde vallatus psallentium vocibus beatorum, maximo cum honore ferebaris in cælum. A dextris planè tuis Angelorum cunei, & à sinistris Patriarcharum, Prophetarum, Regum ceterorumque Sanctorum instituti sunt chori, vt vicissim se inflammarent ad laudem. Iam innumerabilium fretus agminibus Angelorum, veluti Rex potentissimus tu Mediator noster pergebas ad Patrem. Psallebant Angeli, nimia cum exultatione, dicentes: Psallite Regi nostro, psallite (*Psal. 46.*) Quibus respondebāt iusti: Psallite Regi nostro, psallite. Ite-

rumq; Angeli repetita laude dicebant: Rex omnis terræ Deus. Et iusti; Quoniam ita est, psallite sapienter. Tunc modulatis vocibus æther completur pariter decantantium: Regnabit Deus super omnes gentes, Deus sedet super sedem sanctam suam. In hunc modum ascendisti ô Deus in iubilo, & reuertêris Dominus in voce tubæ, prout de te factus prophetauerat Vates. Imò captiua captiuitas, hoc est Patres antiqui, quos de Limbo eripueras, etiam psallentibus choris, cunctisque plaudentibus mirabiliter ingrediuntur. Dauid ipse cum cantoribus Ierusalem, citharam percuriebat: alij atque alij organa, tympana & millia huiusmodi suauissimè rangebant: omnium affectus & ætus diuinis laudibus intendebant. Porro tota ciuitas illa festiua erat, hilaris, redolens, decora, deliciis referta, occupata laudibus, erecta in Deum, magnificata honoribus, sanctificata meritis, prærogatiuis ornata, dilatarata bonis, stabilita per sæcula, pace secunda, à necessitatibus aliena, Deo charissima, & tibi sempiterno Verbo castissimè copulata.

Per

Per plateas quippe illius, per mansiones & vias ab vniuersis cantabatur Alleluia, hoc est, laudate Deum. Erat prætereà in illius medio, miræ magnitudinis atque incomparabilis pulchritudinis thronus, innumerabilium stellarum splendore coruscus, nec non Angelorum millium claritate stipatus. Hunc diuinus splendor, regia dignitas, atque ineffabilis gloria perornabat. Nemo, vt ipsum tangeret, appropinquare audebat: venerabantur tamen omnes illius artificis sapientiam, cælestem virtutem, affluentem gratiam, æternumq; decorem. Equidem in principio & ante sæcula hic eleuatus est thronus, in quo tu, ô Domine Iesu Christe Rex gloriæ, solus honorabiliter resideres, quemadmodû & factum est. Nam laudantibus Deum cunctis & psallentibus, ac vniuersis cernentibus, in eodem gloriosissimè collocatus es. Tûc millia millium ministrantium, & decies centena millia assistentium Angelorum, vocem dedere dicentes: Benedictio, & claritas, & sapientia, & gratiarum actio, honor, & virtus, & fortitudo Deo nostro in sæcu-

la sæculorum. Amen. Verùm & ipse
Sanctorum cœtus dulcisonis iubilatio-
num clamoribus inquit: Dignus es Do-
mine accipere virtutem, & diuinitatē,
& sapientiam, & gloriam, & honorem,
& benedictionem, quoniam occisus es,
& redemisti nos in sanguine tuo, feci-
stique nos reges & sacerdotes, & tecum
regnabimus in æternum. Hæc & his si-
milia prosequentes, magna cum vene-
ratione cadebant in facies suas, & ante
thronum tuum submittentes coronas
suas, immensas tibi gratiarum exhibe-
bant actiones. Se quidem ab admira-
tione & laude continere non poterant.
Emanabant enim de tua, ô Mediator,
serena facie riuuli nonnulli bonitatis
& clementiæ, profluentes de vitæ fonte
sanctæ ciuitatis; quorum qui aderant
inebriati dulcedine, pia charitate lan-
guebant: sed & ipsa sapientia in te Do-
mine corporaliter habitans, de thesau-
ris diuinitatis suæ spiritualiter quosdā
luminis emittebat exteriùs radios; qui-
bus contemplantes, illustrati, intelli-
gentiæ splendore fulgebant. Trahebantur
suauiter à te, teq; aspicientes vber-
rime

rimè delectabantur. Nil planè in illis vacabat à laude, quoniã totum quod videbatur ibi, agnoscebatur laudabile. Ingrediebantur vtique & egrediebantur, & virentia amoris & laudis pascua degustabant. Tu ipse Verbum Patris arcam myſteriorum affluenter patefaciebas, per quæ rediuiuis contemplationum gaudiis reficiebantur vniuerſi. Nec fastidium ſatietas, nec pœnam deſiderium inferebat. Operabatur in illis tua ipſius potentia, quatenus ineffabilem bonorum capaces exiſterent. In ipſa ſapientia & ſuauiſſima diffundeſ te in illos, reficieſ eos non relinquēs te, ornabas ſingulos in gradibus ſuis, omneſque ſecundùm merita diſponebas. Non de minoritate inuidencia, nec de maioritate generabatur elatio. Omnium omnia communia erant: quoniam tu Deus eras in omnibus omnia. In hoc itaque, ô Mediator, conuiuio nuptiali, exultationis & confeſſionis iucundiffimus percipiebatur guſtus, atq; laudantium ac te Deum benedicentium melliflua carmina perſonabant. Eia nunc Domine Deus, trahe cor

O 5

meum

meum post te, vbi tu ipse es, & intuear quandoque in spiritu triumphum gloriæ, quem in summo cælorum throno geris incessanter, & huius contéplatione in me flaccescat, ac paulatim planè intereat omnis carnalis affectio, & delicia, quas in terris creaturæ mihi adferre possint. Et est planè rationi cōsentaneū, vt hoc mihi fiat. Nam vbi sponsus, illic & sponsa esse debet. Et si in anima & corpore eò iam tendere nequeam, ad minimum spiritus eò dirigatur, vbi anima & corpus in perpetuum tecum manere desiderant. Ob hanc causam ascendisti ad cælos in mea natura, cū in tua eos non reliquisses; vt in terris carnem meam cælestem faceres, & per carnem nostram in te, nostri omnium carni spem dares, sedis ibidem tecum habendę in perpetuum. Da igitur mente nunc prælibare gloriam, qua post hanc vitam satiabor; vt hac occupatús, omnibus præmaturis deliciis moriar; ad quod tua salutaris pręsentia in venerabili Sacramento me satis admonet. Verū Dominus meus & Deus meus, cū ego sim tam fragilis, quòd sen-

tiens

tiens te, non acceptem; videns te, non considerem; audiens te, nō sequar; vim infer carni meæ, & da vt mente eò tendam, vbi tu nunc es in gloria, quò in anima mea tamquam in cælo tuo assiduè te laudè & benedicam. Amen.

P A R S T E R T I A.

CÆlestibus autem canticis, ô Domine, incumbentibus patriæ habitatoribus, diemque festum ducentibus, adhuc turba discipulorum residebat in monte, erectisque in cælum oculis mente delectabiliter pascebatur. Tunc iuxta illos in albis vestibus duo viri astitère, dicentes: Viri Galilæi, quid admiramini aspicientes in cælum? Hic Iesus qui assumptus est à vobis in cælum, sic veniet, quemadmodum vidistis eum euntem in cælum. O Mediatoris præcipua dignatio, ô charitatis viscera prædicanda! In tanto siquidem honoris culmine sublimatus, numquid oblitus es stupentium filiorum? Nec pro gaudij magnitudine, nec pro locorum distantia fouere desisti, quos superstites in mundo dereliqueras. Ita planè in cælis lætaris cum Angelis, vt

in terris non fastidias cohabitare hominibus: nam delicię tuę sunt esse cum filiis hominum. Pro amoris igitur vehementia, non dedignaris summus ad ima descendere, vt infirmos eleues ad summa. Nisi prius descendas tu, numquam erigemur. tua inclinatio, nostra prouectio est. Quare iam ascendens benedixisti discipulis tuis, in signum quod nostri semper memor esses, ad muniendos nos contra hostes, & cęlestibus donis cumulandos. Da Domine, vt assiduę huius benedictionis recorder, ac si iam ascendens benediceres mihi, ad concipiendam spem, quod hanc vitam pręsentem benę feliciterque contemptis hostibus vniuersis transigam. Sed discam tuo exemplo humilitatem, cuncta pręsentia asperner, caueam infimis & caducis delectari, vt expeditius cęlestia capiā. Nam vtraque possidere nequeo, cum S. Iacobus dicat (*cap. 4.*) quod quicumque voluerit esse amicus huius sæculi, inimicus tuus sit constituendus. Da igitur mundo moriar, vt tibi viuam; custodiā legem tuam, aduerser diabolo, & mundum

dum

dum peflundem, contemnam uifibilia, oderim neminem, diligam vniuerfos, atque mentis affectu bona inuifibilia concupifcam; vt fic tandem corporali-ter moriendo, muter in melius, & hinc recedens locum apud te inueniam. Da, vt quahdo (iuxta Ifaiam *cap.* 37.) radices deorfum habeo, fructum faciam furfum, & fim honorabilis Angelis, amabilis tibi, lumen fæculo, vilis mihi, & chariffimus Patri tuo cæleſti. Hoc modo Domine ſentiam quòd tu cum natura mea carnali es in deliciis, & Dominus omnium dominaris in cælo & in terra, & expectas, donec omnes electi, quotquot ſunt in cælo & in terra, vnum ſint, & tu inter eos ſecundùm Diuinitatem ſis omnia in omnibus. Amen.

PARS QVARTA.

DE hac tua admirabili aſcenſione Domine, numquam ſatis ſuper-que te laudare poterimus. Nam hac operatus es ſalutem noſtram perpetuã, quæ hodie à te capite noſtro principium duxit. Ex hoc ſperamus nos membra tecum, qui caput noſtrum es,

vniendos . Hodie namque cælestes creaturas nos omnes formasti. O si hoc in me sentirem, vt caro mea & sensus infirmitates & imperfectiones suas perderent, & iam nil nisi quod cæleste & spirituale experirentur, ne inordinata ira aut concupiscentia in me inueniretur, sed pax & amor; quò in me sentirem, quod modò in te est. Hæc tua ascensio est causa nostræ salutis bifariam; videlicet ex parte nostri omnium, & ex parte tuæ propriæ personæ.

Ex parte nostræ est ascensio tua causa nostræ salutis, quia ex hoc cor & animus eò diriguntur vbi tu ipse es : & hoc diuersis modis. Primùm enim ex hoc fides nostra innouatur & confirmatur, dum iam credimus, quod non videmus. Fides namque est substantia rerum sperandarum, argumentum non apparentium. Non enim quod videmus, credimus, sed quod non videmus. Vnde dicebas discipulis (Joã. 16.) Cùm venerit Paraclitus, arguet mundum de iustitia, eorum videlicet qui credunt. Hæc ergo erit nostra iustitia de qua mundus arguetur, quòd videlicet iam credi-

credimus in te, quem non videmus. Sis
ô Domine benedictus in sæcula de hac
fide nostra. Confirma nos in ipsa, ne
vinqum vcl latum vnguem ab ea re-
cedamus, sed cum electa sponsa tua
matre nostra Ecclesia vniti, tibi sem-
per in vera fide præsentcs inueniamur.
Secundò confortatur per tuam glorio-
sam ascensionem spes nostra. Tu enim
dixisti (*Ioan. 14.*) Et si abiero & præpa-
rauerò vobis locum, iterùm venio &
accipiam vos ad me ipsum, vt vbi ego
sum, & vos sitis. Ex eo namque quòd
assumptam humanam naturam in cæ-
lestibus collocaueris, & nobis spem de-
disti locum istum occupandi in cælesti-
bus. Vbi siquidem fuerit corpus, ibi
congregabuntur & aquilæ (*Matth. 24.*)
Tu Domine es corpus, quod circum-
uolant electi, vt de te satientur in per-
petuum. Hanc spem in me quæso am-
plifica, & si quando tentatione aliqua
decidat, tu rursus erige; ne, hac spe
manente, vinqum tribulatio aut ten-
tatio me afflictū reddat; sed respiciens
ad hanc spem, inter omnes homines me
humiliem, & cunctis me inferiore æsti-

mem,

nem, & patienter feram si quid aduersi mihi eueniat, ne vñquam tribulationum & miseriarum me tædeat, quantumcumque diuturnæ fuerint. Verùm intuitu huius spei, cum Patriarcha Iacob omnem laborem paruifaciam, & tempus laborum breue æstimem. Tertiò per tuam gloriosam ascensionem locum in nobis obtinuit charitas. Hic enim charitas dilatatur, quando videlicet supernis rebus intenti, conuersationem nostram habemus in cælis. Vnde Paulus (*ad Coloss. 3.*) Quæ sursum sunt quærite, vbi Christus est in dextera Dei sedens: quæ sursum sunt sapite, non quæ super terram. Et meritò hoc curamus. Nam tu amicus noster, sponsus & Saluator noster, non versaris ampliùs nobiscum in terris mortalis, sed in cælestibus immortalis. Illic ergo cor nostrum tibi adesse debet. Nam vbi thesaurus noster, ibi & cor nostrum erit. Quoniam autem Spiritus sanctus amor est qui nos trahat ad cælestia; dicebas (*Joan. 16.*) Expedit vobis, vt ego vadam: si enim non abiero, Paracletus non veniet ad vos. si autem

abie-

abiero, mittam eum ad vos. Verè enim cum Apostolis capaces Spiritus sancti non fuissèmus, nisi tu ad cælos ascendis. Verùm vbi iam corporali specie à nobis recessisses, non solùm adfuit nobis Spiritus sanctus, sed & Pater vnà tecum. Eia Domine, adauge in me charitatem, vt iam non vbi viuo, sed vbi amo,agam, hoc est in cælestibus. Sit, ô Domine, hic amor fortis in me, vt per eum aliquando eleuatus tibi præsens sim, ac omnium terrestrium obliuiscar, ac tanto cum feruore tibi intendam, vt nec dolorem sentiam, nec vilipensionem curem, nec laudes humanas magnificiam; sed tamquam viuens mortuus, semper tecum sim, & in vera charitate tibi vnitus. Cuius me admonet venerabile Sacramentum, quo tu ad me venire dignatus es. Per hoc igitur trahe me in te, vt ab omnibus quæ in hoc sæculo sunt separatus, tecum perfectè viuam in perpetuum. Quartò per hanc tuam admirabilem ascensionem augetur reuerentia nostra erga te, dum iam non reputamus te tamquam hominem terrenum, sed tamquàm Deum

cæli

cæli & terræ. Sicut Apostolus dicit (2. Cor. 5.) Etsi cognouimus secundum carnem te Christum, hoc est mortalem, cum tamquam hominem solum te estimare potuissimus; sed nunc iam te non nouimus, cum ab oculis nostris sublatu in gloria Dei Patris uiuas. O Domine, confirma in me hanc reuerentiã, ut te verè tamquam Deum & Dominum meum semper reuerear, & per hanc reuerentiam timore filiali à peccatis præseruet. Verum ut hæc reuerentia in me crescat, exerceam eam singulariter, quotiescumque te in sacrosancta Eucharistia recipio; abstineam ab omnibus, quæ me in tua diuina præsentia dedeçant; & reuerear te, tam in cogitationibus, quam verbis aut factis, cogitans te mihi in omnibus præsentem, quò adnitar & ego tibi in cunctis esse præsens.

At ex parte tua etiam ad nostram salutem cælos petiisti. Primò namque in cælum nobis præparasti viam, quam incognitam nemo antè ambulauerat. Quare de te prophetauerat Michæas Propheta (cap. 2.) Ascendit pandens

iter

iter ante eos. Et hoc opere hodie complesti, de quo sis benedictus in sæcula, qui viam tot millibus annorum præclusam aperuisti. Nunc aliquando nos secuturos speramus. Membra namque capiti tandem associanda erunt. Hæc enim est voluntas tua, vt vbi tu es, & nos simus. Vt autem huius nos certiores faceres, animas patrum de Limbo ereptas tecum in cælum perduxisti, sicuti hoc Propheta Dauid diu antè prophetauerat, quòd tu videlicet ascendens captiuam duceres captiuitatem. Quos enim è diaboli faucibus eripueras, tecum in locum naturæ humanæ peregrinum perduxisti. Sed clementer illos captiuos, per victoriam ereptos, abduxisti. O Dñe memorare, quòd & ego quandoque captiuus sum, & à sensualitate mea, superbia, curiositate, & creaturis aliis detineor, quibus tanto pere inhæreo, vt citra iram & animi commotionem proximo non succurram, & perdo sæpè fratrem, quem tuo pretioso sanguine redemisti. idq; sæpe numero facio propter rem leuiculam. Libera me quæso ab hac captiuitate, vt

libera-

liberatus à sensualitate , amore proprio & creaturis omnibus , liberrimè tecum in cælestibus conuersionem habeam. Trahe itaque me per virtutem venerabilis Sacramenti, quo me indignum pauiſti hodie, vt & ego ſum, vbi tu es. Secundò eſt admirabilis tua aſcenſio cauſa efficiens noſtræ ſalutis. Nam ſicut ſummus ſacerdos in veteri Teſtamēto intrabat in ſanctum ſanctorum, vt aſſiſteret Patri cæleſti pro populo, ita tu Dominus meus & Deus meus intraſti cælum ad interpellādum pro nobis (*vt dicitur ad Hebr. 7.*) Nam ipſa tui repræſentatio ſecundum humanam naturam, quam in cælum intuliſti, eſt quædam interpellatio pro nobis, vt ex quo Pater cæleſtis humanam naturam ſic in te exaltauit, noſtri omnium miſereatur, pro quibus tu Dei filius humanam naturam aſſumpſiſti. Ne igitur obliuiſcaris mei Domine, trahe me in te, & repræſenta me aſſiduè Patri tuo cæleſti, vt ipſe miſereatur mei, pro quo tu eius filius homo factus, mortuus es, ac reſurrexiſti; & tandem ad cælos aſcendiſti, ne meritum

bene-

benedictę passionis tuę in me vñquam
 suo frustretur effectu. Agnosce me per
 beneficium in venerabili Sacramento
 mihi exhibitum. Nam si tu mecum fue-
 ris, & ego tecum; numquam à Patre tuo
 cælesti derelinquar. Operare itaque in
 me Domine, vt in me sentiam, quod tu
 pro mea salute ad cælos ascenderis, &
 ad dexteram Dei sedeas. Tertiò est
 ex parte tua ascensio nobis in salutem.
 Nam ascendisti, vt in cælorum sede
 quasi Deus & Dominus cōstitutus, de
 supernis nobis diuina dona transmitter-
 res. Vnde Paulus (*ad Ephes. 4.*) dicit,
 quod ascenderis super omnes cælos, vt
 adimpleres omnia; nempe donis tuis.
 Ne quæso Domine Deus huius obli-
 uiscaris, sed respice meam multiformem
 fragilitatem secundum omnes
 constitutionis meę partes, & commu-
 nica mihi indies tuam diuinam gratiam
 de superno cælorum habitaculo, quod
 cunctas infirmitates vincam, & tibi
 quotidie magis conformer, ad expe-
 riendam tuę gloriosę ascensionis gra-
 tiam, vt post hanc vitam illam tecum
 participare merear. Hinc clamo ad te

ex

ex totis præcordijs meis cum sancta Ecclesia matre nostra, & oro: O Rex gloriæ & Domine virtutum, qui triumphator hodie super omnes cælos ascēdisti, ne derelinquas nos orphanos, sed mitte promissum Patris in nos Spiritum veritatis, Alleluia. Amen.

Quinta MEDITATIO, de SPIRITVS SANCTI missione in die Pentecostes.

PARS PRIMA.

O Sponse charissime, Pater misericordiarum, & Deus totius consolationis, sit tibi laus & benedictio in sæcula, qui in omnibus semper & ubique verus inuentus es, ac iam in cælestium gaudiorum gloria non reliquisti nos orphanos in terris, sed secundum promissionē misisti Spiritum sanctum Paraclitum, quem toties, dum nobiscum adhuc mortalis viueres, pollicitus es. Dicebas enim (*Ioan. 14.*) Et ego rogabo Patrem, & alium Paraclitum dabit vobis, ut maneat vobiscum in æternum, Spiritum veritatis, quem mundus

non

non potest accipere. quali dicas: Ego eripiar vobis, vt secundum exteriorem hominem vobiscum manere nequeam, sed alium inuisibilem Paraclitum recipietis, Spiritum veritatis, quem mundus non potest accipere; quia non vidit eum, nec scit eum: vos autem cognoscetis eum, quia apud vos manebit, & in vobis erit. Et postea: Paraclitus autem Spiritus sanctus, quem mittet Pater in nomine meo, ille vos docebit omnia, & suggeret vobis omnia, quaecumque dixerō vobis. Et (*Ioan.* 16.) Expedit vobis, vt ego vadam: si enim non abiero, Paraclitus non veniet ad vos: si autem abiero, mittam eum ad vos. Et cum venerit ille, arguet mundum de peccato, & de iustitia, & de iudicio. De peccato quidem, quia non crediderunt in me; de iustitia verò, quia ad Patrem vado, & iam non videbitis me; de iudicio verò, quia iam Princeps huius mundi iudicatus est. Adhuc multa habeo vobis dicere, sed non potestis portare modò: cum autem venerit ille Spiritus veritatis, docebit vos omnem veritatem. Ab hoc Spiritu sancto dependebant

omnia.

omnia. Nam absque illo tua sanctissima incarnatio, dira passio, & amara mors, gloriosa resurrectio, & admirabilis ascensio nihil nobis profuissent. Ipse enim ad fructum istorum omnium percipiendum nos præparare debebat. Imò sine Spiritu sancto nec credere quidem illa mysteria potuissemus; si-
leo, quòd absque illo fructum eorum consequeremur. Hinc (*Luc. 24.*) tam seriò mandasti discipulis aduentum eius expectare, dicens: Ecce ego mitto promissum Patris mei in vos: vos autem sedete in ciuitate, quoadusque induamini virtute ex alto. quasi diceret: Nihil vos potestis efficere, nisi acceperitis Spiritum sanctum. Sedete ergo, hoc est, date vos quieti, in humilitate omnia extranea missa facite, & locum date contemplationi, qua & propriam vilitatem, & diuinæ maiestatis summam altitudinem considerantes, cogitetis quanta Deus fecerit vobis, qui vnigenitum suum Filium misit, dans eum propter vos in mortem, mortem autem crucis; orate vt & ipse donet vobis spiritum sanctum, quo mecum vnum
sitis,

sitis; & simul mecū clametis, Pater no-
 ster, & hoc tā diu, donec veniat Spiritus
 sanctus, & repleat omniū vestrū cor-
 da, vt in perpetuum omnes vos in Deo
 vnum faciat. O nunc sponse mellitissi-
 me da gratiā, vt ad Spiritus sancti ope-
 rationem dignè me præparem. Incipiā
 ex nunc me componere ad sedendum
 in ciuitate Ierusalem, vt intrò me con-
 uertens, in anima mea quietem & pacē
 inueniā. Libera me à diaboli tentatio-
 nibus, quæ ab immūdis cogitationibus
 & carnis lenocinijs principium ducūt,
 ad me inuoluēdum. Hunc hostem lon-
 gius à me repelle, vt quietē inueniam.
 Segrega me ab hoc mūdo per gratiam,
 vt etiam in hoc sæculo viuens præfer-
 uer à malo, nec quidquam vanitatum
 cum eo participem; sed otio eum pro-
 sequar cum omnibus illecebris eius, ne
 in ipso Spiritus sancti aduentu mihi sit
 impedimento. Si ita ab omnibus nocu-
 metis liberatus in quiete & silentio in-
 ueniar, sentiam tandem, quod Parachi-
 rus ad me veniat, & apud me maneat.
 Dedisti quidē mihi Spiritum sanctum,
 cum ad fontem Baptismatis, cum etiam

in Sacramento Cōfirmationis, sed propter vitæ meæ fragilitatem, nescio an mihi adsit, aut apud me maneat. Nam si ille mecū sit & maneat, certus ero quòd per suam gratiam me tibi gratum fecerit. Eia ergo Domine, mitte Spiritum veritatis, quem mundus non nouit, ut apud me sit, & mecum uiuat, quòd ab ipso viuere, sentire, & operari habeā. Mitte illum quæso sine mora, Ipse enim est Spiritus veritatis, qui nos de omnibus salutem concernentibus erudit. Mitte quæso ut me instruat de cunctis quæ egisti & docuisti, quòd per eius internam operationem, tuis vestigijs in omni humilitate, patientia, & obedientia inhaeream. Eia vnice Mediator mitte Spiritum sanctum Paraclitum, ut sentiam illum arguere mundum de peccato, iustitia & iudicio, quòd ab omni peccato & infidelitatis specie mihi caueam; diligenter operer iustitiam ad exercendum me in omnibus virtutibus, ac operibus pietatis: cogitem de iudicio, ne princeps huius mundi iam iudicatus mihi offendiculum ponat, sed liberrimè curram viam mandatorum tuorum, quòd legiti-

mè

mè pugnem contra dæmonem, mundum, & carnem, vt ad sententiã in hora mortis, & iudicium nouissimum semper respiciens, ita vitam & conuersationem instituiam, vt tibi in sempiternum dilectus filius inueniar. Nosti Domine, quòd ego nihil possim sine Spiritu sancto, quia sum caro & sanguis quærens meipsum. Mitte igitur Spiritum veritatis, vt doceat me omnem veritatẽ. Quid est omnis veritas? Vt ego tecum vnitus, sentiã in me, quod & in te est. Hoc quæso operetur in me Spiritus sanctus, vt in omnibus, siue benè siue malè mecũ agatur, tecum contentus sim, & sequar te sine amaritudine, sine murmure, & sine pusillanimitatẽ, in omnibus virtutibus, tribulatione & dolore; vt per Spiritum sanctum tecum vnum efficiar, & simul tecum & per te apud Deum Patrem omnipotentem gratiam inueniã, nunc & in perpetuum. Emitte itaque Spiritum tuum, & creabuntur, & renouabis faciem terræ. Amen.

PARS SECUNDA.

Laudans gratias tibi ago Domine,
Quòd die quinquagesima post re-

P 2

surre-

urrectionem, miseris Spiritum sanctum, hoc est in die Pentecostes, qui etiam Iudæis erat celeberrimus, propter Legem, quam cum tonitru & fulgure in deserto supra montem Sinai, quinquagesimo die, post exitum de Ægypto receperunt: quo ipso die misisti Spiritum sanctum, in specie ignis, quinquagesimo die à resurrectione, quo tu verus agnus Paschalis nos facis transire tecum ex carne in spiritum, ex sensualitate in intellectum, ubi iam per Baptismum limen, id est cor nostrum, & vtrumque postem, hoc est spiritum & animam tuo pretioso sanguine inungentes à percutiente Angelo liberati sumus. Verùm Legem dedisti in monte Sinai, & Spiritum sanctum in monte Sion. Nam Sinai significat tubum, cuius spinæ acutæ & pungentes, quemadmodum Lex cum terrore data est. Sed sicuti Sion idem est quod specula: ita Spiritus sanctus est in solarium omnium afflictorum, & in prouidentiam omnium infirmorum, qui defectus & errores suos agnoscunt, ad cauendum sibi in hac vita ne futura priuentur.

Opti-

Optimè illum misisti quinquagesimo die; quia quinquagesimus annus erat annus Iubilæi, quo omnia debita remittebantur, captiui liberabantur; sicuti nunc per Spiritum sanctum peccata remittuntur, & charitas, quæ operit multitudinem peccatorum, abundè super nos diffunditur. Nam in hoc Iubilæo spirituali, quod cursum suum habet vsque ad nouissimum diem, captiui secundùm animam liberantur, omne delictum dimittitur, sicut illi, cui decem millia talenta dimittebantur, exules redeunt in patriam, hereditas perditâ restituitur; & serui, hoc est homines, qui propter peccata diuenditi erant, à iugo seruitutis liberantur. Sis benedictus, Domine, de hac tua tanta gratia, per Spiritum sanctum nobis communicata. Eia sentiam indies, quòd Spiritus sanctus sit datus in die Pentecostes, & experiar, quòd tamquam membrum Ecclesiæ de Spiritu sancto participem, atque ita solatium percipiam in omni tribulatione, labore & dolore, ne vnquam à te separari contingat. Sit in me ad prouidentiam ope-

randam, quò semper tamquam speculator à longè prospiciens animaduertā, si quando mihi appropinquet hostis, volens me à te abstrahere, vt illum à me repellam, & caueam ab omnibus, quæ te in me operantem impedire possint; sed amplectar omnem veram virtutum viam, ad mortificandum meipsum, & abnegandam sensualitatem, ne salutis meæ perpetuæ obstatulum ponatur. Eia Domine, sentiam gratiam anni Iubilæi, nunc per donationem sancti Spiritus inchoati, & ad nouissimum diem permanentis. Da, hoc Iubilæum diligenter obseruem, ne hora aut momentum transeat, quin influxum tuæ diuinæ gratiæ in me recipiam. Nunc enim manus tua magnifica patet, ad dandum nobis quidquid petierimus, imò amplius quàm petere possimus. Nunc tempus est deponendi iram vt omnes filij iræ redeant in gratiam. Hic est annus quo omnes captiui liberandi, & omne debitum dimittendum. Ne igitur misericordissime Domine, nunc mihi exprobres malitiam meam, nec reminiscaris iniquita-

tum

tum mearum antiquarum, sed per Spiritum sanctum me innoua, vt nunc deinceps in spiritu libertatis ambulans, in nulla virtutum actione difficultatem faciam, sed à Spiritu sancto adiutus, in simplici obedientia sine murmure vitam hanc transigam, quò tibi placeam in perpetuum. Veni igitur creator Spiritus, mentes tuorum quos regendos assumpsisti, visita, imple superna gratia, quæ tu creasti pectora, vt mala fugiètes, bona rectâ intentione amplectamur. Tu Paraclitus diceris, id est consolator, vel aduocatus. Nam tu solus verum instillas solatium, qui etiam linguas infantium facis disertas, & postulas pro nobis inenarrabilibus gemitibus (*Rom. 6.*) Reple quæso cor meum, & consolare me in omni difficultate & miseria, ne ullus labor aut dolor me vincat, sed quò maior & amplior mihi euenerit, tantò maiorem spem concipiam, & gaudeam quòd pro te pati dignus inueniar. Sis etiam aduocatus meus, moue cor & linguam meam ad omne pietatis mysterium: promoue linguam meam, quando mihi orandum fuerit, vt deuo-

re, quasi à te inflammatus, orationem
meam pronuntiem. Ego enim stupidus
sum & ignarus, nesciens quid dicere
aut cogitare oporteat: sed tu, ô aduoca-
te Spiritus sancte, cogita & loquere
pro me, vt placeat oratio mea in conspectu
Patris altissimi. Sic proueni in omni-
bus infirmitatē meā, & pete in me, per
me, & pro me inenarrabili quadā suau-
tate. Tu es donum Dei altissimi, fons
vixus, qui per fidem in Mediatorem
nostrum vnicum Christum viuis in no-
bis, fluens ac saliens paras nobis, refri-
gerium in æstu, potum in siti, ne vn-
quam à bono opere cessemus, vsque
dum ad vitam perueniamus æternam,
vbi bonorum operum merces retribue-
tur, & omnium rerum erit vicissitudo.
Præterea Spiritus sancte Deus illumi-
na me, & quiescam in te, quoties hostis
malignus, mundus aut caro me defati-
gat: sis mihi in æstu tentationum tem-
peries, & refice me tua diuina gratia,
quoties sub imperfectionibus ingemi-
sco, aut iustitiam fatio. Tu quoque
diceris ignis & charitas, qui quod fri-
gidum calefacis, teporem in feruo-
rem

rem conuertis, & deuotionem igne charitatis inflammas. Hunc ignem diuini amoris in me accende, ad omnis impunitie consumptionem, quod tarditatem & pigritiam meam agilitate gratie tue vincas. Tu es spiritalis vnctio, quae emollit omnem duritiem, & amaritudinem noua dulcedine expellit, sanat quod est saucium, solatio tristitiam fugat, docet indoctos, stupidos intelligentes facit, & omnia suauiter & moderate gubernat. Hanc vnctionem clemens mihi infunde, & esto in me. Si enim te habuero, hac vnctione gaudebo. Vt ergo de te certior fiam, rege me cum tanta suauitate, vt bonum & malum, grata & ingrata, dulcia & amara, facilia & difficilia de manu tua accipiam, & libenter tecum perferam; vt gaudium mihi sit in spiritu, si quando in carne contrister. Tu quoque, septiformis munere, quo virtutes omnes perficiuntur. Dexteræ Dei tu digitus, quo dæmonia eiiciuntur. Tu es promissio Patris, quæ indoctos erudiuit, & linguas eorum fecit disertas. Dignare igitur & me visitare munere septiformi, & quid-

quid bonū inueneris perfice, vt in omnibus conuersatio mea perfecta inueniatur. Da per te, Dei digitum, cuncta faciēda opere adimpleam, ne à diabolo, morte vel inferno, à carne vel sanguine, à sensibus vel vlla creatura impediatur. Fac vt sumus deserti, ac primū in nobis ipsis, quò Patrem in Filio laudemus, atque glorificemus quotidie; ac deinde sumus eloquentes ad docendum proximos, in iis quæ salutem concernunt. Accēde lumen sensibus, infunde amorem cordibus, infirma nostri corporis, virtute firmans perpeti; quò in omnibus tractum tuum sequamur, & vocationi nostræ satisficiamus. Hostem repellas longius, pacemque dones protinus, ductore sic te præuio vitemus omne noxium. Per te sciamus de Patrem, noscamus atque Filium, te vtriusque Spiritum credamus omni tempore; quò tu in nobis operās, Filio Dei nos acceptos facias, qui deinceps pro nobis respondeat, & causam nostram agat apud Patrem cælestem, nunc & in perpetuum. Amen.

P A R S

P A R S T E R T I A.

O Deus in altissimis, quàm admirabile est nomen tuum in vniuersa terra! Nam dum compleretur dies Pentecostes, erant omnes discipuli pariter in eodem loco: & factus est repente de cælo sonus, tamquam aduenientis spiritus vehementis, & repleuit totam domum, vbi erant sedentes. Et apparuerunt illis dispartitæ linguæ tamquam ignis, feditq; supra singulos eorum: & repleti sunt omnes Spiritu sancto, & coeperunt loqui variis linguis, prout Spiritus sanctus dabat eloqui illis. Omnes in vnum congregatos esse oportebat, vt acciperent Spiritum sanctum. Nam Spiritus sanctus non datur nisi in vera Ecclesiæ Catholicæ vnitatē. Da ergo, ô Domine, vt maneam in hac domo, in hac cōgregatione, quam sancti Apostoli tecum assumpserunt, & nobis posteris suis lege hereditaria reliquerunt, vt nos cum illis vniti in fide Ecclesiæ Catholicæ vera, indies Spiritum sanctum in cunctis negotiis & rebus expectemus. Quia sine ipso nihil possumus. Expectemus ergo illum gnauiter, ne tēpus vel minimum,

quo ipse venire possit, negligamus. Ipse enim repente venit, & quando minimè cogitamus: sed si tunc parati fuerimus, venè quidem; sin minus, gravissima nos tristitia confundet. Da igitur, sanctarum cogitationum continuatione gnaniter illum expectem. Occupationum multitudo longe sit à me, ut semper circa unum necessarium versem, ac Spiritui sancto semper paratus sim. Et si iam non veniat cum honore, veniat saltem potenter, ad instar spiritus vehementis, quod me trahat, impellat, & cogat ad mundum relinquentium, & ad optimam partem eligendam, quæ non auferetur à me. Sed si hoc consequi voluero, oportebit me sedere, per profundam humilitatem; qua inter omnes homines, paruos & magnos, me humiliem, & vilissimum reputem; quod in meipso locum dando Spiritui sancto, requiem inueniam. Et quid obstabit, cum totam domum impleuerit, ubi erant sedentes? Nam & ego in hac domo tua sum, gratia tua. Possum me ergo alienus esse à Spiritu sancto, qui hanc domum gubernat, gubernavit, atque gubernabit usque in finem? Quod si

alic-

alienū me esse contingeret, ego ipsemet, vitæ meæ improbitate, tanti mihi damni causā attulissem. Sed ne extrema ista infelicitas mihi eueniat, ego deinceps, Domine, nihil mihi assumam : veniat Spiritus sanctus & rerum gubernacula administret pro tua sanctissima voluntate; vt dum ipse me fortiter trahat ad seipsum, ego ab omnibus secundū carnem modò placētibus abstineam, & nihil mihi vendicem : ipse autem solus in me sit, & pro beneplacito suo mecum agat. Si enim à Spiritu tuo guberner, bono gaudebo regimine. Verū vt hoc in me, & in omnibus nobis operareris, misisti illū in specie ignis, vt virtus eius tamquam ignis in nobis ageret. Ignis purgat, illuminat, & inflamat. Veniat ergo Spiritus sanctus, & me tamquam aurum in igne purget, ad tollendas cūctas prauas cogitationes, ad auferēdam à me omnem ad quauis terrestria, carnalia & sensualia procliuitatē, quò me totum caelestem, diuinū, ac spiritualem efficiat. Purget carnem meam ab omni prauo sensu & appetitu maligno, & det vt in me sentiam, quod in te est. Purget

animam meā ab omnibus quæ in mundo sunt, ne quærat quidquā, nisi gloriā & honorem nominis tui, proximi commodum, & propriam salutem. Purget etiam animam secundū te, ne in fruendo vel carendo gratia tua diuina quærat seipsam, sed te solum, ut tu sis ei omnia in omnibus. Purget me in spiritu, ut abstractus ab omnibus creatis, circa te solum Deum viuū & verū semper sit occupatus; quō tu solus in spiritu meo teipso fruaris, pro tua sanctissima voluntate. Præterea ignis illustrat domū, & omnia quæ in ea sunt. Itaque Spiritus sanctus qui in forma ignis venit, me illuminet secundū intellectum, memoriam & voluntatem; quō discernere valeam inter terrestria & cælestia, inter carnalia & spiritualia, inter humana & diuina; ne vniquam errem, terrestria pro cælestibus, carnalia pro spiritualibus, humana pro diuinis amplectendo. Nam propter harum rerū ignorantiam sæpè me inuadit tristitia; ut dum omnia benè expedita putem, reipsa postea cōperiā, quōd me ipsum quæsierim, mundum, vel alias quasuis creaturas, quibus

com-

complacere desiderabam. Mitte ergo
 Spiritum sanctum, qui me doceat, quauis
 in suo genere & pro sua dignitate
 æstimare. Illuminet etiam me secundum
 memoriam, quod mihi ipsi semper præ-
 sens sim. Expellat omnes nebulæ tene-
 bras, quæ propensionem ad mundum
 & superbiam adducunt; ut sic commo-
 dius, quasi in meridiana lucis claritate
 meditando, inueniam quanta fecerit
 animæ meæ in specie, ac toti mundo in
 genere à principio, quod pro his te sine
 fine laudē atq; glorificē. Illuminet me
 quoque secundum voluntatem, ne um-
 quam tuæ diuinæ volūtati resistam, sed
 meam semper ad tuam sanctissimam
 voluntatem quasi ad normā, qua meam
 voluntatem metiar, accomodem, ne
 umquam aliud velim, quàm tu vis. De-
 niq; ignis inflammat materiam, in quā
 operatur. Spiritus ergo sanctus, quem
 in forma ignis misisti, feruere me fa-
 ciat in fide, spe, & charitate. In fide me
 ardētem faciat, ut omni specie infideli-
 tatis expurgata & consumpta, ego in ve-
 ra fidei sinceritate (quæ sola penes fidē
 Catholicam Romanam inuenitur) me

quàm diligentissimè exerceam ad alios frigidos vel tepidos homines inflammandos. Imò faciat me tam feruentem in fide, vt statim, atque cogitatio aliqua infidelitatis aut superstitionis mihi in mentem venerit, adinstar guttæ aquæ in candens ferrum aut ignis ardentis flammam incidentis, consumatur, quòd vera Catholica fidei veritas pura & incòtaminata in me semper sit & maneat. Et hoc peto per intercessionem Sanctorum omnium, qui ita fidei feruore inflammati fuerunt, vt pro tui nominis gloria morientes, tormenta sibi illata sæpè non senserint. Reddat quoque inflammaram spem meam, vt ad eam respiciens, curram totis viribus ad hoc, quod per verbum tuum supersperaui. Si ita me in spe inflammauerit, nullus labor mihi difficilis, aut dolor molestus videbitur, sed feruor gratiæ sancti Spiritus eos faciles & suaues reddet propter finem, quem per spem expecto in perpetuū. Sed super omnia inflammet me charitate ad currendam viam mandatorum tuorū. Si hoc in me operetur, similis ei, qui est ipsa charitas, efficiar;

sicuti

sicuti ferrum in ignem missum, ignitum redditur. Sit hoc modo in me, cogitet, loquatur, & operetur per me, sicuti hodie per tuos discipulos operatus est, qui ab ipso repleti, locuti sunt variis linguis, prout illis eloqui dabat. O si hoc in me sentirem, nil nisi charitatem spirarem, siue sustinerem siue abstinere, siue sedere siue stare, siue sitire siue esurire, siue loqueri siue audire, siue viderem siue sentire, siue cogitare siue operari, semper sese aperiret charitas: adeo etiam, ut mecum conuersantes ad veram charitatem inflammarentur. Veni ergo sancte Spiritus, reple tuorum corda fidelium, & tui amoris in eis ignem accende, qui per diuersitatem linguarum cunctarum gentes in vnitatem fidei congregasti; de quo tibi cum Patre & Filio, sit laus, honor, & gloria in secula seculorum. Amen.

P A R S Q U A R T A.

Benedictus iam sis tu ô Pater misericordiarum. & Deus totius conso-

compleuisti, perficiēs hoc per Spiritum
sanctum, qui nos sanctificauit, & Filio
tuo vnigenito vniuit; vt Spiritu Filij tui
potari, cum ipso & per ipsum iam refu-
gium habeamus ad te, qui nos ab æter-
no in eodē vnigenito Filio tuo dile-
xisti. A te nihil omissum est, quod salu-
tem nostram promoueat; tantummodò
hoc requiritur, vt ego omnium benefi-
ciorum particeps fiam, quò Spiritu san-
cto inebriatus, cum vnigenito Filio tuo
mediatore nostro liberū accessum ha-
beam ad thronum gratiæ, vbi humilli-
mè prostratus cōsequar dona, quæ nec-
dum habeo, vt fiam verè homo secun-
dum cor tuum. O benedicte fili Dei
viui, Iesu Christe Saluator mūdi, spon-
se mellitissime, laus tibi sit & gloria, qui
pro tua promissione nobis satisfecisti.
Non erat tibi satis quòd in nostra carne
ad cælos ascenderis, naturam nostram
cælestem feceris, verum etiam per Spi-
ritum sanctū diuinos nos in terris fieri
voluisti, vt hīc extremis labiis saltem
gustaremus, cuius satietate recreabimur
in supernis: atq. ita repleti Spiritu san-
cto vestigia tua sequamur in abnegatio-

ne

ne & mortificatione nostri ipsorū; quò
 hīc nos temporaliter negligētes & per-
 dentes, perpetuò in te inueniamus. Hæc
 est voluntas tua mi sponse, pater, frater,
 & omnia . Sed quando hoc erit nobis?
 Eia Domine, aperiatur nunc mihi ianua
 gratiæ , qua Spiritus sanctus ad me in-
 trans, humilem, patientem , castum , &
 obedientem faciat. Da intellectum am-
 plectendi has virtutes in prudentia , &
 laboris non pigebit. Adiua me Domi-
 ne, quia absq. te , & Spiritus tui auxilio
 nihil possum, quod gratum sit Patri tuo
 celesti. O igitur Spiritus sancte Deus, sit
 tibi laus, honor & gloria in sæcula , qui
 hodie faciem terræ renouasti, & cum fi-
 liis hominū vnionem fecisti, perficiens
 quod benedictus Dei Filius in carne
 nobis promeruit. Dignare quæso hæc
 ipsa in me adimplere, vt in anima &

& fac instrumenta tuę diuinę gratiæ. O
reator sancte Spiritus, tu es amor Pa-
tris & Filij, operare quęso in me eundē
morem, vt per te simul cū Patre & Fi-
lio te sine fine amem, & totum quod in
te est, amor sit ad exemplum. Sancto-
rum omnium, in quibus tu tam mirabi-
liter operatus es, sicuti in sanctis Apo-
tolis, & super omnes in sanctissima vir-
gine Dei matre Maria: porro in sancto
Martino, sancto Francisco, NN. & om-
nibus alijs innumeris Sāctis, in quibus
ibi complacuisti. Et quare hoc hodie
non consequar, cū tu ipse sis donum
Dei altissimi quod nobis datur, cū
ipsū nobis das citra meritum no-
strum, ex mera gratia & charitate; quę
existens initium salutis nostrę, hodie
acta est consummatio omnium. Eia-
gitur sancte Spiritus, dona mihi teip-
sum, vt quod in me est carnis & sensua-
ritatis, moriatur; & hoc quod tu es, so-
lum in me viuat. Tibi me totum resi-
gno, vt tu pro beneplacito tuo me frua-
is, & sis mihi omnia in omnibus.

Veni ergo sancte Spiritus, & emitte
alitus lucis tuę radium, ad nos inte-

riū s

rius exteriusque illuminandos, ut re-
 nes nostros & cor nostrum penetres. Veni
 pater pauperum, & fac nos pauperes
 spiritu, diuites autem virtutibus. Veni
 dator munerum, ad nos recte dirigē-
 dos, ne vlla creatura nos à te, salute no-
 stra, abstrahat. Veni lumen cordium, &
 cunctas peccatorum tenebras dispelle,
 ut ritè videamus quid agendū, quid ve-
 omitendum. Consolator optime, dul-
 cis hospes animæ, quo ei charior adue-
 nire nō potest. Tu enim consolaris om-
 nes, qui in tristitia sunt. Tu es dulce re-
 frigerium ad afflictos reficiendos. In
 labore requies, ut diu laborantes nō de-
 fatigentur. Eia ergo refrigera me in ten-
 tationibus, ne naturam planè inficiant,
 da requiem post labores, ne planè vires
 consumantur. Tu es in æstu temperies,
 impediens ne malignus spiritus nos
 exæstuarè faciat, & in peccatum indu-
 cat. In fletu solatium, qui solus in omni
 afflictione & difficultate nos cōsolaris.
 O lux beatissima, reple cordis intima

aridum, præ charitatis defectu : sana quod est laucium per malas concupiscências : flecte quod est rigidum, vt humiles nos facias : fove quod est frigidū, vt tuo accēdamur ardore : rege quod est deviū, vt in bono perseverem^r. Da tuis fidelibus, in te confidentibus, sacrum septenarium; quò septies confortati, recti atque sinceri inueniamur. Da virtutis meritum, quò de virtute in virtutem euntes maiorem quotidie gratiam consequamur. Da salutis exitum, da perenne gaudium. Amen.

F I N I S.

APPROBATIO.

N *Ardens hæc piarum Meditationum odorem deuotionis spirat, Dominicæ passionis fructum uberrimum continet, peccati toxicum depellit, fidelium mentes sanctâ refectioe implet, atque sitientium corda vestire dulcissimo potat. Quare nostro iudicio saluiforè imprimi poterit, Christicolisq; commendari.*

Franciscus Houius, Antiqui Castri Pastor,
S. T. L. Librorumq; Censor.

S V M.

SVMMA PRIVILEGII.

ALBERTI & ISABELLAE CLARAE
EUGENIAE, Archiducum Austria, Du-
cum Burgundiae, Brabantiae, &c. Serenissimo-
rum Belgica Principum Privilegio cautum est;
nequis, Meditationes in Passionem & Resurre-
ctionem IESU CHRISTI dispositas per
hebdomadam, Auctore Egberto Spitholdio,
S. Th. L. Canonico & Plebano Antuerpiensi,
præter Martine Plantinae viduae & Balthasaris
& Ioannis filiorum Ioannis Moreti p. m. vo-
luntatem, intra sexennium imprimat, aut alibi
terrarum impressas, in has Inferioris Germania
ditiones importet, venalesve habeat. Qui secus
faxit, confiscatione librorum, & alia gravi poena

